

Kalaallit Nunaanni pinerluttulerinermi inatsit pillugu nalunaarut

Inatsimmik allanngorneri ilanngullugit nalunaarutiginninneq nr. 1187, 18. september 2023-imeersaq, inatsimmi nr. 1782,-imi 28. december 2023-imeersumi § 1-mi allannguinerit malitsigisaat ilanngullugit, inatsimmi nr. 411, 23. april 2024-imeersumi § 1, inatsimmi nr. 200-imi, 25. februar 2025-imeersumi § 2, inatsimmi nr. 202-imi, 25. februar 2025-imeersumi § 1 malillugit, Kalaallit Nunaanni pinerluttulerinermi inatsit matumuuna nalunaarutigineqarpoq.

Immikkoortoq siulleq

Aalajangersakkat nalinginnaasut

Kapitali 1

Inatsisip atuuffii

Inatsisitigut tunngavissaqarnissamik piumasaqaat

§ 1. Inatsisip matuma immikkoortuisa pingajuat malillugu taamaallaat pineqaatissiissutaasinnaavoq iliuuseq, inatsit naapertorlugu pinerluttuliornerusoq imaluunniit tamatumunnga naligitatut isigineqartari-aqartoq.

Inatsisit allat

§ 2. Inatsisip matuma immikkoortua siulleq aamma pingajuat inatsisinik allanik unioqqutitsinerni atuutsinneqassapput, allatut aalajangiisoqarsimanngippat.

Piffissaq atuuffiusaq

§ 3. Inatsit atuutissaaq iliuutsinut tamanut, inatsisip atortuulersinneqarnerata kingorna eqqartuussisutigineqartunut. Iliuutsinut inatsisip atortuulersinneqarnissaa sioqqullugu iliuuserineqarsimasunut tunngatillugu aalajangiineq inatsisinit siornatigut atuuttuniit sakkortunerussanngilaq.

Eqqartuussisinnaaffik il.il.

§ 4. Inatsit atuutissaaq iliuutsinut Kalaallit Nunaanni, Kalaallit Nunaata silaannakkut killeqarfiata iluani, Kalaallit Nunaata imartaani imaluunniit angallammi kalaallit pigisaanni iliuuserineqartunut.

Imm. 2. Aammattaaq inatsit atuutissaaq iliuutsinut inuup Kalaallit Nunaanni nunaqartup sumiiffimmi imm. 1-imi taaneqartup avataanniittumi iliuuserisaanut,

- 1) iliuuseq nunap ilaani naalagaaffiit innuttanut pisussaaffii naapertorlugit akuerisaasup avataanni iliuuserineqarpat, imaluunniit
- 2) iliuuseq tamanna sumiiffiup taamaattup iluani iliuuserineqarpat, inatsisit tamaani atuuttut naapertorlugit pillarneqaataasussaalluni.

Imm. 3. Aammattaaq inatsit atuutissaaq iliutsinut sumiiffiup imm. 1-imi taaneqartup avataani iliuserineqartunut, apeqqutaatinnagu pinerluttoq sumiuunersoq.

- 1) iliuserisaq § 69-imut ilaappat. Unnerluussummut ilaatinneqarsinnaapputaaq §§ 86 imm. 1-imik aamma 88-imik unioqqutitsinerit, § 69-imik unioqqutitsinermut atatillugu iliuserineqartut,
- 2) iliuserisaq inuiaat arlariit akornanni isumaqatigiissummut attuumassuteqarpat, Danmark isumaqatigiisut taanna naapertorlugu eqqartuussisulersuussisussaataalluni, imaluunniit
- 3) pasisap nunami allami eqqartuussisulersuussassanngorlugu tunniunneqarnissaa itigartitsissutigineqarpat aamma iliuseq, nunap ilaani naalagaaffiit innuttanut pisussaaffii naapertorlugit akuerisaasup iluani iliuserineqarsimalluni, inatsit tassani atuuttut naapertorlugit pillarneqaataasussaappat inatsisillu taakku naapertorlugit pineqaatissiissuteqarnernik kinguneqarsinnaappat.

Imm. 4. Iliuserisamut tunngatillugu pinerluttulerinermi inatsisitigut akisussaatisinissamut iliuttip kingunera pilersoq imaluunniit siunertarineqartoq aalajangiisuuppat imaluunniit sunniuteqarpat, iliuserisaq piffimmi, sunniutaasup pilerfigisaani imaluunniit pisussatut siunertaqarfiugaluartumi, iliuserineqartutut isigineqassaaq.

Imm. 5 Imm. 3-mi eqqartorneqartutut pisoqartillugu inatsiseqarnermut ministerip aalajangissavaa unnerluussisoqassanersoq.

§ 5. § 4 imm. 2 aamma 3 naapertorlugit akisussaatisisoqarsinnaanngilaq

- 1) pinerluttoq inatsisitigut oqartussaataaffiusumit, iliuseqarfigisimasamini, inaarutaasumik pingitsuitaappat,
- 2) pineqaatissiissut naammassineqarsimappat, ingerlanneqarpat imaluunniit nunap eqqartuussiffiusup maleruagassai naapertorlugit atorunnaarsinneqarsimappat, imaluunniit
- 3) pinerluttoq pisuutinneqarsimappat, pineqaatissiisummik aalajangiisoqarani.

§ 6. Inuk, naalagaaffimmi allami iliutsimut tamatumunngarpiaq pineqaatissinneqarnikuusoq, eqqartuussisulersuunniarneqarpat, inatsit manna naapertorlugu pineqaatissiissuteqarnermi tamanna isiginiarneqassaaq.

§ 7. Pinerluttoq Kalaallit Nunaanni nunaqanngippat imaluunniit taassuma inuiaqatigiinnut kalaallinut atassuteqarnera ima kaanngalatigippat inatsisip matuma pineqaatissiissutissartaanik atuinissamut tunngavissaasut atuunnatik, suliaasaq suliaasanngortinneqarsinnaavoq imaluunniit Danmarkimi eqqartuussisulersuussassanngortillugu innersuussutigineqarsinnaavoq.

§ 8. Malittarisassanik §§ 4-mi aamma 7-miittunik atuinissaq atuuttusaanngiffinnit, naalagaaffiit innuttanut pisussaaffiinit akuerisanit, annikillilerneqarpoq.

Kapitali 2

Allatut ajornartumik illersuisariaqalerneq aamma illersuisinnaatitaaneq

Allatut ajornartumik illersuisariaqalerneq

§ 9. Inunnut allatut ajornartumik illersuisariaqalerlutik iliuseqarsimasunut inatsisip matuma pineqaatissiissutissartai atorneqassanngillat, saassunneqarneq imaluunniit pissutissaqanngitsumik saassunniarneqarluinnalerneq akiorniarlugu imaluunniit pinngitsoortinniarlugu iliuseqarnerit pisariaqar-

simappata aamma taamaalliorneq saassussinerup navianassusianut, saassussisup inuttaanut saassunneqartullu inatsisitigut illersugaanerata pingaaruteqassusianut naleqqiullugu illersorneqarsinnaappat.

Imm. 2. Inatsisit malillugit allatut ajornartumik illersuisariaqalernermut killissarititaasunik qaangiisoqarpat inatsisip matuma pineqaatissiissutissartai atorneqassanngillat, qaangiineq annilaarnermik imaluunniit kamaammernermik, saassussinerup pilersitaanik, naleqquttumik patsiseqarpat.

Imm. 3. Malittarisassat assingusut atuupput iliuutsinut, inatsisit malillugit peqqussutit malinneqartinniarlugit, inatsisit malillugit inummik tigusarinninniarluni imaluunniit tigusaq imaluunniit inuk pinngitsaalillugu inissitaq qimaanissaanut akornuserniarlugu inatsisinut naapertuuttumik periuseqarluni iliuuserisariaqakkanut.

Illersuisinnaatitaaneq

§ 10. Inatsisip matuma pineqaatissiissutitai atuutinngillat inunnut pisariaqartunik iliuuserineqarsimasunut inummik imaluunniit pigisanik ajoqusiinissamik aarlerinartorsiorneq pinngitsoortinniarlugu, inatsisinik unioqquitsineq pingaaruteqarpallaanngitsutut isigineqartariaqarpat.

Kapitali 3

Mianersuaalliorneq, iliuuseqariaraluarneq aamma peqataaneq

Mianersuaalliorneq

§ 11. Mianersuaalliorneq inatsisinik unioqquitsinerni inatsimmi matumani taagorneqartuni pineqaatissinneqarnermik taamaallaat kinguneqarsinnaavoq, tamanna inatsisitigut immikkut tunngavissaqarpat. Inatsisinik allanik unioqquitsinernut tunngatillugu pineqaatissiisoqarsinnaavoq, aamma unioqquitsineq mianersuaalliornekkut pisimappat, taamaassananili akerlia inatsisitigut immikkut tunngavissaqarpat.

Imm. 2. Pinerlunneq eqqartugaq aalajangersimasumik kinguneqarpat piaarinani pisimasumik, aalajangersagaq pineqartoq naapertorlugu atsaat akisussaatisisoqassaaq pisimasup kingunera pineqartup mianersuaalliorneratut naatsorsuutigineqarsinnaappat.

Iliuuseqariaraluarneq

§ 12. Iliuutsit, pinerluuteqarnissamut siuarsaasut imaluunniit naammassisitsiniaasut, pinerluuteqarniarneq naammassineqarsimanngippat, iliuuseqariaraluarnerut isigineqassapput inatsisillu aalajangersagartaannut ilaatinneqassallutik.

Peqataaneq

§ 13. Inatsisinik unioqquitsinermut atatillugu aalajangersagaq atuutissaaq kikkunnulluunniit, kajumissaarinernekkut, siunnersuinernekkut iliuuseqarnernekkullu iliuuseqaqataasimasunut.

Iliuuseqariaraluarnermiit aamma iliuuseqariaraluarnermut peqataanermiit tunuarneq

§ 14. Inatsisip matuma pineqaatissiissutissartai atuutinngillat pinerluttoq nammineq piumasutsiminik, iliuuseqarnissamullu nalaatsornikkut akornutininik imaluunniit siunertarisap tamatumap anguneqarnissaanit pissuteqarani, tunuarpat imaluunniit naammassinninnissamik akornusiippat imaluunniit iliuuseqarpat, naammassinninnissamik akornusiisussaasimagaluartunik, tamanna pinerluttup nalusaanik iluatsinngitsoorsimappat imaluunniit allatut akornuserneqarsimalluni.

§ 15. Inatsisip matuma pineqaatissiissutissartai atuutinngillat inummut peqataasumut, pineqartoq § 14-imi piumasaqaatit taagorneqartut atuutsillugit iliuutsip naammassineqarnissaanik akornusiisimappat imaluunniit iliuuseqarsimappat, pinerlunnermik akornusiisussaasimagaluartunik, tamanna pinerluttup nalusaanik iluatsinngitsoorsimappat imaluunniit allatut akornuserneqarsimalluni.

Kapitali 4

Ukiukitsuuneq

§ 16. Iliuutsit meeqqanik 15-it inorlugit ukiulinnit iliuuserineqartut inatsit manna naapertorlugu pineqaatissiinermik kinguneqarsinnaanngillat.

Kapitali 5

Inatsisitigut pisinnaatitaasunut pisussaatitaasunullu pinerluttulerinerimi inatsisitigut akisussaaneq

§ 17. Inatsisitigut pisinnaatitaasoq pisussaatitaasorlu inatsimmi matumani aalajangersakkamik unioqqutitsinermut akiliisussanngortinneqarsinnaavoq. Taamaattoqassaartaaq inatsisinik allanik unioqqutitsinermut, tamanna inatsimmi imaluunniit inatsit naapertorlugu aalajangerneqarsimappat.

§ 18. Ingerlatseqatigiiffinnut il.il. pinerluttulerinerimi inatsisitigut akisussaaneq pillugu aalajangersakkani pineqarput, allamik aalajangiisoqarsimatinnagu, inatsisitigut pisinnaatitaasoq pisussaatitaasorlu kinaluunniit, aamma aktieselskabit, anpartsselskabit, andelsselskabit, interessentskabit, peqatigiit, aningaasaateqarfiit, pigisat, kommuunit, Namminersornerullutik Oqartussani pisortaqarfiit aamma naalagaaffimmi pisortaqarfiit.

Imm. 2. Aammattaaq aalajangersakkani pineqarput suliffiit inummit ataatsimit pigineqartut, taaku ingammik angissutsimikkut aaqqissuussaaneermikkullu ingerlatseqatigiiffinnut imm. 1-imi taagorneqartunut sanilliunneqarsinnaappata.

§ 19. Inatsisitigut pisinnaatitaasumik pisussaatitaasumillu pinerluttulerinerimi inatsisitigut akisussaatitsisoqassappat unioqqutitsineq taassuma suliffiata iluani piliarineqarsimassaaq, inuk ataaseq arlallilluunniit inatsisitigut pisinnaatitaasumut pisussaatitaasumullu atassuteqartut pisuutinneqarsinnaappata imaluunniit inatsisitigut pisinnaatitaasoq pisussaatitaasorlu nammineq. Iliuuseqariaraluarnernut tunngatillugu § 12 taamatulli atuutissaaq.

Imm. 2. Naalagaaffimmi pisortaqarfinnik, Namminersornerullutik Oqartussani pisortaqarfinnik aamma kommuninik pinerluttulerinerimi inatsisitigut akisussaatitsisoqassappat unioqqutitsineq, inu-

innaat iliuusaannut assingusoq imaluunniit tamatumunnga sanilliunneqarsinnaasoq, piliarineqarsimas-saaq.

Kapitali 6

Unnerluussut

Pisortatigoortumik imaluunniit inuinnarnit unnerluussut

§ 20. Inatsimmik matuminnga unioqqutitsinerit pisortatigoortumik unnerluussutaassapput, taamaattorli tak. imm. 2.

Imm. 2. § 99-imik unioqqutitsineq inuinnarnit unnerluussutaassaaq. Taamaattoq innarligeasup qinnuteqarneratigut pisortat unnerluutiginnissinnaapput

- 1) suliani sakkortuumik pasisaaneq eqqortuunngippat,
- 2) suliani pisuutitsineq tusagassiuutit amerlasuunniit atuarneqartartut imaasigut saqqummiunneqarsimappat imaluunniit siaruaanneqarluni, pasisaanerlu innarligeasumik annertuumik ajoqusiisinnaappat,
- 3) suliani inuk pissutsimik pisortani atorffimminik suliaminilluunniit annaasaqassutigisinnaasaanik pasisaappat, imaluunniit
- 4) suliani, sakkortuumik pasinninneq kinaassutsimik isertuussilluni siaruaanneqarsimappat.

Unnerluussuteqarnissamut piffissaliussat

§ 21. Unnerluussuteqartoqassanngilaq,

- 1) akiliisitsineq imaluunniit arsaarinninneq taamaallaat eqqartuussissutigineqarsimassagalarpat aamma unioqqutitsinerup soraarunneqarneraniit ukiut marluk ingerlareersimappata, taamaattoqassanngilarli pisortanut akileraarutit akitsuutillu pillugit aalajangersakkanik unioqqutitsisoqarsimappat, taamaaliornikkut pisortanut akiligassat akilernaveersaarniarneqarsimallutik, imaluunniit
- 2) inatsisinik unioqqutitsinermit piffissaq ima sivilisutitigisoq qaangiussimappat inatsimmi matumani immikkoortut pingajuat malillugu pineqaatissiissutinik aallarniinnissaq tunngavissaqarunnaarsimasutut nalilerneqarluni.

Imm. 2. Taamaattorli imm. 1, nr. 1, oqaaseqatigiit siulliit inatsisitigut pisinnaatitaasunut pisussaataasunullu atuutissanngillat.

Imm. 3. Pinerluttulerinermi inatsisitigut akisussaatisinissaq pisup kinguneranit imaluunniit kingusinnerusukkut pisumit allamit aalajangerneqarpat imaluunniit sunnerneqarpat, piffissaliussaq aatsaat naatsorsorneqassaaq kingunerup imaluunniit pisup aallartinneraniit.

Imm. 4. Eqqartuussisuusut naliliippata imm. 1 naapertorlugu unnerluussuteqartoqarsimasariaqanngikkaluatoq unnerluutigineqartoq pinngitsuutissavaat.

Imm. 5. Pineqartoq unnerluutiginninneq pillugu ilisimatinneqarpat, imaluunniit suliassamik eqqartuussisutigooortumik suliarinninnissaq aalajangiinnissarlugu pillugit alloriartoqarnissaanik unnerluussisussaataasut noqqaassuteqarpata, tamatumuuna pineqartoq unioqqutitsineq pillugu unnerluunneqarluni, unnerluussuteqarnissamut piffissaliussaq unitsinneqassaaq. Inatsisitigut pisinnaatitaasup pisussaataasullu akisussaanera pillugu, eqqartuussisarnermik inatsimmi § 135 malillugu inatsisitigut pisinnaatitaasoq pisussaataasorlu sinnerlugu inummut nalunaarutiginninnernik tigusisinnaasumut, unnerluussuteqarnissamut piffissaliussaq unitsitsineqarsinnaavoq

Imm. 6. Malersuineq taamaatiinnarneqarpat, tamanna pillugu aalajangiineq naalagaaffiup eqqar-

tuussissuserisuanit allanngortinneqaranilu allanngortitsinissamut piffissaliussaq tamanut atuuttoq qaa-
ngiutsinnagu, unnerluussuteqarnissamut piffissaliussaq ingerlaannassaaq, soorluli malersuisoqarsiman-
ngitsoq. Tamanna aamma atuuppoq malersuineq piffissami aalajangigaanngitsumi unitsinneqarpat.
Unitsitsineq pasisap malersuineramik ingalassimanninniarnernanik pissuteqarpat piffissaq malersuiner-
mut atorsimasaq unnerluussuteqarnissamut piffissaliussamik naatsorsuinermini ilanngunneqassanngilaq.

§ 22. Inuinnaap unnerluussuteqarsinnaanera aamma pisortat unnerluussinissaannut piumasaqarneq
atorunnaassaaq taamaaliornissamut pisinnaatitaasoq eqqartuussivikkut suliaassanngortitsinnngippat,
imaluunniit eqqartuussissutigittinniagaqanngippat pineqartup suliaassinissaminut imaluunniit
unnerluussummik eqqartuussissutiginiakkaminik naammattumik tunngavissaqarluni
ilisimasaqalerneraniit kingusinnerpaamik qaammatit arfinillit qaangiunneranni.

Imm. 2. Unnerluussuteqarnissamut pisinnaatitaasut arlaliuppata imaluunniit pisuutitassat arlali-
uppata taakkua tamarmik immikkut piffissaliussamik naatsorsuiffigineqassapput. Pisuusut ilaannut
tamanut pisortat unnerluutiginninnissaannik piumasaqarnissamut piffissarititaasoq
qaangerneqarsimappat, kisianni pisuusunut sinnerinuunngitsoq, taamaattoq unnerluussisussaataasut
aalajangiinissaat apeqqutaassaaq, taakkununga unnerluutiginninnissamut piumasaqarneq aamma
ingerlanneqassanersoq.

Imm. 3. Inuinnaap unnerluussuteqarsinnaanera imaluunniit pisortat unnerluutiginninnissaannut
piumasaqarneq atorunnaassaaq pinerlineqartup toquneraniit qaammatit arfinillit ingerlasimappata.

Imm. 4. Suliaq inuinnarmit unnerluussutigineqarsimasooq pinerluttulerinermini inatsisitigut akisus-
saatitsinissaq pillugu piumasaqaat malillugu aalajangiineramik kinguneqanngippat piffissaliussaq inger-
laannassaaq, taamaalilluni piffissaq malersuiffiusimasooq ilanngullugu naatsorsorneqassanani.

Imm. 5. Aalajangersakkat imm. 1-4-miittut aamma atuutissapput inatsisitigut malitseqartitsissuti-
nut § 99, imm. 5-imi eqqartorneqartunut tunngatillugu, taamaattorli ukiut pingasut pisoqalisoorinissamut
piffissaliunneqassapput.

Immikkoortut aappaat

Pinerluutit ataasiakkaat

Kapitali 7

Naalagaaffiup namminersorneranut isumannaatsuuneranullu pinerluutit

§ 23. Nunagisamik killuussisutut eqqartuunneqassaaq

- 1) kinaluunniit, naalagaaffiup namminersorneranik imaluunniit pinngitsaalineqarani aalajangiisinnaas-
suseqarneranik innarliinissamik siunertaqarluni iliuuseqartoq imaluunniit akeqqersimaartitsilersoq,
aamma kinaluunniit sorsunnerup imaluunniit tiguagaanerup nalaani imaluunniit taamatut pisoqaq-
qajaanerani akeqqamik siunnersuilluni iliuuseqarlunilu ikiuisoq,
- 2) kinaluunniit, naalagaaffik sinnerlugu naalagaaffimmik allamik isumaqatiginninniarsinnaatitaalluni
aalajangiisinnaatitaalluniluunniit imminut suliaasiissutigineqartunik suliaqarnermini naalagaaffiup
iluqaqtissaata akerlianik iliuuseqartoq, aammalu
- 3) kinaluunniit, naalagaaffiup akeqqanit tiguarsimaneqarnerata nalaani tiguaasimasunut atassuteqarfi-
ginninnermik atornerluisimasooq imaluunniit atornerluiniarsimasooq nammeneq imaluunniit aningaa-
satigut iluanaarutissaqaatiginarlugu.

§ 24. Kilitsissiatut sulinermut eqqartuunneqassaaq

- 1) kinaluunniit, naalagaaffimmi allami imaluunniit naalagaaffiup allap aqqissuussaani atorfeqarluni
imaluunniit inuit taamatut atorfeqartut atugassaannik pissutsinik naalagaaffiup inuiaqatigiilluunniit
soqutigisaat isumaginarlugit isertuutassaasunik paasisassarsiortoq imaluunniit ilisimatitsisoq,

aamma

- 2) kinaluunniit, naalagaaffiit allat isertortumik paasiniaasartuinik naalagaaffiup iluani sulisinnaalersitseqataasoq.

§ 25. Nunagisaminik ajoqusiiniartutut eqqartuunneqassaaq kinaluunniit, suliassani naalagaaffiup isumannaatsuuneranut imaluunniit naalagaaffinnut allanut tunngatillugu pisinnaatitaaffiit tunngasuteqartuni imaluunniit suliassani inuiaqatigiit aningaasaqarnikkut nunani allani soqutigisaannut anertuunut tunngasuteqartuni naalagaaffiup isumaqatigiissutissatut piareersaatai isertuussat, siunnersioqatigiinneri imaluunniit aalajangiineri pillugit paasissutissanik piaaraluni mianersuaalliorluniluunniit killuutiginnittoq imaluunniit ingerlatitseqqiisoq, aamma kinaluunniit allagartamik uppersaammik imaluunniit pigisamik sumilluunniit, naalagaaffiup isumannaatsuuneranut imaluunniit naalagaaffinnut allanut tunngatillugu pisinnaatitaaffiit pingaarutilimmik, piaaraluni imaluunniit mianersuaalliorluni peqquserlulluni allanngortitsisoq, aserorterisoq imaluunniit piaasoq.

Imm. 2. Naalagaaffiup illersorneqarnissaanut akerlilersuisutut eqqartuunneqassaaq kinaluunniit taamaaliornissamut akuersissummik pisariaqartumik pigisaqarani illersornissamut sakkutooqarfinni sanaartukkanik tamanit orninneqarsinnaanngitsunik piaaraluni mianersuaalliorluniluunniit allaaserinnittoq, assiliisoq imaluunniit allatut ittumik iliuuseqarluni assilisaqartoq, imaluunniit allaaserisanik assilisanilluunniit taamaattunik amerlasuunngortitsisoq imaluunniit tamanut saqqummiussisoq.

§ 26. Naalagaaffiup nunanut allanut pissussaaffinik ajoqusiisutut eqqartuunneqassaaq kinaluunniit, aalajangersakkanik inerteqqutinilluunniit, inatsit naapertorlugu naalagaaffiup Naalagaaffinnut Peqatigiinnut ilaasortaasutut pisussaaffinik naammassiniaaneranut atuuttusanngortitanik, piaaraluni mianersuaalliorluniluunniit unioqqutitsisoq.

Kapitali 8

Nunap naalakkersuinikkut aaqqissuussineranut naalagaaffimmilu oqartussaasunut qullersanut pinerluutit, peqqarniisaarniarneq il.il.

§ 27. Pikitsitsisutut eqqartuunneqassaaq kinaluunniit, pissaanermik atuinikkut imaluunniit siorasaarinikkut iliuuseqartoq, naalakkersuinikkut aaqqissuussinerup allanngortinneqarnissaannik imaluunniit atorunnaarsinneqarnissaannik siunertaqartumik imaluunniit Folketingip imaluunniit Inatsisartut akornusersugaanatik suliaminnik suliaqarsinnaanerannik akornusiiniarluni iliuuseqartoq.

§ 28. Peqqarniisaarniartutut eqqartuunneqassaaq kinaluunniit, nunap inuinik annilaartitserujussuarniarluni imaluunniit eqqunngitsumik pissuseqarluni Kalaallit Nunaanni, Danmarkimi, Savalimmiuni imaluunniit nunani allani pisortanik imaluunniit naalagaaffiit akunnerminni suleqatigiiffiannik pinngitsaaliilluni iliuuseqartitsiniarluni imaluunniit iliuuseqanngitsoortitsiniarluni imaluunniit nunap imaluunniit naalagaaffiit akunnerminni suleqatigiiffiata politikikkut, naalakkersorneqarnikkut, aningaasaqarnikkut imaluunniit inuiaqatigiittut ilusilersorneri qajannaallisarniarlugit aserorniarlugilluunniit iliuutsit ataaniittut arlaannik ataatsimik arlalinilluunniit naammassisaqartoq, iliuuseq ilusimigut imaluunniit piliarineqarami ataqatigiinnermigut nunamik imaluunniit naalagaaffiit akunnerminni suleqatigiiffiannik annertuumik ajoqusiisinnaappat:

- 1) Toqutsineq § 86 imm. 1 naapertorlugu.
- 2) Nakuuserneq peqqarniitsoq § 88, oqaaseqatigiit siulliit naapertorlugit.
- 3) Kiffaanngissusiiaaneq § 92, oqaaseqatigiit siulliit naapertorlugit.
- 4) Angallannermi ataatsimoorussamik angallatit nalinginnaat il.il. ingerlanneqarnerannik piaaraluni ajoqusersuineq § 67, imm.1 naapertorlugu, imaluunniit § 113, imm. 1 naapertorlugu piaaraluni annertuumik aserorterineq, inatsisinik unioqqutitsinerit tamakku imatut pippata inuit inuunerannik

navialisitsillutik imaluunniit aningaasarpaalussuarnik ajunaaruteqartitsillutik.

- 5) Angallannermi angallatinik tiguaaneq § 69 naapertorlugu.
- 6) Sakkut pillugit Kalaallit Nunaannut inatsimmik unioqqutitsinerit peqqarniitsut.
- 7) Peqqarniitsumik aamma piaaraluni ikuallatsitsineq § 65, imm. 1 naapertorlugu, qaartitsineq, silaannaat akuinik ajoqusiisinnaasunik siaruaaneq, qarsutsineq, umiianneq imaluunniit angallatinik ajutoorneq alla § 66-imi oqaaseqatigiit siulliit naapertorlugit, imermik pilersuinerimik piaaraluni saassussineq § 67, imm. 2 naapertorlugu, piaaraluni peqqissutsimullu navialisitsisumik pigisanik mingutsitsineq tamanut siammaattussanngortussatut siunertaasoq il.il. § 64, imm. 3 naapertorlugu.
- 8) § 68 naapertorlugu sananeqaatinik radioaktivusunik il.il. pigisaqarneq imaluunniit atuineq.

Imm. 2. Taamatorpiaq eqqartuunneqassaaq kinaluunniit, imm. 1-imi taaneqartutut siunertaqarluni sakkunik imaluunniit qaarsinnaasunik angallassisoq.

Imm. 3. Aammattaq taamatorpiaq eqqartuunneqassaaq kinaluunniit, imm. 1-imi taaneqartutut siunertaqarluni iliuutsinik imm. 1-imi 2-milu taaneqartunik iliuuseqarniarluni sioorasaarisoq.

§ 29. Peqqarniisaarniarnermut attuumassuteqartumik iliuuseqarsimasutut eqqartuunneqassaaq kinaluunniit, iliuuseq § 28-mi ilanngunneqarsimanngikkaluartoq, nr. 1-imiit 6-imut taaneqartut arlaannik iliuuseqartoq.

- 1) § 65, imm. 1-imik, §§ 66, 67-imik imaluunniit § 69-imik, § 86, imm. 1-imik, §§ 88, imaluunniit § 89-imik, § 90, imm. 2-mik, §§ 96-imik, 112-imik, imaluunniit § 112, imm. 1-imik unioqqutitsineq, iliuuserisaq tassaasimappat silaannakkut angallatinik inatsisinik unioqqutitsinikkut tiguaaniartarnermik akiuiniarneq pillugu isumaqatigiissummi 16. december 1970-imeersumi artikel 1-imik unioqqutitsineq, inuunnaat silaannakkut isumannaatsumik angallanneqartarnissaannik inatsisinik unioqqutitsinikkut navialisitsinissamik akiuiniarneq pillugu isumaqatigiissummi ulloq 23. september 1971-imeersumi artikel 1-imik unioqqutitsineq imaluunniit tassaasimappat mittarfinni, nunat tamalaat akornanni inuinnarnik silaannakkut angallassisunik sullissisuni, inatsisinik unioqqutitsinikkut nakuuserniartarnermik akiuiniarneq pillugu isumaqatigiisutigisami 24. februar 1988-imeersumi artikel II-mik unioqqutitsineq.
- 2) § 65, imm. 1-imik, § 66-imik, § 67, imm. 1-imik, § 86, imm. 1-imik, §§ 88-imik, imaluunniit 89-imik, § 90, imm. 2-mik, § 91-imik, § 92, oqaaseqatigiinni siullernik, § 98-imik, imaluunniit § 113, imm. 1-imik unioqqutitsineq, iliuuserisaq tassaappat inuit nunat tamalaat akornanni immikkut illersugaasut, matumani ilanngunneqarlutik naalagaaffiup sinniisusut aallartitat, pinerluffigineqarnissaannik pinaveersaartitsineq pillugu pinerluffiginninnernullu pillaatissiisarnerit pillugit isumaqatigiissummi 14. december 1973-imeersumi artikel 2-mik unioqqutitsineq.
- 3) § 92-imi oqaaseqatigiinni siullernik unioqqutitsineq, iliuuserisaq tassaappat sallunaveeqqutitut tiguaasarnermik akiuiniaaneq pillugu nunat tamalaat akornanni isumaqatigiissummi 17. december 1979-imeersumi artikel 1-mik unioqqutitsineq.
- 4) § 65, imm. 1-imik, § 66-imik, § 67, imm. 2-mik, § 68-imik, § 86, imm. 1-imik, §§ 88-imik, 91-imik, 98-imik, 102-mik, 104-mik, 105-imik, 106-imik, 108-mik, 112-imik, imaluunniit 113, imm. 1-imik unioqqutitsineq, iliuuserisaq tassaappat atomimik atortussianik timitalimmik illersuinissaq pillugu IAEA-isumaqatigiissummi 26. oktober 1979-imeersumi (Nunat tamalaat akornanni atomimik nukissiuuteqarneq pillugu isumaqatigiisut) artikel 7-imik unioqqutitsineq.
- 5) § 65, imm. 1-imik, §§ 66-imik, 67-imik imaluunniit § 69-imik, § 86, imm. 1-imik, § 88-imik imaluunniit § 90, imm. 2-mik, §§ 91-imik, 98-imik, 112-imik imaluunniit § 113, imm. 1-imik unioqqutitsineq, iliuuserisaq tassaappat imaatigut angallannermik isumannaatsuutitsinissamut akerliusumik inatsisinik unioqqutitsilluni iliuutsinik akiuinissaq pillugu isumaqatigiissummi 10. marts 1988-imeersumi artikel 3-mik unioqqutitsineq imaluunniit tassaappat qilleriviit immapp naqqani nunavimmut aalajangersukkat isumannaatsuunissaannut inatsisinik unioqqutitsisarnernik akiuiniarneq pillugu isumaqatigiissummi 10. marts 1988-imeersumi artikel

2-mik unioqqutitsineq.

- 6) § 52, imm. 1-imik, §§ 66-imik, 67-imik, 69-imik, § 86, imm. 1-imik, §§ 88-imik, 89-imik, § 90, imm. 2-mik, § 94 imaluunniit § 113, imm. 1-imik unioqqutitsineq, iliuuserisaq tassaappat peqqarniisaarluni qaartartumeerisarnernik akiuiniarneq pillugu nunat tamalaat akornanni isumaqatigiisummi 15. december 1997-imeersumi artikel 2-mik unioqqutitsineq.

§ 30. Peqqarniisaarnermik imaluunniit iliuutsinik tamatumunnga attuumassuteqartunik aningaasalersuisutut eqqartuunneqassaaq kinaluunniit

- 1) aningaasatigut toqqaannartumik toqqaannanngitsumilluunniit tapersersuisoq,
- 2) aningaasanik toqqaannartumik toqqaannanngitsumilluunniit pissarsiortoq imaluunniit katersuinaasitsisoq, imaluunniit
- 3) aningaasanik, pisuussutaatinik allanik imaluunniit aningaasatigut assigisaatigulluunniit toqqaannartumik toqqaannanngitsumilluunniit atugassaqaartitsisoq
- 4) inummut, eqimattanut imaluunniit peqatigiinnut § 28-mi imaluunniit § 29-mi taaneqartunik iliuuseqartunut imaluunniit iliuuseqarniartunut.

§ 31. Peqqarniisaarniaqatissaminik ilassarsiortutut imaluunniit tamatumunnga attuumassuteqartumik iliuuseqartutut eqqartuunneqassaaq kinaluunniit, iliuutsinik § 28-mi imaluunniit 29-mi taaneqartunik iliuuseqartitsisimasoq imaluunniit iliuuseqartitsiniarsimasoq imaluunniit eqimattanut imaluunniit peqatigiinnut ilanngutsitsisimasoq, eqimattat imaluunniit peqatigiit taamatut iliuuseqarnissaannik kaammattorniartugit.

Imm. 2. Taamatorluinnaq eqqartuunneqassaaq kinaluunniit, iliuutsinik § 30-mi taaneqartunik iliuuseqartitsisimasoq imaluunniit iliuuseqartitsiniarsimasoq imaluunniit eqimattanut imaluunniit peqatigiinnut ilanngutsitsisimasoq, eqimattat imaluunniit peqatigiit taamatut iliuuseqarnissaannik kaammattorniartugit.

Imm. 3. Taamatuttaaq eqqartuunneqassaaq kinaluunniit, iliuutsinik § 28-mi imaluunniit § 29-mi taaneqartunik iliuuseqarnissamut ilassarsiartissimasoq.

§ 32. Peqqarniisaarnissamut ilinniartitsisutut imaluunniit tamatumunnga attuumassuteqartumik iliuuseqartutut eqqartuunneqassaaq kinaluunniit, inummik sungiusaasoq, ilitsersuisoq imaluunniit allatut iliorluni ilinniartitsisoq iliuutsinik § 28-mi imaluunniit 29-mi taaneqartunik iliuuseqartitsiniarluni imaluunniit iliuuseqarnissamut kaammattuisoq, naak ilisimagaluarlugu inuup ilisimalikkani siunertamut tamatumunnga atussamaarai.

Imm. 2. Taamatorluinnaq eqqartuunneqassaaq kinaluunniit, inummik sungiusaasoq, ilitsersuisoq imaluunniit allatut iliorluni ilinniartitsisoq iliuutsinik § 30-mi taaneqartunik iliuuseqartitsiniarluni imaluunniit iliuuseqarnissamut kaammattuisoq, naak ilisimagaluarlugu inuup ilisimalikkani siunertamut tamatumunnga atussamaarai.

Imm. 3. Taamatuttaaq eqqartuunneqassaaq kinaluunniit iliuutsinik § 28 –mi imaluunniit § 29-mi taaneqartunik iliuuseqarnissaaq siunertarlugu sungiusartittoq, ilitsersortittoq allatulluunniit ilinniartinneqartoq.

§ 33. Peqqarniisaarnermut peqataasutut eqqartuunneqassaaq kinaluunniit, inuup, eqimattat imaluunniit peqatigiit, §§ 28-mi, 29-mi, 30-mi, 31-mi imaluunniit 32-mi taaneqartunik iliuuseqartut imaluunniit iliuuseqassamaartut, sulissutiginninnerannik iluaqusersuisoq.

§ 34. Peqqarniisaarnermut inatsisit unioqqutillugit ikiuisutut eqqartuunneqassaaq kinaluunniit, iliuuseq §§ 28-33-mi taaneqartunut ilaangikkaluartoq, immikkoortoqatigiinnut, eqimattanut imaluunniit peqatigiinnut, nakuuserlutik pisortat susassaqaarfiinut sunnuteqarnissaminik imaluunniit inuiaqatigiit aaqqissuussaananerannik akornusiiniarlutik siunertaqartunut, peqataasoq imaluunniit

aningaasatigut annertuumik ikiuisoq imaluunniit allatigut annertuumik ikiuisoq.

§ 35. Sakkutooqarnikkut inatsisinik unioqquitsilluni suliaqarnermut eqqartuunneqassaaq kinaluunniit, iliuuseq §§ 28 - 34-mi taaneqartunut ilaangikkaluartoq, inatsisinut akerliusumik sakkutooqarnerup tungaatigut aaqqissuussaanermut imaluunniit eqimattanut peqataasoq.

§ 36. Qinersinermik innarliisutut eqqartuunneqassaaq kinaluunniit Folketingimut, Inatsisartunut imaluunniit siunersuisoqatigiinnut kommunineersunut pisortaniilluunniit allaneersunut imaluunniit pisortanut qinersinermik akornusiisoq, imaluunniit qinersinerup inerneranik allanngortitsisoq imaluunniit kisitsinermik ajornarsititsisoq.

Imm. 2. Taamatut eqqartuunneqassaartaaq kinaluunniit taamatut pisinnaatitaanani qinersinermi imm. 1-mi taaneqartumi taaseqataasoq imaluunniit allanik taaseqataatitsisoq.

Imm. 3. Pinerluummut tamatumunngarpiq eqqartuunneqassaaq kinaluunniit qinersiniarluartumik peqquserlunnikkut qinersinngitsoortitsisoq, imaluunniit taassuma taasineranik atorsinnaajunnaartitsisoq imaluunniit siunertaasumiit allaanerulersitsisoq, aamma kinaluunniit qinersinermi qullersatut inissitaanerminik atornerluisoq imaluunniit pisuussutitigut iluaqutissanik tunisisoq, neriorsuisoq neqerooruteqartorluunniit inuup aalajangersimasumik qinersinissaa imaluunniit qinersinnginnissaa sunniteqarfiginiarlugu, aamma kinaluunniit taamatorpiaq pissuteqarluni iluaqutissamik tigusaqartoq.

Kapitali 9

Pisortat oqartussaataannut pinerluttuliornerit

§ 37. Pisortat oqartussaataannik narrunarsaasutut eqqartuunneqassaaq kinaluunniit nakuuserluni imaluunniit nakuusernissamik siorasaarluni imaluunniit asissuilluni, oqaasipilulluni imaluunniit allatut ajallaataasumik oqalulluni saassussisoq inummik, pisortani kiffartuumminik imaluunniit suliasaminik imaluunniit tamakkununga atatitamik suliaqartilluni iliuuseqarnissaminut pisussaaffeqartumik.

§ 38. Akiliilluni peqquserlutsisiniartutut eqqartuunneqassaaq kinaluunniit, taamatut iliorsinnaatitaanani inummik kalaallit, savalimmiormiut, qallunaat, nunat allamiut imaluunniit naalagaaffiit pisortaannik kiffartuussisumut atorfeqartitamulluunniit tunissuteqarnissaminik allatulluunniit iluaqutissiinnissaminik neriorsuisoq imaluunniit neqerooruteqartoq, pineqartoq kiffartornerani arlaannik iliuuseqartinniarlugu iliuuseqanngitsoortinniarluguluunniit.

§ 39. Inatsisinik maleruaasitsiniarnermik innarliisutut eqqartuunneqassaaq kinaluunniit,

- 1) inummik tiguakkamik, tigummigallarneqartumik imaluunniit pinngitsaalillugu inissitamik aniguisitsisoq aamma kinaluunniit, inuup taamaattup qimaanissaanut kajumissaaresoq ikiuisorluunniit imaluunniit qimaasumik toqqorsimatitsisoq, aamma kinaluunniit inatsisinik unioqquitsilluni inummik taamaattumik atassuteqarfiginnittoq,
- 2) inummik pinerlussimasumik persarinninnaveersaartitsisoq imaluunniit pineqaatissiissutaasimasup pineqartumut aallarnerneqarnissaanik akornusiisoq, toqqorsimatillugu imaluunniit qimaanissaanik ikiorlugu, imaluunniit
- 3) pigisanik pisortat misissuinissaannut pingaaruteqartunik aserorterisoq, allanngortitsisoq imaluunniit piiassoq imaluunniit pinerluummut takussutissanik suujunnaartitsisoq.

Imm. 2. Taamaattorli imm. 1, nr. 2 aamma nr. 3 naapertorlugit akisussaatinneqassanngilaq kinaluunniit imminut qaniginerpaasamiluunniit arlaannik persarinninnaveersaartitsisoq.

§ 40. Nunagisap illersorneqarnissaanut aaqqissuussinermik akerlilersuisutut eqqartuunneqassaaq kinaluunniit sakkutuujusussaatitap sakkutuunngunngitsoorneranut pisooqataasoq, imaluunniit sakkutuujusussat imaluunniit inuit sakkutooqarnikkut illersuinissamut ilaasut naalaalliornissaannut

kajumissaaresoq.

§ 41. Qinersinerup isertuunneqarnissaanik aamma pisortani isumaqatigiinniarnertit allanut tusartinneqannginnissaannik ajoqusiisutut eqqartuunneqassaaq kinaluunniit qinersinermi iliuutsinik taasinernillu, § 36-mi eqqartorneqartunik, imaluunniit pisortani isumalioqatigiissitat pisortalluunniit isumaqatigiinniutaannik allanut tusarliuteqqusaanngitsumik taamatut pisinnaatitaanani tamanut nalunaaruteqartoq.

§ 42. Pisortatut oqartussaataitaanermik imaluunniit suliamik inatsisit unioqqutillugit ingerlatsisimasutut eqqartuunneqassaaq kinaluunniit, pisortani oqartussaataitaanermik imaluunniit piginnaatitaanermik piginngisaminik peqarnerartoq, imaluunniit pisortani oqartussaanermik piginngisaminik allatut ittumik iliuuseqartoq. Taamatuttaaq pineqassaaq kinaluunniit piginnaatinneqartussaalluni pisortanit piginnaatinneqarani taamatut suliaqartoq imaluunniit suliamik ingerlatsisinnaanermik piiaaffigineqarsimalluni ingerlatseqqittoq.

§ 43. Ilisarnaatinik immikkut illersukkanik atornerluisutut eqqartuunneqassaaq kinaluunniit piaaraluni mianersuaalliorluniluunniit inatsisinut akerliusumik atuisoq

- 1) ilisarnaatinik imaluunniit atisanik, naalakkersuisuni atorfilinnut kalaallinut, qallunaanut, savalimmiormiunut imaluunniit nunani allamiunut imaluunniit sakkutooqarfimmi atorfilinnit atugassaataitaasunik,
 - 2) ilisarnaatinik imaluunniit taaguutinik, taamaallaat inunnut, aaqqissuussanut imaluunniit atortussanut, sorsunnermi ikilikkanik napparsimasunilluunniit ikiuinissamut atorneqartussanut, atugassaataitaasunik, imaluunniit
 - 3) naalagaaffiit akunnerminni suleqatigiiffiisa ilisarnaataannik imaluunniit taaguutaannik.
- Imm. 2* Aalajangersagaq imm. 1-miittoq taamatulli atuutissaaq ilisarnaatinik, atisanik aamma taaguutinik taaneqartunik issuaalluni atuinermi.

Kapitali 10

Inuit torersumik eqqissisimasumillu inooqatigiinnerannut pinerluttuliornerit

§ 44. Inatsisit unioqqutillugit kalerrisaarisutut eqqartuunneqassaaq kinaluunniit pissutissaqarani ikiortissamik aggeqqusinermigut, navialinermi kalerrisaarummik atornerluinermigut imaluunniit assingusumik iliuuseqarnermigut annaassiniaannermik aallartitsisoq.

§ 45. Navianartorsiortitsisumik aalakoortutut eqqartuunneqassaaq kinaluunniit piaaraluni imaluunniit peqqarniitsumik mianersuaalliorluni imminut aalakoortittoq imaluunniit allanik aalakoortitsisoq taamaaliornermigullu inuit allat inuunerannik imaluunniit pigisanik annertuumik nalilinnik navialisitsisoq.

§ 46. Immikkut ittumik illersukkamik eqqissisimatitaanermik nalinginnaarinnittutut eqqartuusneqassaaq kinaluunniit ilerrup innarlitsaaliorneqarnissaanik nalinginnaarinnittoq imaluunniit timimik toqungasumik imaluunniit oqaluffinni pigisanik oqaluffinnilu atorneqartartunik imaluunniit eqqaassutissanik assigisaannillu assuarnartumik ikkatiginnittoq.

§ 47. Pinerluummik akornusiisimanngitsutut eqqartuunneqassaaq kinaluunniit, pinerluuteqarniaannermik, inuit inuunerannik imaluunniit atugarissaarnissaannik imaluunniit inuiaqatigiit naliliutaannik annertuumik navialisitsisumik, ilisimannilluni pisinnaanani tamaat iliuuseqanngitsoq pinerlunneq tamatumaluunniit nassatarisai pinngitsoortinniarlugit. Tamannali atuutissanngilaq pineqartup iliuuseqarnermigut nammineq qaniginerpaasamiluunniit inuunerat, peqqissusaat atugarissaarneralluunniit navialisissappagu. Taamaallaat akisussaatisisoqassaaq pinerluutiginiagaq naammassineqarpat imaluunniit naam-

massiniarneqaraluarpat.

Imm. 2. Taamatut eqqartuunneqassaaq kinaluunniit kajumissaarneqaraluarluni pisortani oqartussaasumik ikiuinngitsoq, ajutoormik pinerlunnermilluunniit, inuit allat inuunerannik atugarissaarnissaannilluunniit navialisitsisumik, pinngitsoortitsilluni.

Imm. 3. Aalajangersakkat imm. 1-imiittut atuutissapputaaq kimulluunniit, pissutsinik inuup pinerluummut pasillerneqartup eqqartuunneqarsimasulluunniit pinngitsuuneranik tapersiutaasumik ilisimatitsinngitsoortumut.

Kapitali 11

Pisortani kiffartuussinermi imaluunniit atorfeqarnermi pinerluttuliornerit

§ 48. Akiliutinik peqquserlutsitsiniutinik tigusaqarsimasutut eqqartuunneqassaaq kinaluunniit kalaallit, qallunaat, savalimmiormiut, nunani allamiut imaluunniit naalagaaffiit assigiinngitsut pisortaanni kiffartorluni imaluunniit suliaqartitaalluni tunissummik allatulluunniit iluaqutissaasumik taamaaliortussaanani tunissutisisoq, tunineqaqqusoq imaluunniit neriorsoqqusoq.

§ 49. Pisortani oqartussaatitanik atornerluisutut eqqartuunneqassaaq kinaluunniit, pisortani kiffartuussilluni suliaqartitaalluniluunniit atorfimminik atornerluisoq, inuinnaat imaluunniit pisortat eqqortumik pisassarisaannik soqutigisaannilluunniit ajoqusiinialuni.

§ 50. Atorfimmi paasisanik nipangiussisussaanermik unioqqutitsisutut eqqartuunneqassaaq kinaluunniit pisortani kiffartuummik imaluunniit suliamik suliaqarluni suliaqarsimalluniluunniit paasisanik isertuutassanik tamatumunnga atatillugu ilisimalersimasaminik taamaaliortussaanani allanut ingerlatitseqqiisoq imaluunniit atornerluisoq.

Imm. 2. Taamatut aamma eqqartuunneqassaaq kinaluunniit pisortaniit akiliutinik peqquserluttinik akilersinneq imaluunniit iluarisaaneq naapertorlugu suliamik imaluunniit inuussutissarsiummik ingerlatsisoq imaluunniit ingerlatsisimasoq, aamma paasissutissanik, inuinnaat soqutigisaat pillugit allanut isertuussassaasunik aamma sulinerminut atatillugu ilisimalersimasaminik, taamaaliorsinnaatitaanani allanut ingerlatitseqqiisoq imaluunniit atornerluisoq.

Imm. 3. Paasissutissaq isertuussassaavoq inatsisikkut imaluunniit allamik atuuttumik aalajangersakkakut taamaattussatut oqaatigineqarsimaguni imaluunniit isertuuttariaqaruni pisortat inuinnaalluunniit soqutigisaat isumagiumallugit.

§ 51. Aalajangersagaq § 50-imiittoq assinganik atuutissaaq kimulluunniit suliassanik, pisortat isumaqatigiissuteqarfigalugit suliarineqartunik, suliaqartumut imaluunniit sulisimasumut. Tamannarpi-aq atuuppoq kimulluunniit oqarasuaatitigut attaveqaatinik imaluunniit oqarasuaatitigut kiffartuussinernik, pisortanit akuerisanik, tuniniaasartumi sulisumut imaluunniit sulisimasumut.

§ 52. Aalajangersakkat §§ 50 aamma 51-imiittut aamma atuupput inuit pineqartut ikiortigisaannut.

§ 53. Aalajangersakkat §§ 50 - 52-imiittut taamatut atuupput kimulluunniit, iliuuseqarmermut peqataanngikkaluarluni

- 1) paasissutissanik, inatsisinik unioqqutitsinikkut taaneqartukkut saqqummersunik, taamaaliorsinnaatitaanani pissarsisoq imaluunniit atornerluisoq,
- 2) inuit ataasiakkaat inuttut atugaat, §§ 50 – 52-imik unioqqutitsinermi saqqummersut, pillugit taamaaliorsinnaatitaanani allanut ingerlatitseqqiisoq, imaluunniit
- 3) paasissutissanik, naalagaaffiup isumannaatsuunissaa imaluunniit illersorsinnaanissaa pissutigalugit isertuussaasunik, taamaaliorsinnaatitaanani allanut ingerlatitseqqiisoq.

§ 54. Aalajangersakkat §§ 50 – 53-imiittut atuutinngillat pineqartoq

- 1) paasissutissamik allanut ingerlatitseqqiinissamut pisussaappat, imaluunniit
- 2) ersarissumik tamanut iluaqutissaq imaluunniit imminermi allanulluunniit pitsaanerusussaq tungavissaqartumik isumagalugit iliuuseqarpat.

§ 55. Atorfimmini suliassanik isumaginninngitsutut eqqartuunneqassaaq kinaluunniit, pisortani kiffartorluni sulitilluniluunniit pisussaaffimmik, kiffartuutimi suliassamiluunniit nassatarisaanik, naammassinnikkumanngitsoq ilaginnaasorluunniit imaluunniit atorfimmini eqqortumik naalakkerneqarnermi naalakummanngitsoq.

Imm. 2. Taamatuttaaq eqqartuunneqassaaq kinaluunniit pisortani atorfartitaalluni suliassaartitaalluniluunniit atorfimminik suliassarissaminillu imaluunniit pisussaaffimminik, atorfimmi suliassaartitaanermiluunniit nassatarisaanik, naammassinninnissaminik peqqarniitsumik akuttunngitsumillu isumaginninngitsoortaattaartoq imaluunniit peqqissaarussinngitsoortoq.

Imm. 3. Imm. 1 aamma 2 atuutinngillat suliassanut, pineqartup tamanut ammasumik qinersinikkut suliassarilersimasaanut.

Kapitali 12

Eqqunngitsumik nassuiaaneq aamma eqqunngitsumik unnerluussineq

§ 56. Eqqunngitsumik nassuiaasutut eqqartuunneqassaaq kinaluunniit piaarluni imaluunniit mianersuaalliorujussuarluni eqqartuussivimmi, matumani ilanngunneqarluni oqarasuaatitigut attaveqaatinik atuineq, eqqunngitsumik nassuiaasoq. Aalajangersagaq aamma atuutissaaq nunami allami eqqartuussivimmi imaluunniit Europamiut Kattuffianni Eqqartuussivimmi eqqunngitsumik nassuiaanermi.

Imm. 2. Tamannali atuutissanngilaq pinerlunnermik suliassami pasineqartoq imaluunniit inuk eqqunngitsumik nassuiaappat inatsisit naapertorlugit nassuiaateqarnissaaq piumasarineqarsinnaanani killisiuisoqartillugu.

§ 57. Eqqunngitsumik nalunaaruteqartutut eqqartuunneqassaaq kinaluunniit, pissutsit pinngitsoorani nassuiaateqarfigisassani pillugit pisortanut eqqunngitsumik nalunaaruteqartoq imaluunniit eqqartuussinermi pissutsini, pisortanut tunngassuteqartuni, atugassanik allakkatigut imaluunniit tusagassiutitigut atuarneqarsinnaasukkut allakkut eqqunngitsumik nalunaaruteqartoq imaluunniit ilisimasaqarfiginngisaminik uppersaasoq.

§ 58. Eqqunngitsumik unnerluussinermut eqqartuunneqassaaq kinaluunniit pisortanut eqqunngitsumik paasissutissiisoq, pisunngitsup pinerluummut, pineqartup pinerluutigisimanngisaanut, tamatumuunakkut pasilligaalernissaa eqqartuussaanaaluunniit siunertaralugu.

Imm. 2. Pinerluummut tamatumunngarpiaq eqqartuunneqassaaq kinaluunniit uppersaatisanik aserorterisoq, allannortitsisoq imaluunniit piiaasoq imaluunniit eqqunngitsumik uppersaatisiisoq, inuup pinerluummut tamatumuunakkut pasilligaalernissaa eqqartuunneqarnissaaluunniit siunertaralugu.

Imm. 3. Taamatorpiaq pineqassaaq kinaluunniit imm. 1-imi aamma 2-mi taaneqartutut ittunik iliuuseqartoq, siunertaralugu nammeneq imaluunniit allap akuersisimasup, pinerluummut, pinerluutigisimanngisaminut, tamatumuunakkut pasilligaanissaa imaluunniit eqqartuunneqarnissaa.

§ 59. Eqqunngitsumik nalunaarutiginninnermut eqqartuunneqassaaq kinaluunniit pisortanut pinerluummik pisimanngitsumik nalunaaruteqartoq imaluunniit pisortanut taamaattunut maalaarummik eqqunngitsumik tunniussisoq.

Kapitali 13

Aningaasatigut pinerluttuliornerit

§ 60. Peqquserluutinin aningaasaliormut eqqartuunneqassaaq kinaluunniit aningaasanik issuaalluni pilersitsisoq imaluunniit peqquserlulluni aningaasaliortoq aningaasavittut atortinniarlugit, imaluunniit assinganik anguniagaqarluni aningaasanik issuaalluni pilersitanik imaluunniit aningaasalianik peqquserluutinin imminut pissarsitittoq imaluunniit allanut pissarsititsisoq.

Imm. 2. Taamatuttaaq pineqassaaq kinaluunniit aningaasanik atuisoq nalunagu ilimagigaluarlugu luunniit taakku issuaalluni pilersitaasut imaluunniit peqquserluutaasut.

Kapitali 14

Uppernarsaatissatigut pinerluttuliornerit

§ 61. Allagartanik uppersarsaatissanik atornerluinermut eqqartuunneqassaaq kinaluunniit inatsisitigut pissutsini nakutitsiniaalluni

- 1) allagartamik uppersarsaatissamik salloqittaammik atuisoq,
- 2) allagartamik uppersarsaatissamik atuisoq, allagartamut uppersarsaatissamut allamut paatsoortitsinikkut atsiortitsisoqarsimappat imaluunniit allagartamut atsiortussap atsiorniagaaniit allaanerusumik imaqtartumut atsiortitsisoqarsimappat,
- 3) allagartamik uppersarsaatissamik piviusumik inuttassaviginngisaanut atortinnagu inummut allamut tunngatillugu atuisoq imaluunniit allagartami uppersarsaatissami aalajangiussamut akerliusumik al-latut atuisoq.

Imm. 2. Allagartaq uppersarsaatissaq tassaavoq allakkatigut imaluunniit elektroniskimik paasititsissut pilersitsisumit taaguuserneqarsimasoq, uppersarsaatissatut atugassatut isikkoqartoq.

Imm. 3. Allagartaq uppersarsaatissaq salloqittaataavoq pilersitsisutut taaneqartumeersuunngikkuni imaluunniit imaqalersinneqarsimaguni pilersitsisumit pisuunngitsumik.

§ 62. Allagartamik uppersarsaatissamik ilumuunngitsuliornermut eqqartuunneqassaaq kinaluunniit inatsisitigut pissutsini nakutitsiniaalluni allagartami uppersarsaatissami imaluunniit allattaavimmi pisortanit pigineqartumi, allagartami uppersarsaatissami imaluunniit allattaavimmi inuinnarnit pigineqartumi, inatsisit naapertorlugit imaluunniit immikkut ittumik pisussaaitaaneq najoqqutaralugu pineqartup suliaasaani imaluunniit allattuiffissaani, imaluunniit nakorsap uppersarsaasiaani imaluunniit allagartami uppersarsaatissami assingusumi pissutsit, nalunaarutigisap uppersarsaatitut atuuffissai, pillugit ilumuunngitsumik nalunaaruteqartoq.

Imm. 2. Taamatut aamma pineqassaaq allagartamik uppersarsaatissamik taamaattumik ilumoor-tuuneraalluni inatsisitigut pissutsini atuisoq.

§ 63. Nalunaaqutsiussamik peqquserluttuliummik atuisutut eqqartuunneqassaaq kinaluunniit niueqatigiinnermi nakutitsiniaalluni atuisoq pigisanik, pisortat imaluunniit inuinnaat naqitsisaannik akuerisaanngitsumik naqissusikkanik imaluunniit nalunaaqutsiussamik imaluunniit taaguummik, pigisat niueqatigiinnermi pingaaruteqartoq pillugu paasissutissatut atugassatut pilerneqarsimasumik aamma kinaluunniit assinganik iliuuseqarluni atuisoq pigisanik, akuerisaasumik naqissusikkanik, nalunaaqutsikkanik imaluunniit taaguutaat allannqortinneqarsimasunik piiarneqarsimasunilluunniit.

§ 64. Uppersarsaatissanik atuinngitsoortitsiniartutut eqqartuunneqassaaq kinaluunniit uppersarsaatissanik aserorterisoq, allannqortitsisoq imaluunniit uppersarsaatissamik, inatsisitigut pissutsini taamatut atorneqarnissaminut piukkunnartumik, tamakkiisumik ilaannakortumiluunniit atorsinnaajun-naarsitsisoq.

Imm. 2. Taamatut aamma pineqassaaq kinaluunniit, pisimasoq imm. 1-imi pineqartunut ilaangikkaluartoq, nunaatip allallu assigisaasa killingisa nalunaarutigineqarnerannik allannqortitsisoq.

Kapitali 15

Pinerluttuliornerit tamanut navianaatillit

§ 65. Ikuallatsitsisutut eqqartuunneqassaaq kinaluunniit piaaraluni mianersuaalliorluniluunniit inuup allap illuutaanik ikuallatsitsisoq imaluunniit piaaraluni mianersuaalliorluniluunniit illumik nammineq pigisamik ikuallatsitsinikkut allat inuunerannik imaluunniit inuiaqatigiit pigisaannik naleqqortuunik navialisitsisoq.

Imm. 2. Assinganik eqqartuunneqassaaq kinaluunniit ikuallattoornissamut sillimmasiisarfik salloqittarniarlugu imaluunniit qularnaveeqqusiussamik pigisaqartup pisinnaatitaaffii ajoquserniarlugit imaluunniit assingusumik inatsisinut akerliusumik anguniagaqarluni illumik nammineq pigisaminik imaluunniit illumik allap pigisaanik piginnittua akuersisillugu ikuallatsitsisoq.

§ 66. Ajoquseritsisutut eqqartuunneqassaaq kinaluunniit inunnik allanik imaluunniit pisuusutaatinik piaaraluni ajoqusiiniarluni qaartitsisoq, silaannaap akuinik ajoqusiutissanik siaruaasoq, qarutsitsisoq, umiartitsisoq imaluunniit angallammik allamik ajutoortitsisoq. Taamatut aamma eqqartuunneqassaaq kinaluunniit mianersuaalliorluni taamatut pinerluttoq.

§ 67. Ingerlatsinermik akornusersuisutut eqqartuunneqassaaq kinaluunniit piaaraluni imaluunniit mianersuaalliorluni tamanut angallataasartunik nalinginnaasunik aamma teknikkikkut atortunik tamanit atorneqartartunik ingerlatsinermik ingerlatsinerullu isumannaatsuuneranik akornusiisoq.

Imm. 2. Imeqarnermik pilersuineramik saassussisutut eqqartuunneqassaaq kinaluunniit piaaraluni imaluunniit mianersuaalliorluni imeqarfinnut, kuuffinnut kuunnulluunniit peqqinnissamut navianaatilinnik akoorisoq imaluunniit imissamik nalinginnaasumik amigaateqalersitsisoq.

Imm. 3. Peqqissutsimik navialisitsisumik mingutsitsinermut eqqartuunneqassaaq

- 1) kinaluunniit atortussanut, isumaqatigiinniarnermut imaluunniit arlalissuarnit atorneqartussatut naatsorsuussaasunut toqunartumik akussanilluunniit allanik piaaraluni mianersuaalliorluniluunniit akoorisoq, siunertaasutut atorneqarunik inuit peqqissusaannik navialisitsissutaasumik,
- 2) kinaluunniit piaaraluni mianersuaalliorluniluunniit, atortussat taamatut ajulermata atorneqarnerat taaneqartutut peqqissutsimut navialisitsissutaalluni, taakku ajortissimanerannut paasinaveersaartaasumik iliuuseqartoq,
- 3) kinaluunniit piaaraluni mianersuaalliorluniluunniit iliuuseqarsimanini nipangiullugu atortussanik 1-imi aamma 2-mi taaneqartutut iliuuseqarfigisanik tuniniaasoq imaluunniit siammarteriniarsarisoq.

§ 68. Qinngornernik ulorianartunik akulinnik unioqqutitsisumik pigisaqartutut eqqartuunneqassaaq kinaluunniit, inunnik allanik imaluunniit allat pigisaannik annertuunik imaluunniit avatangiisinik ajoqusiiniarluni, qinngornernik ulorianartunik akulinnik tigusoq, pigisaqartoq, tunniussisoq imaluunniit allanngortitsisoq imaluunniit atomip nukinganik qaartuujasumik imaluunniit atortumik, qinngornernik ulorianartunik akulimmik siaruarternissamut siunertaqartumik imaluunniit atomip qinngornernik siaruarterninnaasumik pilersitsisoq imaluunniit pigisaqartoq.

Imm. 2. Taamatuttaaq eqqartuunneqassaaq kinaluunniit, inunnik allanik ajoqusiiniarluni imaluunniit inuit allat pigisaannik imaluunniit avatangiisinik annertuumik ajoqusiiniarluni imaluunniit allanik pinngitsaaliilluni iliuuseqartitsiniarluni imaluunniit iliuuseqanngitsoortitsiniarluni

- 1) qinngornernik ulorianartunik akulinnik imaluunniit atortunik atomip qinngornernik aniatitsisumik atuisoq,
- 2) qinngornernik ulorianartut imaluunniit atomip qinngornernik siaruaannissaannut illersuutitik peersisoq, allanngortitsisoq imaluunniit ajoqusiisoq imaluunniit
- 3) atortumik qinngornernik ulorianartut atorlugit ingerlasumik atuisoq imaluunniit ajoqusiisoq, qinngornernik ulorianartunik aniasoqalerneranik imaluunniit taamaattoqarnissaanik ulorianartorsiornermik

kinguneqartumik.

Imm. 3. Taamatuttaaq eqqartuunneqassaaq kinaluunniit imm. 1-imi aamma 2-mi taaneqartut ilaannik mianersuaalliorluni pinerluttoq.

§ 69. Angallatinik tiguaanermut eqqartuunneqassaaq kinaluunniit timmisartumi, umiarsuarmi kiisalu angallammi ataatsimoorussami imaluunniit assartuummi unioqqutitsilluni pinngitsaaliilluni, tak. § 91, taakku nakkutigineqarnerannik tigusisoq imaluunniit taakku ingerlanneqarnerannut akuliuttoq.

Imm. 2. Taamatuttaaq eqqartuunneqassaaq kinaluunniit unioqqutitsilluni pinngitsaaliilluni, tak. § 91, imaani sulliviliap puttasuliap nakkutigineqarneranik tigusisoq.

§ 70. Nakorsaasaarnermut eqqartuunneqassaaq kinaluunniit pisortat akuersissutaannik peqarani aammalu pissutsit pisariaqavitsinnagit napparsimasunik passussisoq taamaaliornermigullu taakkua peqqissusaannik navialisitsisoq.

§ 71. Napparsimalersitsinissamut navialisitsisutut eqqartuunneqassaaq kinaluunniit najoqqutassanik, inatsisitigut imaluunniit inatsisit naapertorlugit inuit imaluunniit uumasut nappaataannik tunillanartunik pinaveersaartitsinissamut imaluunniit akiuinissamut sananeqarsimasunik, unioqqutitsinermi piaaraluni mianersuaalliorluniluunniit nappaatip taamaattup nappaataalernissaanut imaluunniit siaru-aannissaanut navialisitsisoq.

Kapitali 16

Immeraait inatsisitigut inerteqqutaasut

§ 72. Iluanaarniapilulluni immeraanermut eqqartuunneqassaaq kinaluunniit immeraanermik imaluunniit tamatuma assinganik equiniaanermik inuussutissarsiuteqarniarloq imaluunniit taamatut immeraanermik siuarsaasoq imaluunniit inimit inunnit tamanit ornigarneqarsinnaasumik immeraanermut atuissitsisoq imaluunniit inimi taamaattumi immeraatsitsisoq, aamma kinaluunniit inimi tamanit ornigarneqarsinnaasumi immeraanermi taamaattumi peqataasoq.

Imm. 2. Iluanaarniapilulluni immeraanermut eqqartuunneqassaartaaq kinaluunniit piffimmi tamanit ornigarneqarsinnaanngitsumi taamatut immeraatsitsinissamut piareersaasoq, akuersisoq peqataasorluunniit, nalunagu ilimagaluguluunniit immeraateqataasup immeraassutai aningaasaateqarneranut naleqqiullugit tulluartsuusiit illersorneqarsinnaasumiillu amerlanerusut.

Imm. 3. Namminersornerullutik Oqartussat malittarisassiorsinnaapput automatit pinnguaatit atorlugit iluanaarutit aningaasanngorlugit tunniunneqartarnissaat pillugit.

Kapitali 17

Ilaqutariissutsip iluani pinerluttuliornerit

§ 73. Kinaluunniit katissimareerluni imaluunniit nalunaarsukkamik aappaqareerluni katittoq imaluunniit aappariittut nalunaarsuissitsisoq ataasiinnaanngitsumik aappaqartutut eqqartuunneqassaaq, iliuseqartilluni piaarisimaguni imaluunniit mianersuaalliorujussuarsimaguni. Ilaquttamik qanigisamik kujanninneq allatulluunniit ittumik kinguaassiutitigut atoqatiginninneq pineqartillugit qitornavissiaqarneq toqqaannartumik aaqatigiittut pissuseqarnermut nallersuunneqassaaq.

Imm. 2. Taamatuttaaq pineqassaaq kinaluunniit, nammineq katissimanani nalunaarsukkamilluunniit aappaqarani, katissimareersumik imaluunniit nalunaarsukkamik aappaqareersumik katitaqartoq imaluunniit nalunaarsukkamik aappanittoq.

§ 74. Ilaquttatut qanigilluinnakkamik atoqateqarnermut eqqartuunneqassaaq kinaluunniit kingu-aamigut qanigisaminik imaluunniit qatanngumminik kujannittoq allatulluunniit ittumik

kinguaassiuutitigut atoqatiginnittoq.

§ 75. Ilaquttaminik inoqutiminilluunniit narrunarsaasutut eqqartuunneqassaaq kinaluunniit aap-parminik, qitornaminik imaluunniit inummik allamik oqartussaaffigisaminik isumagisassaminilluunniit imaluunniit ningaaminik sakiatsiaminillu imaluunniit siuaasatut ilaquttaminik paarsinerlulluni nikarna-saasumilluunniit pissusilersorfiginnilluni narrunarsaasoq.

Imm. 2. Taamatuttaaq pineqassaaq kinaluunniit pilersuisussaatitaanerminik imaluunniit akilersui-sussaatitaanerminik sumiginnaalluni inunnik imm. 1-imi taaneqartunik ajorsalersitsisoq.

§ 76. Angajoqqaatut oqartussaassuseqarnermik sumiginnaasutut eqqartuunneqassaaq kinaluunniit angajoqqaat imaluunniit allap susassaartup inummut 18-it inorlugit ukioqartumut oqartusaaanermik isumaginnittusaaanermilluunniit sumiginnaatitsisoq, imaluunniit pineqartup oqartusaaanermik isuma-ginninnermilluunniit taamaattumik sumiginnaaneranut ikiuisoq.

Imm. 2. Aammattaaq inatsisunik unioqqutitsilluni meeqqamik naalagaaffimmiit annissisimasoq eqqartuunneqassaaq.

Kapitali 18

Kinguaassiuutitigut pinerluttuliornerit

§ 77. Pinngitsaaliilluni atoqateqartutut pineqaatissinneqassaaq, atoqateqarsimasoq imal. allatut akuerineqarani peqateqarsimasoq. Inummik pinerluttuliorlumik allaasorinninneq tunngavigalugu pinngitsuusaarluni atoqatiginnittumut allatulluunniit kinguaassiuutitigut atornerluisumut tamanna aamma atuuppoq.

Imm. 2. Pinngitsaaliilluni atoqateqarsimasutut pineqaatissinneqassaaq, kinaluunniit meeqqamik 12-it inorlugit ukiulimmik atoqateqarsimasoq allatulluunniit kinguaassiuutitigut atoqatiginnittoq. Inummut 22-nik ukioqalereersimasumut aamma meeqqamik 15-it inorlugit ukiulimmik atoqateqartumut allatulluunniit kinguaassiuutitigut atornerluisumut tamanna aamma atuuppoq.

Imm. 3. Inatsimmik unioqqutitsineq inummut 18-it inorlugit ukiulimmut pinerluutigineqarsimappat, pineqaatissiinerup aalajangiiffigineqarnerani, inatsisip unioqqutinneqarnerani immikkut ittumik innarlineq pingaartinneqassaaq.

§ 78. Kinguaassiuutitigut atornerluinermut eqqartuunneqassaaq kinaluunniit inuup niaqulaarnera imaluunniit eqqarsartaatsimigut innarluuteqarnera atornerlullugu pineqartumut kujannittoq allatulluunniit kinguaassiuutitigut atoqatiginnittoq.

Imm. 2. Taamatuttaaq pineqassaaq kinaluunniit inuup suliaqarnikkut, aningaasaqarnikkut imaluunniit passunneqarnermik paaqqutarineqarnermilluunniit pinngitsuuisinnaanngissusianik kujannittoq allatulluunniit ittumik kinguaassiuutitigut atoqatiginnittoq. Atoqateqarniarluni allatulluunniit kinguaassiuutitigut atornerluinarluni, upperisarsiortut aqutsisuata, taassumalu ilagiivini ilaasortaasup akornanni inuup pisariaqartitsineranik imaluunniit pinngitsuuisinnaanani atassuteqarneranik, upperisarsiortut aqutsisuata ilaasortamik ingasattumik atornerluineranut tamanna aamma atuuppoq.

Imm. 3. Aammattaaq eqqartuunneqassaaq, inuk

- 1) pinerluttunik nakkutilliivimmi atorfeqartuusooq inummik pinerluttunik nakkutilliiviup suliffiutaani inissisimasumik, taassumangalu oqartussaaffigineqarluni inissisimasumik kujannittoq imaluunniit atoqatiginnittutut iliuuserinnittoq,
- 2) inummik kiffaanngissusiagaasumik politiinillu nakkutigineqartumik politiitut atorfilik kujannittoq imaluunniit allatut atoqatiginnittutut pissusilersortoq, imaluunniit
- 3) ulloq unnuarlu paaqqinnittarfimmi imaluunniit meeqqanut inuusuttunullu inissiisarfimmi, tarnikkut nakorsarneqarfittut immikkoortumi, tarnikkut annertuumik

innarluutilinnik assigisaannilluunniit ulloq unnuarlu inissiisarfimmi atorfilik imaluunniit nakkutilliisoq inissiisarfimmi inissisimasumik kujannittoq imaluunniit allatut atoqatiginnittutut pissusilersortoq.

§ 79. Kinguaassiutitigut meeqqanik atoqatiginninnermut eqqartuunneqassaaq kinaluunniit meeqqamik 15-it inorlugit ukiulimmik kujannittoq allatulluunniit ittumik atoqateqarnikkut pissusilersortoq, pinerluuteqartup meeqqap ukiui nalusimanngippagit imaluunniit tamatuma tungaatigut mianersuaalliorsimaguni, iliuuserisaq § 77, imm. 2-mut attuumatinneqanngippat.

§ 80. Atoqatiginninnissamut saasaarisutut eqqartuunneqassaaq kinaluunniit ukiumigut misilittak-kamigullu inersimanerunerminik peqqarniitsumik atornerluilluni inummik 18-it inorlugit ukiulimmik kujannittoq, pinerluuteqartup nalusimanngippagu pineqartoq qassinik ukioqartoq imaluunniit tamatuma tungaatigut mianersuaalliorluni iliorsimaguni.

Imm. 2. Taamatuttaaq eqqartuunneqassaaq kinaluunniit inummik 18-it inorlugit ukiulimmik qitor-navissiarisaminik, qitornassaminik qitornarsiaminilluunniit imaluunniit imminnerminut ilinniartitassan-ngortinneqarsimasumik perorsagassanngortinneqarsimasumillu kujannittoq allatulluunniit atoqateqarnikkut pissusilersortoq imaluunniit atassuteqarnerit kanngunarsaataasut atorlugit kannguttaalliorloq, pinerluuteqartup nalusimanngippagu pineqartoq qassinik ukioqartoq imaluunniit tamatuma tungaatigut mianersuaalliorluni iliorsimaguni.

§ 81. Inuusuttumik akiliilluni atoqateqarnermut eqqartuunneqassaaq kinaluunniit akiliiniarluni imaluunniit akiliinissamik neriorsuilluni inummik 18-it inorlugit ukiulimmik kujannittoq allatulluunniit ittumik atoqateqarnikkut pissusilersortoq, pinerluuteqartup nalusimanngippagu pineqartoq qassinik ukioqartoq imaluunniit tamatuma tungaatigut mianersuaalliorluni iliorsimaguni.

Imm. 2. Taamattaq eqqartuunneqassaaq inuk peqataasoq inuup 18-it inorlugit ukiullip akilersilluni imaluunniit akilersinnissamik neriorsorneqarluni akiliisumut atoqateqarnikkut pissusilersorneranut, iliortuusup ilisimappagu pineqartup ukioqqortussusia imaluunniit tamatumunnga tunngatillugu mianersuaatsumik iliorsimaguni.

§ 81 a. Pinerluttuliortup pinerlineqartumut kinguaassiutitigut imminut iliuuseqartitsineranut aalajangersakkat §§ 77-imiit 81-imut assinganik atuutissapput.

§ 82. Inummik inuusuttumik atornerluisimasutut eqqartuunneqassaaq inuk peqataasoq, inummik 18-it inorlugit ukiulimmik ilaatitsisoq kinguaassiutitigut isiginnaagassioqataanermut, iliortuusup ilisimappagu pineqartup ukioqqortussusia tamatumunngalu tunngatillugu mianersuaatsumik iliorsimaguni.

Imm. 2. Taamattaq eqqartuunneqassaaq inuk imm. 1-imi inuup 18-it inorlugit ukiullip peqataaffiani takutitsinermi isiginnaartuusoq.

§ 82 a. Isumapiloqarneq tunngavigalugu tatiginnilersitsiniaasoq (groomer) eqqartuunneqassaaq, pinerlineqartup ukiui ilisimallugit, imaluunniit tamatumunnga tunngatillugu mianersuaalliorluni iliuuseqartoq, inuk, systematiskimik imaluunniit uukapaatitsilluni ukiuni misilittakkanilu atornerlullugit pisinnaatitaanani allanit pitsaanagerusutut naleqarnerusutulluunniit imminut isigaluni, pinerlineqartup kinguaassiutitigut pinerluttuliorfiginissaa siunertaralugu inummut 18-it inorlugit ukiulimmut attaveqarnermik ineriartortitsisoq.

§ 83. Iluanaarniutigalugu arnerisitsisutut/anguserisitsisutut eqqartuunneqassaaq inuk suliffimmik ingerlatsisoq, inuk alla akiliilluni imaluunniit akiliiumalluni neriorsuinikkut pisisuusoq atoqatigiinnertut pissusilimmik.

Imm. 2. Taamatut pineqassaaq allatigut atuisuusoq inuk alla inuussutissarsiutigalugu akiliisitsinikkut

imaluunniit akiliinissamik neriorsuinikkut pisisumik allamik atoqateqarnermik iliuuseqartitsisoq, imaluunniit ajornarunnaarsaasoq inuup allap akiliilluni inummik allamik atoqateqarnermik iliuuseqaneranut iluanaarniarnikkut imaluunniit akulikinnerusumik uteqattaartumik akunnermiliuttutut pissusilersorneranut.

Imm. 3. Aammattaaq eqqartuunneqassaaq inuk akunnittarfimmi inimik atukkiussisoq inuup allap inuussutissarsiutigalugu akiliilluni imaluunniit akiliinissamik neriorsuuteqarluni pisisumik atoqateqartitsippat.

Imm. 4. Taamattaaq eqqartuunneqassaaq inuk inatsisinut akerliusumik paatsoortitsilernermit, paatsuinermit sakkortusisitsinermigut atornerluinermigulluunniit, imaluunniit assuarnartumik periuseqarluni alla akiliiffigitilluni imaluunniit akiliiffigineqarnissamik neriorsorneqarluni pisiumasumik atoqateqartitsitsoq.

§ 84. Kannguttaalliortutut eqqartuunneqassaaq kinaluunniit inoqatiminut kannguttaalliorfiginnittoq.

Imm. 2. Taamatuttaaq pineqassaaq kinaluunniit assilisanik pigisanilluunniit kinguaassiuutitigut inuunerluttortalinnik 16-it inorlugit ukiulimmut nioqquteqartoq.

§ 85. Inummik inuusuttumik kinguaassiuutitigut kanngunarsaanermut tunngassuteqartunik siaruarternit pilersitsinermut eqqartuunneqassaaq kinaluunniit 18-it inorlugit ukiullit atortussat inummut kinguaassiuutitigut kanngunarsaanermut tunngassuteqartut, soorlu assit, filmiliat, atortussallu allat assilillugit takusassiassanngorteqitat.

Imm. 2. Inummik inuusuttumik assinik imaluunniit atortussanik inummut kinguaassiuutitigut innarliinermut tunngassuteqartunik pigisaqartoq eqqartuunneqassaaq kinaluunniit 18-it inorlugit ukiullit atortussat inunnut kinguaassiuutitigut innarliinermut tunngassuteqartut, soorlu assit, filmiliat, assilillugillu sanaqqinerit takuneqarsinnaasut allat paasissutissanik siammarternikkut kinguaassiuutitigut inuunerlunnermut tunngasunik pigisaqartoq imaluunniit akiliilluni takusaqartoq.

Imm. 3. Imm. 2-mi aalajangersakkamut ilaanngillat inunnik 15-inik ukioqalereersimasunik atortussat inunnut kinguaassiuutitigut kanngunarsaanermut tunngassuteqartut pigisaqarneq, pineqartoq pigisaqarnermut akuersisimatillugu..

Imm. 4. Aammattaaq eqqartuunneqassaaq kinaluunniit inummik 18-it inorlugit ukiulimmik atortussat inunnut kinguaassiuutitigut kanngunarsaanermut tunngassuteqartut, soorlu assit, filmiliat assigisaalluunniit, assilisat tuniniarnissaat allatulluunniit iliorluni siaruarternissaat siunertaralugu iliortup pineqartup ukioqqortussusia ilisimappagu tamatumunngalu tunngatillugu mianersuaalliorluni iliuuseqarsimaguni.

Kapitali 19

Toqutsilluni timimillu pinerliilluni pinerluttuliornerit

§ 86. Toqutsinermut eqqartuunneqassaaq kinaluunniit inoqamminik toqutsisoq.

Imm. 2. Toqutseqquneqarluni toqutsisimasutut eqqartuunneqassaaq kinaluunniit inoqamminik toqutsisoq taassumap paasinerlutassanngitsumik taamaalioqqusinera naapertorlugu.

Imm. 3. Imminut toquttumik ikiuisutut eqqartuunneqassaaq kinaluunniit imminut toquttumut ikiuussimasoq.

§ 87. Mianersuaalliorluni toqutsisutut eqqartuunneqassaaq kinaluunniit mianersuaalliorluni inoqamminik toqutsisoq.

§ 88. Nakuusernermut eqqartuunneqassaaq kinaluunniit piaaraluni inuup allap timaanik ajoqu-siisoq imaluunniit innarliisoq. Taamatuttaaq pineqassaaq mianersuaalliorluni inummik allamik timaati-

gut peqqissusaatigulluunniit annertuumik ajoqusiisoq.

§ 88 a. Inuk inoqutigiinni allap akuuffigisaani ilaasoq qanittumilluunniit attuumassuteqartoq imaluunniit siusinnerusukkut inoqutigiinnut taakkununga taamatut attuumassuteqarsimasoq, aamma piffissap ingerlanerani uteqqiattumik, allamut pineqartumut assuarnartumik aqutsissutitut naleqquttunik, ingasattumik nikassaanermik, ajortumik pinninnermik imaluunniit kannguttaatsuliornermik pissusilersortoq, matumani naqisimanninnikkut, pinngitsaaliinikkut imaluunniit nakuusernikkut nammineq inuuneqarnissamut siunissarlu pillugu nammineq aalajangiisinnaanissamut killilersuineq ilanngullugit, tarnikkut nakuusersimasutut eqqartuunneqassaaq.

§ 88 b. Periaaseq, inuup allap eqqissisimaneranik innarliinissamut naleqquttoq atorlugu, systematiskiusumik aamma pineqartumik ataavartumik attaveqarfiginnittoq, malersuisoq imaluunniit allakkut nakkarsaasoq, malersuisutut eqqartuunneqassaaq.

§ 89. Inuup inuuneranik ilaginnaasutut eqqartuunneqassaaq kinaluunniit inummik allamik immi-nut ikiorsinnaajunaarsitsisoq imaluunniit inummik isumagisassaminik taamatut imminut ikiorsinnaa-junnaarsimasumik qimatsisoq imaluunniit massa imminut allanulluunniit navinartorsiortitsivallaarani imaluunniit pilliuteqarani taamaaliorsinnaagaluarluni pisinnaanini naapertorlugu ajunaarnermik anner-tuumik inuup inuuneranik navialisitsisumik akornusiinngitsoq, inummik inuunermut navianartorsior-tumik ikiuinngitsoortoq imaluunniit inummik uumassuseqanngitsumik annaassinissamut pisariaqartu-nik iliuuseqanngitsoq imaluunniit inuit ajutoornermik nalaataqartut isumagineqarnissaannut peqqussu-taasunik iliuuseqanngitsoq.

§ 90. Pigisanik navianaatilinnik illersorneqarsinnaanngitsumik atuisutut eqqartuunneqassaaq ki-naluunniit piaaraluni mianersuaalliorluniluunniit meeqqamut 12-it inorlugit ukiulimmut, eqqarsartaatsimigut napparsimasumut, eqqarsartaatsikkut innarluutilimmut imaluunniit inummut aalakoortumut sakkumik navianartumik, qaartartumik imaluunniit allanik navianartunik tunniussaqartoq.

Imm. 2. Taamatuttaaq pineqassaaq kinaluunniit iluanaarniarluni, peqqarniitsumik kusananngitsumik iliorluni imaluunniit assigisaanik soqutigittaatsumik iliorluni inuup inuuneranik, innarluuteqannginneranik imaluunniit peqqissusaanik navialisitseqqajaasoq.

Imm. 3. Inuk inatsisitigut tunngavissaqarani illunik sanaartorfiusimasunit 500 meterit iluannit qoorortuunit, timmiarsiutinit, aallaaseeqqanit silaannaap naqitsineranit aallartartunit imaluunniit illuinnarsiutinit igitsisoq, taamatuttaaq eqqartuunneqassaaq.

Imm. 4. Taamatuttaaq eqqartuunneqassaaq kinaluunniit soqutigittaatsumik iliorluni nappaammik toqussutaasinnaasumik nakorsarneqarsinnaanngitsumillu tunillatsittoqarnissaanut navialisitsisoq.

Imm. 5. Inatsiseqarnermut ministeri peqqinnissamut pinaveersaartitsinermullu ministeri isuma-qatigiissuteqarfigalugu aalajangersaassaaq nappaatit suut imm. 3-mi pineqarnersut.

Kapitali 20

Inuup kiffaanngissuseqartitaaneranut pinerluttuliornertit

§ 91. Inatsisit unioqqutillugit pinngitsaaliinermut eqqartuunneqassaaq kinaluunniit

- 1) nakuuserluni imaluunniit nakuusernissaq sioorasaarutigalugu, pigisanik annertuumik ajoqusiinar-nerarluni, kiffaanngissusiiaaniarnerarluni imaluunniit pinerluummik pissutsinilluunniit ataqqinaa-taajaasunik ilumuunngitsumik pasilliisitsiniarnerarluni imaluunniit pissutsit pineqartumut tunngal-luinnartut oqaluttuariarnerarlugit pinngitsaaliilluni iliuuseqartitsisoq, naammagalugu atuisitsisoq imaluunniit iliuuseqanngitsoortitsisoq,
- 2) sioorasaarutigalugu pinerluummik politiiunat nalunaarutiginninniarluni saqqummiussiniarluniluun-

niit imaluunniit pasilliutinik ilumoortunik ataqqinaataajaasunik saqqummiussiniarluni pinngitsaalliilluni iliuuseqartitsisoq, naammagalugu atuisitsisoq imaluunniit iliuuseqanngitsoortitsisoq, taamatut iliortitsineq sioorasaarissutaasumut tunngatillugu naleqquttumik patsiseqartutut isigineqarsinnaanngippat.

§ 92. Kiffaanngissusiiianermut eqqartuunneqassaaq kinaluunniit piaarluni allamik kiffaanngissusiiasoq. Taamatuttaaq pineqassaaq mianersuaalliorluni iliuuseqartoq, kiffaanngissusiianeq anner-tuumik sunniuteqarsimappat imaluunniit sivisuujusimappat.

§ 93. Inunnik nioqquteqarnermut eqqartuunneqassaaq kinaluunniit inunnik katersisoq, angallasisoq, nuutsitsisoq, inisimatitsisoq imaluunniit kingusinnerusukkut tigusaqartoq, makkuninnga atuisoqarluni imaluunniit atuisoqarsimalluni

- 1) § 91 naapertorlugu inatsisit unioqqutillugit pinngitsaaliineq,
- 2) § 92, oqaaseqatigiit siulliit naapertorlugit kiffaanngissusiianeq,
- 3) § 98 naapertorlugu siorasaarineq,
- 4) paasinerluinermik inatsisinut akerliusumik pilersitsineq, sakkortusaaneq atornerluinerluunniit, imaluunniit
- 5) akissarsiutigalugu atortittarneq, assilisanik filminilluunniit assit imaluunniit atortussat inunnt kinguaassiuutitigut kanngunarsaanermut tunngassuteqartut, soorlu pissusilersornermik isiginnaartitsineq siunertaralugu pineqartumik atornerluinissaa kinguaassiuutitigut kanngunartuliornikkut, pinngitsaalliilluni sulisitsinikkut, inussiaateqarnikkut imaluunniit pissutsitigut inussiaateqarnermut eqqaanartutigut imaluunniit timip atortuinik piiaanikkut

Imm. 2. Taamatuttaaq pineqassaaq kinaluunniit kinguaassiuutitigut kanngunartuliortitsinikkut, pinngitsaalliilluni sulisitsinikkut, inussiaateqarnikkut imaluunniit pissutsitigut inussiaateqarnermut eqqaanartutigut imaluunniit timip atortuinik piiaanikkut pineqartumik atornerluinissaa siunertaralugu

- 1) inunnik 18-it inorlugit ukiulinnik katersisoq, angallassisoq, nuutsitsisoq, inisimatitsisoq imaluunniit kingusinnerusukkut tigusaqartoq, imaluunniit
- 2) inuk pinerlineqartumut oqartussaasoq atornerluinissamut akuersisinniarlugu akiliuteqartoq allamil-luunniit iluaqutissiisoq, aamma kinaluunniit taamatut akiliummik iluaqutissiisummilluunniit allamik pissarsiaqartoq.

Kapitali 21

Eqqissisimanermik akornusiinerit nikanarsaanerillu

§ 94. Eqqissisimanermik akornusiisutut eqqartuunneqassaaq kinaluunniit taamatut pisinnaatitaanani

- 1) allakkanik, telegraminik imaluunniit nalunaarutinik allamik matoqqasunik allattukkanilluunniit ammaasoq inusnaanulluunniit anngutinngitsoortitsisoq imaluunniit imaanik imminut paasisaqartit-toq,
- 2) allat toqqorsiviinut isertoq,
- 3) inuup kisimiilluni oqaasiinik, oqarasuaatikkut oqaloqatigiissutinik imaluunniit allat akunnerminni oqaloqatigiissutaannik imaluunniit matoqqasumik ataatsimiinnerni isumaqatigiinniarnernik peqa-taaffiginngisaminik imaluunniit taamatut pisinnaatitaanani iserfigisimasaminik atortorissaarummik atuilluni isertorluni naalaartoq imaluunniit immiussisoq
- 4) inunnik tamanit orninneqarsinnaanngitsumiittunik assiliisoq imaluunniit qinngutinik atortoris-saarummilluunniit allamik atuilluni taamatut pisinnaatitaanani inunnik taaneqartunik qimerluuisoq, imaluunniit
- 5) allat paasissutissaataannut imaluunniit programmiutaannut, qarasaasiakkut paasissutissanik suliarin-

ninnermi ator neqartussatut naatsorsuunneqartunut, isertoq.

§ 95. Pinerluutip § 94-imi taaneqartup assinganut eqqartuunneqassaaq kinaluunniit nalunaarutini assinilluunniit inummut allamut tassungaannarlu tunngasunik taamatut pisinnaatitaanani allanut ingerlatitseqqiisoq imaluunniit pineqartup assingini pissutsini ersarissuuk tamanut siaruaanneqarsinnaanngitsutut piumasaqaatigineqarsinnaasunik. Aalajangersagaq taanna aamma atuuppoq nalunaarut asseruunniit inummut toqoreersumut tunngassuteqartillugu.

§ 95 a. Inuk pisinnaatitaanani kinaassutsimik atornerluisutut eqqartuunneqassaaq ima pisoqartillugu

- 1) inuk alla pillugu paasissutissanik atuisoq, matumani cpr-normu, ateq aamma asseq ilanngullugit atuilluni pissuserinnerunngitsumik taannaasuusaartoq imaluunniit
- 2) atorussanik ingerlatitseqqittoq, tassani inuk alla pillugu paasissutissat ator neqarsimallutik, matumani cpr-normu, ateq aamma asseq ilanngullugit atuilluni pissuserinnerunngitsumik inuup taassuma pissusaa pillugu uukapaatitsiniarluni.

§ 96. Angerlarsimaffimmi eqqissiviillioortitsinermut eqqartuunneqassaaq kinaluunniit taamatut pisinnaatitaanani

- 1) allap illuanut imaluunniit tamanit orninneqarsinnaanngitsumut isertoq, imaluunniit
- 2) inuit allat illuisa eqqaanniit taamaaliqquneqaraluarluni qimagutinngitsoq.

§ 97. Aalajangersakkat §§ 94, imm. 1-imi aamma 96-imi taaneqartut assinganik atuutissapput kimilluunniit iliuutsimut peqataasimanani paasissutissanik unioqqutitsinikkut pissarsiarisanik pissarsisumut imaluunniit taamatut pisinnaatitaanani atuisumut.

§ 98. Sioorasaarisutut eqqartuunneqassaaq kinaluunniit inummut allamut taassuma allalluunniit inuunerata, peqqissusaata, atugarissaarnissaataluunniit ajoquserneqarnissamik annilaangatitserujussuarnartumik iliuuseqarluni pinerluuteqarniarluni sioorasaarisoq.

Imm. 2. Inuup naatsorsuutigineqartumik imaluunniit pereersimasumik politiinut eqqartuussivimmilluunniit nassuiaanissaanut atatillugu, nakuuserfigineqarnissamik qunusaarinikkut inummik, taassuma qanigisaanut imaluunniit tassunga atassuteqartumut ajortumik pinnittoq, taamatuttaaq eqqartuunneqassaaq.

§ 99. Nikanarsaataasumik ajuallatsitsisutut eqqartuunneqassaaq kinaluunniit inuup allap ataqqi-nassusaanik nikanarsaasoq ajuallannartumik oqalulluni iliuuseqarluniluunniit, imaluunniit pisimasumut pasilliummik saqqummiilluni siammarteraluniluunniit, ajuallatsitap inoqamminit ataqqineqarneranik millisitsissutaasumik imaluunniit pineqartup allanut atassuteqarneranik aamma ajoqusiisumik.

Imm. 2. Kinaluunniilli pasilliummut eqqartuunneqarsinnaanngilaq pasilliutip ilumoortuunera up-
pernarsarneqarpat imaluunniit tamanna isumapiloqarani oqaatigineqarsimappat aammalu taamaaliortoq oqaaseqarnissaminut pisussaasimappat, imaluunniit taamaaliorsimappat tamatuma qularutigisassaanngitsumik tamanut soqutiginaateqarnera imaluunniit imminut allanilluunniit iluaqutissaq pissutissaqartumik isumaginiarlugu.

Imm. 3. Taamaattorli kinaluunniit pasilliummik ilumoortuuneranik uppernarsarneqartumik saq-qummiussisoq eqqartuunneqarsinnaavoq pasilliut ilusimigut pisariaqanngitsumik ajuallannartuuppat imaluunniit iliuuseqartoq pasilliinissaminut naleqquttumik patsissisaqanngippat.

Imm. 4. Inatsisit unioqqutillugit iliuuseqarneq uppernarsaaffigineqassanngilaq, pasilligaq nunagi-samini imaluunniit nunami allami inaarutaasumik eqqartuussissutikkut tamatumunnga pinngitsuitinne-qarsimappat.

Imm. 5. Nikanarsaaneq pillugu unnerluussut tunngavissaqanngippat, eqqunngitsuliorfigineqartup piumasaqaataa malillugu eqqartuussutip naanerani tamanna pillugu oqaaseqaat ilanngunneqassaaq.

Imm. 6. Inummik toqusimasumik nikanarsaasutut eqqartuunneqassaaq kinaluunniit nikanarsaataasunik oqaluttoq siaruaasorluunniit inummut toqusimasumut tunngatillugit.

§ 99 a. §§ 94-imik, 95 a-mik aamma 99-imik unioqqutitsinermi eqqartuussummi, oqaaseqaat, nalunaarut imaluunniit asseq il.il., tamanna ajornanngippat, nunguterneqassasoq, tamatuma peqatigisaanik aalajangerneqarsinnaavoq.

Imm. 2. Imm. 1 malillugu pisussaaffik, unioqqutitsinermik eqqartuunneqartup pisussaaffigaa. Taassuma oqaaseqaat, nalunaarut imaluunniit asseq atorsinnaanngippagu, taamatut atuisinnaasumut pisussaaffik pisussaaffinngortinneqarsinnaavoq.

§ 100. Kinaassusersiortutut eqqartuunneqassaaq kinaluunniit tamanut imaluunniit inunnut amerlasuunut siaruarternissaq siunertaralugu oqaaseqartoq imaluunniit allatut iliorluni nalunaaruteqartoq, taamatut iliornermigut inuit eqimattat sioorasaarneqartillugit, asissorneqartillugit nikanarsarneqartillugilluunniit nagguat, amiisa qalipaataat, inuiannik naggueqatigiinnilluunniit kingoqqisuunerat, upperisaat imaluunniit kinguaassiuutinut tunngasutigut sumut samminerat pissutigalugu.

Kapitali 22

Uumasunut pinerluttuliornerit

§101. Uumasunik naalliutsitsinermut eqqartuunneqassaaq kinaluunniit naalliutsitsilluni, ilungersuaalliorfitsilluni, paarinerluilluni allatigulluunniit pissuseqarluni uumasunut naakkittaatsuliortoq.

Kapitali 23

Pisuussutaatit tungaasigut pinerluttuliornerit

§ 102. Tillinnermut eqqartuunneqassaaq kinaluunniit piginnittumik akuersisitsinani allap pigisaanik nikisinneqarsinnaasunik tigusisoq, tigusinermigut pisassarinnngisamik imminut iluanaartinniarluni imaluunniit allat iluanaartinniarlugit. Pigisanut nikisinneqarsinnaasunut matumani malittaani sanilluunneqarpoq nukissiaq pilersinneqartoq, paarineqartoq atorneqartorluunniit qaammaqqutissiornermut, kiassanermut, nukissiornermut aalatitsinissamulluunniit imaluunniit allatut ittumik aningaa-sarsiutigineqarnissaa siunertaralugu.

§ 103. Nassaamik peqquserlulluni atuinermut eqqartuunneqassaaq kinaluunniit taamatut iliornermigut pisassarinnngisanik imminut iluanaartinniarluni imaluunniit allat iluanaartinniarlugit pigisamik nikisinneqarsinnaasumik inummit paarineqanngitsumik imaluunniit piginnittuata puigorsimasaanik assigisaanilluunniit nassaartup nalaatsortumik tigummilersimasaanik tigusisoq.

§ 104. Peqquserluttuliornermut eqqartuunneqassaaq kinaluunniit taamatut iliornermigut pisassarinnngisanik imminut iluanaartinniarluni imaluunniit allat iluanaartinniarlugit peqqusersiorluni inummik allamik iliuuseqartitsisoq imaluunniit iliuuseqanngitsoortitsisoq, taamaaliornermigut pisuussutaatinik annertuumik annaasaqartitsilluni.

Imm. 2. Taamatuttaaq eqqartuunneqassaaq kinaluunniit, imm. 1 atuutissappat piumasarineqartut naammassineqarsimatinnagit, inatsisinut akerliusumik pissuseqarluni piaarluni imaluunniit mianersuaalliorujussuarluni inummik paasinerluisumik paasinerluineq pissutigalugu iliuuseqartitsisoq imaluunniit iliuuseqanngitsoortitsisoq, taamaaliornermigullu pineqartoq imaluunniit alla, iliuuseqarneq iliuuseqanngitsoornerluunniit taassumunnga pingaaruteqarluni, pisuussutaatinik annertuumik annaasa-

qartillugu.

§ 105. Qarasaasianut tunngasutigut peqquserluttuliornermut eqqartuunneqassaaq kinaluunniit taamatut iliornermigut pisassarinnngisanik imminut iluanaartinniarluni imaluunniit allat iluanaartinniarlugit qarasaasiami paasissutissanik imaluunniit qarasaasiakkut suliaqarnermut programminik inatsisinut akerliusumik allannngortitsisoq, ilasisoq imaluunniit piiasoq imaluunniit qarasaasiakkut suliaqarnerup taamaattup inernerinik inatsisinut akerliusumik sunniiniarsarisoq.

§ 106. Allap piinik imminut paarititanik peqquserluttuliornermut eqqartuunneqassaaq kinaluunniit taamatut iliornermigut pisassarinnngisanik imminut iluanaartinniarluni imaluunniit allat iluanaartinniarlugit

- 1) allap pigisaanik nikisinneqarsinnaasumik aningaasanilluunniit imminut paarititaasunik tiguisoq, imaluunniit,
- 2) taarsigassarsiamik imaluunniit akiligassatut tunniussamik tigusaqarsimanerminik miserrattiginnittoq.

Imm. 2. Aalajangersakkamut imm. 1, nr. 1-imiittumut ilaatinneqanngilaq pigisanik pisianik, akii-sa tamarmiusut akilerneqarnissaata tungaanut nioqquteqartup piginnittussaassuseqarfigisaanik, atuisinnaaneq.

§ 107. Piginnaatitaanermik atornerluinermut eqqartuunneqassaaq kinaluunniit, iliuuseq §§ 102-106-imi aalajangersakkanut atasuunngippat, iliuuseqarnermigut pisassarinnngisanik imminut iluanaartinniarluni imaluunniit allat iluanaartinniarlugit inummut allamut pisuussutaatinik annaasaqartitsisoq

- 1) annaasaqartoq sinnerlugu inatsisitigut sunniteqartumik iliuuseqarnissamut periarfissinneqarnerminik atornerluilluni, imaluunniit
- 2) aningaasanik nalilinnut tunngasuni, inuk alla sinnerlugu paarititaasunik, paarsisitsisumut pitsaanerusussap akerlianik iliorluni.

§ 108. Pinngitsaaliilluni iliuuseqartitsiniarnermut eqqartuunneqassaaq, iliuuseq § 112-mut atasuunngippat

- 1) kinaluunniit taamatut iliornikkut pisassarinnngisanik imminut iluanaartinniarluni imaluunniit allat iluanaartinniarlugit siorasaarisoq nakuuserniarluni, pigisanik annertuumik aseruiniarluni imaluunniit kiffaanngissusiiaaniarluni, pinerluummot pineqaatissiissutaasussamut nikanarsaataasussamulluunniit pasilliummik ilumuunngitsumik saqqummiussiniarluni imaluunniit pissutsit inummut tunngalluinnartut saqqummiunniarlugit, imaluunniit
- 2) kinaluunniit siorasaarisoq pisimasoq pineqaatissiissutaasussaq nalunaarutiginiarlugu imaluunniit saqqummiunniarlugu imaluunniit pasilliutinik ilumoortunik nikanarsaataasunik saqqummiussa-qar-niarluni, taamaaliornermigut imminut iluanaartinniarluni imaluunniit allat iluanaartinniarlugit, pi-simasumut, siorasaarinermut pissutaasumut, naleqquttumik tunngaveqanngitsumik.

§ 109. Akiitsugaqarfimmut peqquserluuteqartutut eqqartuunneqassaaq kinaluunniit taamaaliornermigut pisassarinnngisanik imminut iluanaartinniarluni imaluunniit allat iluanaartinniarlugit

- 1) pigisanik nammineq pigisaminik, aamma allap pingatsiuttup piginnittussaqaataaffigilersimasaanik, tunisisoq allatulluunniit iliorluni atuisoq, akuerineqarsinnaanngitsumik imaluunniit
- 2) sallulluni patsisissarsiornermigut, pisuusaarnermigut, atuvallaarnermigut imaluunniit allatut assingusumik iliuuseqarnermigut pigisaminik imaluunniit pisassarisaminik akiitsugaqarfimminut tamakkualuunniit ilaannut akiliutissatut atuinaveersaartitsisoq.

§ 110. Iluanaarniapilunnermut eqqartuunneqassaaq kinaluunniit inoqammi aningaasatigut imaluunniit inuttut ajornartorsioreranik, ilisimasakinneranik, isumanerluuteqannginneranik imaluunniit

tunaartaqarneranik atornerluilluni isumaqatigiissuteqarnermi akiliutissanik, nammineq tunniussimasa-minut naleqqiullugit naleqqutinngippallaartunik imaluunniit akilerneqartussaangitsunik, akiliisitsini-artoq imaluunniit akileeqquisoq.

Imm. 2. Taamatuttaaq eqqartuunneqassaaq kinaluunniit, imm. 1-imi piumasarineqartut atorne-qarsinnaatinnagit, isumaqatigiissuteqarnermi isumaqatigiissuteqarfigisami aningaasatigut ajornartorsi-orneranik imaluunniit taassumap appasinnerusumik inissisimaffeqarneranik assuarnartumik iliuuse-qarluni atornerluisoq.

§ 111. Iliuuserisaaq § 111 a-mut ilaangippat, tillitanik atueqataanermut eqqartuunneqassaaq kinaluunniit iluanaarutininik inatsisinik unioqqutitsinikkut, pinerluttulerineri inatsisitigut akisussaatitaanermik kinguneqarsinnaasukkut, pissarsiaasimasunik taamaaliortussaananik tigusisoq imaluunniit pissarseqataasoq allanilluunniit pissarseqataatitsisoq, aamma kinaluunniit taamaaliortussaananik toqquinnermigut, paarinninnermigut, angallassinermigut, tuniniaanermut ikiuunnermigut imaluunniit taakku assigisaannik iliuuseqarnermigut inuup allap iluanaarutininik pinerlunnermiit, pinerluttulerineri inatsisitigut akisussaatinneqarnermik kinguneqarsinnaasumiit, pissarsianik pissarsinissaanik kingusinnerusukkut qularnaarisitsisoq.

Imm. 2. Aalajangersagaq manna malillugu pinerluttulerineri inatsisitigut akisussaatinne-qarsinnaangilaq kinaluunniit iluanaarutininik ilaqtutamiit imaluunniit inooqatigisamiit tigusaqartoq nalinginnaasumik pilersuinnermut atugassanik tigusaqartoq imaluunniit iluanaarutininik tigusaqartoq ullu-innarni atortussanut, pisattanut kiffartuussinnernulluunniit nalinginnaasumik akiliutaasunik.

»**§ 111 a.** Aningaasanik malunnarunnaarsitsiniaasutut eqqartuunneqassaaq inuk aningaasanik pinerluuteqarnikkut toqqaannartumik toqqaannangitsumilluunniit pissarsiarisimasaminik allangortitsisoq imaluunniit nuussisoq, inatsisinik unioqqutitsinikkut pinngorfeqarnerat toqqorterniarlugu imaluunniit malunnarunnaarsinniarlugu.

§ 112. Ujajaanermut eqqartuunneqassaaq kinaluunniit pisassarinnngisaminik imminut iluanaartin-niarluni imaluunniit allat iluanaartinniarlugit nakuuserluni imaluunniit tassuuguinnaq nakuusernissa-minik siorasaaraluni

- 1) allap pigisaanik nikisinneqarsinnaasumik arsaarinnittoq imaluunniit pinngitsaaliilluni tuniussisit-sisoq,
- 2) pigisamik tillitamik isumannaarisoq, imaluunniit
- 3) inummik pinngitsaaliisoq iliuuseqartitsilluni iliuuseqanngitsoortitsilluniluunniit, saassunneqartumut imaluunniit taanna sinnerlugu iliuuseqartup nalilinnik annaasaqarneranik kinguneqartumik.

§ 113. Pigisanik aseruinnermut eqqartuunneqassaaq kinaluunniit allap pigisaanik piaaraluni aseror-terisoq, innarliisoq imaluunniit peersisoq, imaluunniit mianersuaalliorujussuarluni annertuumik aseror-terisoq.

Imm. 2. Taamatuttaaq eqqartuunneqassaaq kinaluunniit nammineq pigisani aserorterlugit, innar-lerlugit imaluunniit peerlugit akiligassaqarfigisaminut imaluunniit tamakkua arlaannut akiginissaannut atortussaajunnaarsitsisoq.

§ 114. Akuerineqarani atuinermut eqqartuunneqassaaq kinaluunniit taamatut pisinnaatitaanani allap pigisaanik atuisoq.

Imm. 2. Taamatuttaaq eqqartuunneqassaaq kinaluunniit pisinnaatitaanani allap pigisaminik atui-sinnaanerani tamakkiisumik imaluunniit ilaannakortumik akornusiisoq.

§ 115. Eqqartuussisut suliassaannik namminersuussinnermut eqqartuunneqassaaq kinaluunniit inatsisinik unioqqutitsilluni namminersuussiniartoq.

§ 116. Iluanaarutissatut utertitsissutinik tigusaqarnermut imaluunniit tunniussaqarnermut eqqartuunneqassaaq kinaluunniit, § 107-imi piumasarineqartut atuutsinnagit, inuup allap pigisaanik aningaasanik nalilinnik isumaginnitsilluni pisussaanini uniorlugu nammineq pissaminik allalluunniit pissaanik tigusaqartoq, piumasaqartoq imaluunniit tunissummik iluaqutissamilluunniit allamik neriorsortittoq, aamma kinaluunniit tunissummik iluaqutissamilluunniit taamaattumik tunisisoq, neriorsuisoq imaluunniit neqerooruteqartoq.

§ 117. Eqqartuussisumut isumaqatigiisitsiniaasartumut akiliilluni peqquserlutsitsinermut eqqartuunneqassaaq kinaluunniit tunissummik imaluunniit allamik iluaqutissamik eqqartuussisutut isumaqatigiisitsiniartartutut Kalaallit Nunaanni, Savalimmiuni, Qallunaat Nunaanni imaluunniit nunami allami atorfilimmut pisinnaatitaanani tunniussisoq, neriorsuisoq imaluunniit neqeroorfiginnittoq, pineqartoq taamatut atorfeqarnerani iliuuseqartinniarlugu imaluunniit iliuuseqanngitsoortinniarlugu.

Imm. 2. Taamatuttaaq eqqartuunneqassaaq kinaluunniit Kalaallit Nunaanni, Savalimmiuni, Qallunaat Nunaanni imaluunniit nunami allami eqqartuussisutut isumaqatigiisitsiniaasartutut atorfeqarnerminut atatillugu tunissummik imaluunniit allamik ajunngitsorsiassamik pisinnaatitaanani tigusaqartoq, piumasaqartoq imaluunniit tuneqqusoq.

Immikkoortut pingajuat

Pineqaatissiissutissat

Immikkoortoq I

Pineqaatissiissutissat pillugit aalajangersakkat nalinginnaasut

Kapitali 24

Pineqaatissiissutissanik toqqaaneq uuttuinerlu

§ 118. Eqqartuussisuusut unnerluutigineqartup pinerluuteqarsimaneranik eqqartuussissutikkut aalajangiutigalutik eqqartuussisummi aalajangiissapput pineqaatissiissutit § 119-imi taagorneqartut arlaat suna atorneqassanersoq, taamaattorli tak. § 121, imm. 2.

§ 119. Eqqartuussisuusut aalajangiisinnaapput makkuninnga:

- 1) Mianersoqqusineq, tak. kapitali 25.
- 2) Akiliisitsineq, tak. kapitali 26.
- 3) Piumasaqaasiinikkut utaqquisitamik inissiisarfimmiittussanngortitsilluni eqqartuussissut, tak. kapitali 27.
- 4) Nakkutigisassanngortitsilluni eqqartuussissut, tak. kapitali 28.
- 5) Inuiaqatigiinnik kiffartuussisussanngortitsilluni eqqartuussissut, tak. kapitali 29.
- 6) Inissiisarfimmiittussanngortitsilluni nakkutigisassanngortitsillunilu eqqartuussissut, tak. kapitali 30.
- 7) Inissiisarfimmiittussanngortitsineq, tak. kapitali 31.

Imm. 2. Eqqartuussisuusut taarsiullugu aalajangiisinnaapput:

- 1) Inuusuttunut ikiutissat immikkut ittut, tak. kapitali 32.
- 2) Niaqulaartunut imaluunniit eqqarsartaatsimikkut amigaatilinnut pineqaatissiissutit immikkut ittut, tak. kapitali 33.
- 3) Immikkut paarisassanngortitsineq, tak. kapitali 34.

§ 120. (atorunnaarsinneqarpoq)

§ 121. Pineqaatissiisummik toqqaanermi uuttuinnermilu eqqarsaatigineqassapput

- 1) inatsisinik unioqqutitsinerup peqqarniissusia, matumani ilanngunneqassalluni iliuutsit taamatut ittut akiornissaannut inuiaqatigiit soqutiginninnerat, aamma
- 2) pinerluuteqarsimasup inuttut atugai, matumani ilanngunneqassalluni pineqartup inatsisinik unioqqutitseqqinnissaa pinaveersaartinniarlugu pisariaqarsorineqartut.

Imm. 2. Pissutsit immikkut ittut taamatut iliornissamut atuuppata eqqartuussisuusut pineqaatissiisuteqanngitsoorsinnaapput. Taamatut pisoqartillugu eqqartuussisuusut tamanna eqqartuussisummi aalajangiiffigissavaat.

§ 122. Eqqartuussaq tigusaqqasimappat, tigummigallagaasimappat imaluunniit eqqarsartaatsikut misissugassanngorlugu unitsitaasimappat inissiisarfimmiittussanngortitsilluni eqqartuussummi ullunik aalajangersimasumik amerlassusilinnik sivikillisaasoqassaaq, ullut kiffaanngissusiiagaaffiit imaluunniit uninngatitaaffiit aallarneqarnerisa sivosoqataannik. Kiffaanngissusiiagerit minnerpaamik nalunaaquttap akunnerinik 24-nik sivosussuseqarsimanngitsut sivikillisaataassanngillat. Eqqartuussisuusut aalajangiinerat naapertorlugu eqqartuussaq kiffaanngissusiiagaanermi nalaani kisimiititaalluni inissinneqarsimappat sulii ullunik aalajangersimasunik amerlassusilinnik sivikillisaasoqassaaq, eqqartuussap kisimiititaalluni inissinneqarfigisimasaani ullut unnuallu pingasut aallartinneri tamaasa ulloq ataaseq sivikillisaatigineqarluni. Eqqartuussisummi nalunaarutigineqassapput kiffaanngissusiiagaanerit, uninngatitaanerit kisimiititaallunilu inissitaanerit ilanngaattissat qanoq sivosutigisimasut. Eqqartuussisuusut qaqutigootumik aalajangersinnaavaat inissiisarfimmiittussanngortitsineq tamarmi naammassineqareersimasutut isigineqassasoq, naak inissiisarfimmiittussanngortitsineq eqqartuussisutaasimasooq eqqartuussap kiffaanngissusiiagaasimaneraniit uninngatitaasimaneraniilluunniit sivosunerugaluartoq. Suliareqqitassanngortitsinissaaq itigartitsissutigineqarpat imaluunniit taamaatiinneqarpat aalajangiineq taamatut ittoq eqqartuussivimmit qulliunerusumit aalajangerneqassaaq. Akiliitsineq eqqartuussisutigineqarsimappat eqqartuussisummi aalajangerneqassaaq akiliutigisaaq taassumaluunniit ilaa naammassineqareersutut isigineqassasoq.

Imm. 2. Imm. 1 taamatuttaaq atuutissaaq § 139, imm. 2 malillugu eqqartuussivikkut aalajangiinerni, eqqartuussaq aalajangiineq sioqqullugu tigusaqqasimagaangat imaluunniit tigummigallagaasimagaangat.

Imm. 3. Eqqartuussaq tigusaqqasimappat, tigummigallagaasimappat imaluunniit eqqarsartaatsimigut misissuiffigineqassalluni nunami allami napparsimmavimmi uninngasimappat eqqartuussisuusut aalajangissavaat tamanna pineqaatissatut eqqartuussisummi qanoq annertutigisumik sivikillisaataassanersoq.

Imm. 4. Imm. 1, oqaaseqatigiinni siullerni tulliini aalajangersakkat taamatuttaaq atuupput inunut saammaaasaanissamut imaluunniit misiliummik iperagaanissamut piumasarineqartunik unioqqutitsinertik pissutigalugu tigusaqqareerlutik imaluunniit tigummigallagaareerlutik pineqaatissiisummik naammassinninniarlutik inissitaasunut.

§ 123. Pissutsit sakkukinnerusumik pineqaatissiinnermut imaluunniit pissutsit najoqqutaralugit pineqaatissiinngitsoornermut patsisigineqarsinnaasutut naatsorsuunneqarput

- 1) iliuuseqartoq iliuuseqarsimappat inatsisit, iliuuseqarnissamut inerterisut imaluunniit peqqusisut, utoqqatsissutaasinnaasumik ilisimanagit imaluunniit utoqqatsissutaasinnaasumik paasinerlullugit,
- 2) iliuuseqartoq allatut ajornartumik illersuisariaqalernerimut imaluunniit illersuisinnaatitaanermut killissarititanik qaangiisimappat,
- 3) iliuuseqartoqarsimappat isummakkut puffassimaarluni, unioqqutitsilluni saassussinerup pilersitaanik imaluunniit pinerlineqartup tungaaniit ajualatsitaarujussuarnep pilersitaanik, imaluunniit aamma iliuuseqartoqarsimappat killitsinnerujussuup pilersitaanik imaluunniit tarnikkut eqqissisimajunnaallatsiarnep pilersitaanik,

- 4) iliuuseqartoq iliuuseqartinneqarsimappat inummut allamut atasorujussuunini pissutigalugu imaluunniit annertuumik ajoqusiinissamik siorasaarneqarluni,
- 5) inatsisinik unioqqutitsisoq iliuuseqarnermut soqutaarpiannngitsumik ikiuunniarsimappat imaluunniit anguniagaareersaq soqutaarpiannngitsumik sakkortusiniarsimappagu,
- 6) inatsisinik unioqqutitsiniarneq naammassineqarsimanngippat, pingaartumik iliuuseqartoq nammineq piumassutsiminik, iliuuseqarnermullu imaluunniit taamatut iliornikkut siunertariniakkap naammassineranut nalaatsortumik akornutissat pissutigaginagit, tunuarpat imaluunniit naammassiniaaneq akornusersimappagu imaluunniit akornuserniaraluarsimappagu,
- 7) iliuuseqartup inatsisinik unioqqutitsineq naammassineqareersaq nammineq piumassutsiminik navialisitsineq iliuutsip nassatarisaa pinngitsoortissimappagu, imaluunniit ajoqusiineq iliuutsikkut pilersitaq aqqeqqissimappagu imaluunniit aqqeqqinniaraluarsimappagu,
- 8) iliuuseqartoq nammineq piumassutsiminik politiinut immiut oqaatigisimappat aamma tamakkii-sumik nassusersimappat, imaluunniit
- 9) pissutsinik immikkut ittunik inatsimmik unioqqutitsinerup pineqartup sakkukinnerusumik naliliivigineqarnissanut tunngavissaqartitsisoqarpat.

§ 124. Inuk eqqartuussaareersimasooq inatsisinik unioqqutitsinermut, eqqartuussissuteqarneq siokullugu pilarineqarsimasumut, pisuutinneqarpat eqqartuussisuusut nutaamik pineqaatissiissapput, taamatulli iliortoqassanani eqqartuussisuusut isumaqarpata siornatigut pineqaatissiissutaasimasooq naammattoq. Siornatigut pineqaatissiissutaasimasooq tamakkerlugu naammassineqarsimanngippat pineqaatissiissut nutaaq eqqartuussissutigineqarsinnaavoq siusinnerusukkut eqqartuussissutigineqarsimasumut taarsiullugu.

Immikkoortoq II

Pineqaatissiinerit ataasiakkaat aamma pinnerluuteqarnermi inatsisitigut kinguneqartitsinerit allat

Kapitali 25

Mianersoqqussut

§ 125. Mianersoqqusineq atorneqarsinnaavoq inatsisinik unioqqutitsineq annikilluinnartumik peqqarniissuseqarpat, pingaartumillu iliuuseqartoq siusinnerusukkut pineqaatissinneqarnikuunngippat.

§ 126. Mianersoqqussut eqqartuussisuusuniit eqqartuussamut nalunaarutigineqartassaaq, tamanalu ilutigalugu eqqartuussissummi allanneqartassaaq suliaasaq mianersoqqussuteqarnikkut naammassineqarsimasooq.

Kapitali 26

Akiliisitsissut

§ 127. Akiliisitsissuteqarneq atorneqarsinnaavoq sakkortunerusumik pineqaatissiissuteqarnissaq pisariaqanngippat.

Imm. 2. Akiliisitsisoqarsinnaavoq pineqaatissiissutitut allanut tapiliullugu, pingaartumik unnerluutigineqartoq inatsisinik unioqqutitsinermigut aningaasatigut immiut iluanaaruteqartissimappat allannilluunniit iluanaaruteqartitsisimappat imaluunniit tamanna anguniagarisimappagu.

Imm. 3. Akiliisitsissutissamik annertussusiliinermi § 121-mi taaneqartut saniatigut iliuuseqartup akiliisinnaassuseqarnera aamma iluanaarutitut pissarsiap anguniakkalluunniit annertussusaa isiginia-
rneqassapput.

Imm. 4. Akiliisitsissutit naalagaaffiup karsianut nakkassapput, taamaassananili inatsisini allani allatut ittumik aalajangiisoqarsimappat.

§ 128. Eqqartuussisuusut akiliisitsissutip akilernerqarnissaanut piffissarititaasoq eqqartuussissummi aalajangersarsinnaavaat.

Imm. 2. Politiit eqqartuussamit noqqaavigineqarlutik aalajangiisinnaapput akiliisitsissut naaffertumik akilersorneqassasoq.

Imm. 3. Akiliisitsissut akilernerqanngippat akilersinniarneqassaaq qularnaveeqqutitut sillimmasiinikkut imaluunniit aningaasarsianit pisassanilluunniit allanit ilanngaassinikkut eqqartuussisarnermik inatsimmi kapitalini 45-47 aalajangersakkat naapertorlugit.

Imm. 4. Akiliisitsissut akilersinneqarsinnaanngippat aamma isumaqartoqartariaqarpas eqqartuussaq pinaaserluni akiliinaveersaartoq, eqqartuussisuusut suliaassani pisortanit unnerluussissutigineqartussaasuni politiinit noqqaavigineqarlutik aalajangersinnaavaat eqqartuussaq inissiisarfimmut piffissammi aalajangersimasumi inissinneqassasoq.

Imm. 5. Imm. 4 naapertorlugu inissiisarfimmiittussanngortitsinermik sivilissusiliinermi akiligasap akiitsorineqartup qanoq annertutigina isiginiarneqartassaaq. Tamatuma 10.000 koruunit qaangersimanngippagit ullut qulit qaangerlugit inissiisarfimmiittussanngortitsineq atorneqarsinnaanngilaq. Qanorluunniit pisoqaraluarpat ullut 60-it qaangerlugit inissiisarfimmiittussanngortitsinissaq pillugu aalajangiisoqarsinnaanngilaq.

Imm. 6. Imm. 2-5-imi aalajangersakkat taamatuttaaq atuutissapput akiliisitsissutitut allaffissorinikkut pisortani aalajangiunneqarsimasunut.

Kapitali 27

Inissiisarfimmiittussanngortitsinissaq piumasaqaasiinikkut utaqqisitaq

§ 129. Inissiisarfimmiittussanngortitsinissaq piumasaqaasiinikkut utaqqisitaq atorneqarsinnaavoq,

- 1) tamanna iliuuseqartup inatsisinik unioqqutitseqqitsaalineqarnissaanut naammassorineqarpas, aamma
- 2) inatsisinik unioqqutitsinerup peqqarniissusaa pineqaatissiissummik tamatuminnga atuinissamut akerliunngippat.

Imm. 2. Eqqartuussisuusut inissiinerup sivilissusissaa eqqartuussissummi aalajangersassavaat tamannalu ilutigalugu aalajangersassavaat pineqaatissiissutip naammassineqarnissaa kinguartinneqassasoq atorunnaassasorlu misiliutaasumik piffissarititaq qaangiuppat. Misiligutaasumik piffissarititap ukiut pingasut qaangersimasinnaanngilai.

Imm. 3. Inatsisinik unioqqutitsisoq 18-it inorlugit ukiulik inissiisarfimmiittussanngortitsinissamik piumasaqaasiinikkut utaqqisitamik eqqartuunneqassanngilaq, aatsaalli taamatut eqqartuunneqarsinnaaluni pissutsit immikkut ittut inissiisarfimmiittussanngortitsinissamik piumasaqaasiinikkut utaqqisitamik atuinissaq pisariaqartippassuk.

§ 130. Eqqartuussaq misiligutitut piffissarititap eqqartuussisuusunit aalajangikkap ingerlanerani inatsisinik unioqqutitseqqippat suliaassarlu eqqartuussivimmut suliaassiissutigineqarpas misiligutitut piffissarititaq sulii qaangiutinngitsoq, taava eqqartuussisuusut pinnerluummut tassunga aammalu inatsisinik unioqqutitsinermut siusinnerusukkut eqqartuussissutaasimasumut ataatsimut pineqaatissiissuteqassapput.

Imm. 2. Taamaaliornissaq pissutsinit ilalernartinneqarpas eqqartuussisuusut inatsisinik unioqqutitseqqinnermuinnaq pineqaatissiissuteqarsinnaapput.

Kapitali 28

Nakkutigisassanngortitsilluni eqqartuussissut

§ 131. Nakkutigisassanngortitsilluni eqqartuussuteqarneq atorineqarsinnaavoq

- 1) iliuuseqartup ikorfartorneqarnissaq imaluunniit katsorsarneqarnissaq pisariaqartippagu,
- 2) nakkutilliineq nakkutigisaanerup nassatarisaa pisariaqartinneqarpat, aammalu
- 3) inatsisinik unioqqutitsinerup peqqarniissusaa pineqaatissiissutip tamatuma atornissanut aalajangiisuusumik akerliunngippat.

Imm. 2. Iliuuseqartoq 18-it inorlugit ukiulik nakkutigisassanngortinneqarluni eqqartuunneqassanngilaq, aatsaalli taamatut eqqartuunneqassalluni pissutsit immikkut ittut nakkutigisassanngortitsilluni eqqartuussissuteqarnissamik atuinissaq pisariaqartippassuk.

§ 132. Nakkutigisassanngortitsilluni eqqartuussissuteqarnermi eqqartuussisuusut aalajangissavaat eqqartuunneqartoq nakkutilliisumit, eqqartuussisuusut ivertitaannit, imaluunniit pinerluuteqarsimasunik isumaginnittoqarfimmit nakkutigineqassasoq. Pinerluuteqarsimasunik isumaginnittoqarfik nakkutiginnittuussaguni nakkutilliisussamik ivertitsissaaq, aalajangersaassaarluni qanoq akulikitsigisumik qanorlu iliorluni eqqartuussap nakkutilliisuni atassuteqarfigisassagaa.

Imm. 2. Nakkutigineqarnissap qanoq sivisutiginissaa eqqartuussisuusut aalajangissavaat, tamannalu nalinginnaasumik ukiunit pingasunit sivisunerusinnaanngilaq. Immikkut ittumik pissutissaqartoqartillugu ukiut tallimat angullugit nakkutigineqarnissaq aalajangerneqarsinnaavoq.

Imm. 3. Eqqartuussisuusut eqqartuussissummi §§ 133-136 naapertorlugu piumasaqaasiisinnaapput. Tamakkua sivisussusissaasa, eqqartuussisuusunit aalajangerneqartussaasup, nakkutigisassanngortitsinermut piffissaliussaq qaangersimasinnaanngilaat.

§ 133. Eqqartuussaq peqquneqarsinnaavoq pinerluuteqarsimasunik isumaginnittoqarfiup najugaqarneq, suliffeqarneq, ilinniagaqarneq, sunngiffimmik atuinissaq imaluunniit inunnik aalajangersimasunik ilaqartarneq pillugit aalajangersagaanik maleruaassasoq. Taamaakkaluartorli pinerluuteqarsimasunik isumaginnittoqarfik taamaallaat aalajangiisinnaavoq eqqartuussaq nunaqarfigeriikkami imaluunniit najugaqarfigeriikkami avataani najugaqassasoq, sulissasoq ilinniagaqassasorluunniit, tamanna pillugu eqqartuussissummi aalajangiisoqarsinappat.

Imm. 2. Siunertarisamut naleqquttuusorinarneruppat aalajangersakkat imm. 1-imi taagukkatut ittut eqqartuussissummi aalajangereerneqarsinnaapput.

§ 134. Eqqartuussisuusut eqqartuussissummi immikkut aalajangikkamik piumasaqaasiisinnaapput eqqartuussaq pinerluuteqarsimasunik isumaginnittoqarfiup aalajangiinera naapertorlugu angerlarsimaffimmi piukkunnartumi najugaqassasoq, soorlu inuinnaat angerlarsimaffianni imaluunniit paaqqinniffimmi.

Imm. 2. Siunertarisamut naleqquttuusorinarneruppat eqqartuussap imm. 1-imi taaneqartutut najugaqarnissaa pillugu eqqartuussissummi piumasaqaaseereertoqarsinnaavoq.

Imm. 3. Imm. 1 aamma 2 naapertorlugit piumasaqaasiinermut atatillugu najugaqarnissap sivisunerpaaffissaa tamatumunnga peqatigitillugu aalajangerneqassaaq.

§ 135. Eqqartuussisuusut eqqartuussissummi piumasaqaasiisinnaapput eqqartuussaq pinerluuteqarsimasunik isumaginnittoqarfiup aalajangiinera naapertorlugu

- 1) imigassamik, ikiaroornartunik assigisaannillu atupilunnermut katsorsartissasoq, pisariaqassappat paaqqinniffimmi immikkut ittumi imaluunniit Kalaallit Nunaanni napparsimmavissuarmi,
- 2) nakorsamit katsorsartissasoq, pisariaqassappat Kalaallit Nunaanni napparsimmavissuarmi, imaluunniit
- 3) tarnip pissusaanik imaluunniit tarnimigut/atoqatigiinnermut tunngasutigut katsorsartissasoq.

Imm. 2. Siunertarisamut naleqquttuusorinarneruppat pineqaatissiissutit imm. 1-imi taagorneqartut eqqartuussissummi aalajangereerneqarsinnaapput.

§ 136. Tamakkua sanitigut siunertarisamut naleqquttuosorinartunik allanik piumasaqaasiisoqarsinnaavoq, ilanngulluguttaaq piumasaqaatigineqarluni eqqartuussaq

- 1) imigassamik, ikiaroonartunik assigisaannillu atuipilunnaveersaassasoq,
- 2) imigassartornaveersaassasoq imaluunniit imigassamik pissarsiniarnaveersaassasoq,
- 3) isertitanik pisuussutaatinillu atuinissamut killilersuinissaq pillugu aamma aningaasatigut pisussaaffinnik naammassinninnissaq pillugu pinerluuteqarsimasunik isumaginnittoqarfiup aalajangersaanneranik maleruassasoq.

§ 137. Aalajangersakkat, eqqartuussisummi aalajangersarneqarsimasut, kingusinnerusukkut eqqartuussisuusunit atorunnaarsinneqarsinnaapput imaluunniit nakkutigineqarnerup nalaani allanngortinneqarsinnaapput unnerluussisussaataitaasuniit, pinerluuteqarsimasunik isumaginnittoqarfimmiit imaluunniit eqqartuussaasumiit noqqaassuteqarneq naapertorlugu. Pinerluuteqarsimasunik isumaginnittoqarfiup imaluunniit eqqartuussap noqqaassutaa unnerluussisussaataitaasunut saqqummiunneqassaaq, taakkualu suliassaq eqqartuussivimmut piaarnerpaamik saqqummiutissavaat.

Imm. 2. Atorunnaarsitsinissamik allanngortitsinissamilluunniit eqqartuussap noqqaassutaa akuerineqanngippat tamanna aatsaat eqqartuussivimmut saqqummiuteqqinneqarsinnaavoq aalajangiinnermiit ukiup affaa ingerlareerpat.

§ 138. Eqqartuussaq nakkutigisaanermi nalaani inatsisinik unioqqutitseqqippat suliassarlu eqqartuussivimmut saqqummiunneqarpat nakkutigisaaneq qaangiutsinnagu, eqqartuussisuusut pinerluummut tamatumunnga inatsisinillu unioqqutitsinermut siusinnerusukkut eqqartuussissutaasimasumut aataatsimut pineqaatissiisapput. Taamaaliornissaq pissutsinit ilalernartinneqarpat eqqartuussisuusut inatsisinik unioqqutitseqqinnerinnaq pineqaatissiisutigisinnaavaat.

§ 139. Eqqartuussap nakkutigisaanissani pinaveersaartippagu imaluunniit piumasarineqartutut nalunaarutigineqarsimasut unioqqutippagit, unnerluussisussaataitaasut suliassaq uninngatinnagu eqqartuussivimmut saqqummiutissavaat, eqqartuussisullu

- 1) eqqartuussaq mianersoqqusinnaavaat, imaluunniit
- 2) piumasarineqartut ilasinnaavaat allanngortissinnaallugilluunniit aamma nakkutigisaanissamut piffisarititaq sivitsorsinnaavaat § 132, imm. 2-mi sivilunerpaaffiliinissamut aalajangersakkap iluani.

Imm. 2. Qanoq iliornissamut piareersaat imm. 1-mi taagorneqartut eqqartuussap eqqartuussisummik malinaatinnissanut naammangippata, eqqartuussisuusut tamatumunnga taarsiullugu aamma imaluunniit akiliisitsisummik eqqartuussissuteqarsinnaapput, imaluunniit pisariaqassappat pineqartoq eqqartuullugu inissiisarfimmut inissinneqartussanngortissinnaavaat piffissami aalajangersimasumi, qaammatinik pingasunik sivilunerusinnaanngitsumik. Taamatut iliornermi § 151-imi aalajangersagaq taamatulli atuutissaq.

Imm. 3. Nakkutigisaanissap ingerlanneqaannarnissaa iluaqutaasorineqanngippat eqqartuussisuusut eqqartuussissut atorunnaarsissinnaavaat tamatumunngalu atatillugu allamik pineqaatissiillutik.

Kapitali 29

Inuiaqatigiinni sulisitaanissamik eqqartuussissut

§ 140. Inuiaqatigiinni sulisitaanissamik eqqartuussissut atorneqarsinnaavoq

- 1) iliuuseqartoq taamatut eqqartuunneqarnissaminut piukkunnaateqarpat, aamma

- 2) inatsisinik unioqputitsinerup peqqarniissusaa eqqarsaatigalugu inissiisarfimmiittussanngortitsinissaq piumasaqaasiinikkut utaqqisitaq imaluunniit nakkutigisassanngortitsinissaq naammassorineqanngippata.

§ 141. Eqqartuussisuusut inuiaqatigiinni sulisitaasussanngortitsillutik eqqartuussissuteqarnerminni aalajangissavaat pinerluuteqarsimasunik isumaginnittoqarfiup erseqqinnerusumik aalajangiinera naapertorlugu eqqartuussaq akissarsiaqarani inuiaqatigiinni sulisitaassasoq sivikinnerpaamik nalunaaquttap akunnerini 40-ni sivilunerpaamillu nalunaaquttap akunnerini 240-ni. Sulisussaataa-nermik aalajangigaaq naammassineqassaaq sivilunerpaamik piffissarititap iluani, tamannalu naatsorsorneqartassaaq akunnernut suliffiusunut naleqqiullugu. Sivilunerpaamik sulisitaanissamut piffissarititap pinerluuteqarsimasunik isumaginnittoqarfiup sivitsorsinnaavaa, taamaaliornissaq pissutsinit immikkut ittunit ilalernartinneqarpat, kisiannili nakkutigisaanissamut piffissarititap qaangernagu. Pinerluuteqarsimasunik isumaginnittoqarfiup sivilunerpaamik sulisitaanissamut piffissarititap sivitsorneqarnissaanik aalajangiinera eqqartuussap noqqaassuteqarnera naapertorlugu eqqartuussivimmut saqqummiunneqassaaq.

Imm. 2. Eqqartuussaq nakkutigineqassaaq piffissami eqqartuussisuusut aalajangiigaattut sivilusilimmi, sivilunerpaamik ukiuni marlunni. Taamaattorli nakkutigisaanermut piffissarititap atuukkunnaassaaq sulisussaataa-nerup naammassineqarnissaanut piffissarititap sivilunerpaaffissaa qaangiuppat, taamaassananili eqqartuussissummi allaanermik aalajangiisoqarsimappat. Siunertarisamut naleqquttuosorineqarpat eqqartuussisuusut aammattaaq piumasaqaasiinnaapput nakkutigisaanissamut eqqartuussissummi aalajangersakkat naapertorlugit, tak. §§ 133-136.

§ 142. Eqqartuussaq nakkutigisaanermi nalaani inatsisinik unioqputitseqqippat suliassarlu eqqartuussivimmut nakkutigisaanissaq qaangiutsinnagu saqqummiunneqarpat eqqartuussisuusut pinerluummut tamatumunnga inatsisinillu unioqputitsinerup siusinnerusukku eqqartuussissutaasimasumut ataatsimut pineqaatissiissuteqassapput. Tamanna pissutsinit ilalernartinneqarpat eqqartuussisuusut inatsisinik unioqputitseqqinneq kisiat pineqaatissiissuteqarfigisinnaavaat.

§ 143. Eqqartuussap inuiaqatigiinni sulisitaanissamik aalajangersagaq unioqputippagu, imaluunniit tamatumunnga atatillugu piumasarineqartutut aalajangersakkat unioqputippagit, suliassaq unnerluussisussaataitaasut eqqartuussivimmut uninngatinnagu saqqummiutissavaat, eqqartuussiviullu eqqartuussissut atorunnaartissinnaavaa tamatumunngalu atatillugu pineqaatissiissut alla eqqartuussissutigalugu. Pineqaatissiissummik nutaamik aalajangiinerminni eqqartuussisuusut eqqarsaatigissavaat inuiaqatigiinni sulisitaaneq qanoq annertutigisoq eqqartuussap naammassisimaneraa.

Imm. 2. Tamanna pissutsinit immikkut ittunit ilalernartinneqarpat eqqartuussisuusut taarsiullugu

- 1) eqqartuussaq mianersoqqusinnaavaat, imaluunniit
- 2) inuiaqatigiinni sulisitaanerup sivilunerpaaffissaa aamma nakkutigineqarnissamut piffissarititap sivitsorsinnaavaat killissarititap § 141, imm. 2-mi aalajangersakkap iluani.

Kapitali 30

Inissiisarfimmiittussanngortitsilluni nakkutigisassanngortitsilluni eqqartuussissut

§ 144. Inissiisarfimmiittussanngortitsineq nakkutigisassanngortitsinerlu ator- neqarsinnaapput nakkutigisassanngortitsineq imaluunniit inuiaqatigiinni sulisitaasussanngortitsineq naammassorineqanngippata, inatsisinik unioqputitsinerup peqqarniissusaa pissutigalugu.

Imm. 2. Iliuuseqartoq 18-it inorlugit ukiulik inissiisarfimmiittussanngortinneqarluni eqqartuunneqassanngilaq, aatsaalli eqqartuunneqarsinnaalluni pissutsit immikkut ittut taamatut pineqaatissiinissaq pisariaqartippassuk.

§ 145. Inissiisarfimmiittussanngortitsilluni nakkutigisassanngortitsillunilu eqqartuussissuteqarnermi eqqartuussisuusut aalajangissavaat eqqartuussaq inissiisarfimmut inissinneqassasoq piffissami aalajangersimasumi, qaammatinit pingasunit sivilisunerusinnaanngitsumi. Eqqartuussisuusut tamanna ilutigalugu aalajangissavaat eqqartuussaq kingusinnerusukkut nakkutigisaassasoq. Nakkutigisassanngortitsilluni eqqartuussissutit pillugit aalajangersakkat kapitali 28-miittut matumuuna assinganik atuutissapput.

Imm. 2. Inissiisarfimmiinnissamut piffissarititaq naammassineqareertinnagu misiligummik iperagaatitsisoqarsinnaanngilaq imaluunniit iperagaavitsitsisoqarsinnaanngilaq.

Kapitali 31

Inissiisarfimmut inissiineq

§ 146. Inissiisarfimmut inissiineq atorneqarsinnaavoq pisariaqaraangat

- 1) iliuuseqartup inatsisinik unioqqutitseqqinnissaa pinaveersaartinniarlugu, imaluunniit
- 2) inatsisinik unioqqutitsinerup peqqarniissusaa pissutigalugu.

Imm. 2. Iliuuseqartoq 18-it inorlugit ukiulik inissiisarfimmiittussanngortinneqarluni eqqartuunneqarsinnaanngilaq, aatsaalli taamatut eqqartuunneqarsinnaalluni pissutsit immikkut ittut taamatut inissiinissaq pisariaqalersippassuk.

§ 147. Inissiisarfimmut inissinneqarnerup sivilisussusissaa, ukiunit qulinit sivilisunerusinnaanngitsoq, eqqartuussissummi aalajangersarneqassaaq.

Imm. 2. Eqqartuussaq inissiisarfimmiitsitaanermi nalaani inatsisinik unioqqutitseqqippat eqqartuussisuusut pinerluummot tamatumunnga inatsisinillu unioqqutitsinermut siusinnerusukkut eqqartuussissutaasimasumut ataatsimut pineqaatissiissuteqassapput, taamatulli iliussanngillat siusinnerusukkut pineqaatissiissutaasimasooq naammassorigunikku. Taarsiullugu eqqartuussisuusut pinerloqqinneq kisiat pineqaatissiissutigisinnaavaat.

Imm. 3. Imm. 2 taamatuttaaq atuutissaaq eqqartuussaq inissiisarfimmiittussanngortinneqarluni eqqartuunneqareerluni suli inissiisarfimmut inissinneqarani inatsisinik unioqqutitseqqippat.

§ 148. Eqqartuussisuusut aalajangersinnaavaat eqqartuussaq Kalaallit Nunaanni imaluunniit Danmarkimi napparsimmavissuarmut nuunneqassasoq,

- 1) nuunneqarnissaa § 234, imm. 1. malillugu pisinnaanngippat,
- 2) eqqartuussaq inunnut § 156-imi pineqartunut ilaasutut isigineqartariaqarpat, aamma
- 3) eqqartuussap tamanna pissutigalugu inissiisarfimmiiginnarnissaa naleqqutinngippat.

Imm. 2. Eqqartuussaq § 161-imi pineqartunut ilaasutut isigineqartariaqarpat eqqartuussisuusut aalajangersinnaavaat immikkut isumagisassanngortinneqarluni nuunneqassasoq, nuunneqarneq § 234, imm. 1 malillugu pisinnaanngippat.

Imm. 3. Eqqartuussivik nuussinissamik aalajangiissaaq unnerluussisussaataasut imaluunniit pinerluuteqarsimasunik isumaginnittoqarfiup noqqaassuteqarnerat naapertorlugu. Pinerluuteqarsimasunik isumaginnittoqarfiup noqqaassutaa unnerluussisussaataasunut saqqummiunneqassaaq, taakkualu suliaasaaq eqqartuussivimmut sapinngisamik piaartumik saqqummiutissavaat. Nuussineq utaqqiisaasumik pisinnaavoq imaluunniit inissiisarfimmiinnissap sinnerani. § 163, imm. 2, taamatulli atuutissaaq.

§ 149. Inissiisarfimmiiffissap 2/3-ia, sivilinnerpaamilli qaammatit sisamat, ingerlareerpat Kalaallit Nunaanni Pinerluuteqarsimasunik Isumaginnittoqarfimmi aqutsisut aalajangissavaat eqqartuuss-

saq misiligummik iperagaassanersoq. Iperagaanerli siusinnerusukkut pisinnaavoq tamanna pissutsinit immikkut ittunit ilalernartinneqarpat.

Imm. 2. Misiligummik iperagaaneq aatsaat pisinnaavoq eqqartuussap atugai pissutigalugit iperagaanissaq inassutigiuminaatsinneqanngippat, pineqartup naammaginarumik najugaqarnissaa suliffeqarnissaalu imaluunniit allatut ittumik inuussutissaqarnissaa isumannaarneqarsimassalluni, aammalu pineqartoq piumasarineqartunik iperagaanermut atatitanik malinnikkumalluni neriorsuisimassalluni.

Imm. 3. Iperagaatitsinermi piumasarineqarpoq pineqartoq misiligummik iperagaanermi nalaani inatsisinik unioqqutitseqqissanngitsoq. Misiliummik iperagaaneq ukiunit pingasunit sivilunerusinnaanngilaq. Inissiisarfirmiiffissalli sinneruttup ukiut pingasut qaangersimappagit ukiut tallimat angulugit misiligummik iperagaaffiliisoqarsinnaavoq.

Imm. 4. Misiliummik iperagaanissamut piumasarisatut aalajangerneqarsinnaavoq eqqartuussaq misiligummik iperagaaffini tamaat ilaaniluunniit nakkutigineqassasoq. Saniatigut piumasarisatut aalajangersakkanik aalajangersaasoqarsinnaavoq nakkutigisassanngortitsilluni eqqartuussissuteqarnerup assinginik, tak. §§ 133-136.

§ 150. Misiliummik iperagaasoq misiligaaffimmi nalaani inatsisinik unioqqutitseqqippat misiligaaffillu sulii qaangiutinngitsoq suliaasaq eqqartuussivimmut saqqummiunneqarpat, eqqartuussi-suusut ataatsimut pineqaatissiissapput. Tamatumunnga taarsiullugu eqqartuussisuusut inatsisinik unioqqutitseqqinneq kisiat pineqaatissiissutigisinnaavaat, immaqalu tamanna ilutigalugu misiligummik iperagaanissamut piumasarineqartut allanngortillugit.

Imm. 2. Misiliummik iperakkap aalajangersakkat § 149, imm. 4 malillugu aalajangersarneqarsimasut unioqqutippagit suliaasaq eqqartuussivimmut saqqummiunneqassaaq, taakkualu

- 1) misiligummik iperagaq mianersoqqusummik tunisinnaavaat,
- 2) aalajangiussat allanngortissinnaavaat misiligummillu iperagaaffissaq sivitsorlugu § 149, imm. 3-mi sivilunerpaaffissatut aalajangikkap iluani, imaluunniit
- 3) aalajangersinnaavaat inissiisarfirmut inisseeqqittoqassasoq.

Imm. 3. Misiliummik iperagaq misiligaaffimmi nalaani inatsisinik unioqqutitseqqippat, tamatumunngalu unnerluunneqarani, imm. 2-mi aalajangersakkat taamatulli atuutissapput. Taamatuttaaq pineqassaaq misiligummik iperagaq nunami allami pinerluummut misiligaaffimmi nalaani pinerluutigisaminut eqqartuunneqarpat, eqqartuussissummut atatillugu pineqaatissiissutip sinneruttup naammassiarnissaa isummerfigineqarsimanani.

Imm. 4. Imm. 2, tak. Imm. 3 malillugu taamaallaat aalajangiisoqarsinnaavoq misiligummik iperagaaneq qaangiutsinnagu.

Imm. 5. Inissiisarfirmut inisseeqqiinissaq imm. 2, tak. Imm. 3, naapertorlugu aalajangiunneqarsimappat misiliummik iperagaatitseqqiisoqarsinnaavoq taamatut iliornissaq tulluurtuusorineqarpat.

Taamatut misiliummik iperagaanerup kingorna misiligaaffiliunneqartumut tunngatillugu piffissaritat aalajangersakkat § 149, imm. 3-miittut atuupput, ilanngaatigalugu piffissaq pineqartup siusinnerusukut misiliummik iperagaaffigisimasaa.

§ 151. Inissiisarfimmiittussanngortitaaneq qaammatinik sisamanik ataallugillunniit sivilissuseqarpat, inissiisarfimmiinnerullu 2/3-ia ingerlareersimappat Kalaallit Nunaanni Pinerluuteqarsimasunik Isumaginnittoqarfimmi aqutsisut iperagaavinnissaq pillugu aalajangiisnaapput.

Kapitali 32

Pinerluttunut inuusuttunut pineqaatissiissutit immikkut ittut

§ 152. Inuusuttunut immikkut ittumik ikiuinissamik aaqqiissuteqarluni eqqartuussuteqarneq ator-neqarsinnaavoq pinerluttoq eqqartuussinerup nalaani 18-it inorlugit ukioqarpat imaluunniit pissutsini immikkut ittuni 20-t inorlugit ukioqarpat.

Imm. 2. Inuusuttunut immikkut ittumik ikiuinissamik aaqqiissuteqarluni eqqartuussuteqarnermi eqqartuussisuusut aalajangissavaat eqqartuussaq inunnik isumaginninnermi oqartussaasunit nakkutigineqassaq inunnik isumaginninnermi inatsisit naapertorlugit ikiuinissamut aaqqiissutitalimmik. Aammalu eqqartuussisuusut aalajangissavaat inuusuttup pineqartup maleruassagai najoqqutassat, inunnik isumaginninnermi pisortat pineqartumut peqqussutigisaat. Tamannali aatsaat pisinnaavoq inunnik isumaginninnermi pisortat nakkutiginnikkumanerisa annertussusaa naapertorlugu.

Imm. 3. Eqqartuussisuusut pineqaatissiissutip sivilisunerpaaffissaa, amerlanertigut ukiunit marlunit sivilisunerusinnaangitsoq, aalajangissavaat. Pissutsinili immikkut ittuni ukiut pingasut angullugit sivilisunerpaaffiliisoqarsinnaavoq.

§ 153. Inunnik isumaginninnermi pisortat ikiuinissamik aaqqiissutit suussanersut inunnik isumaginninnermut inatsisit malillugit aalajangissavaat aammalu aalajangissavaat tamakku eqqartuussisuusut sivilisunerpaaffiliissutaata iluani, tak § 152, imm. 3, qanoq sivilisutigisumik atuutissasut.

§ 154. Eqqartuussaq sivilisunerpaamik piffissarititap eqqartuussisuusut aalajangersarsimasaasa atuunnerani inatsisinik unioqqutitseqqippat, suliassarlu piffissarititaq qaangiutsinnagu eqqartuussivimmut saqqummiunneqarpat, eqqartuussisuusut pinerluummut tamatumunnga aamma inatsisinik unioqqutitsinnermut siusinnerusukku eqqartuussissutaasimasumut ataatsimut pineqaatissiissapput. Tamanna pissutsinit ilalernartinneqarpat eqqartuussisuusut inatsisinik unioqqutitseqqinneq kisiat pineqaatissiissutigisinnaavaat.

§ 155. Eqqartuussap nakkutigineqarnissani pinaveersaartippagu imaluunniit inunnik isumaginninnermi pisortat pineqartumut najoqqutassiaat sanioqquppagit, unnerluussisussaataasut suliassaq eqqartuussivimmut saqqummiuteqqissinnaavaat, eqqartuussisuusullu eqqartuussissutip aalajangersagartai eqqaasitsissutigeqqissinnaavaat.

Imm. 2. Taamatut iliorneq eqqartuussap eqqartuussissummik maleruaatinneqarnissaanut naammassorineqanngippat eqqartuussisuusut eqqartuussaq aamma akiliisussanngortissinnaavaat.

Imm. 3. Inuusuttumut immikkut ittumik ikiuinissamik aaqqiissutit atuutsiinnarneqarnissaat siunertarisamut naleqquttuusorinangippat eqqartuussisuusut eqqartuussissut atorunnaartissinnaavaat tamatumunngalu atatillugu pineqaatissiissummik allamik aalajangiillutik.

Kapitali 33

Pinerluttunut tarnikkut nappaatilinnut pineqaatissiissutit immikkut ittut

§ 156. Iliuuseqartoq inatsisinik unioqutitsinerup nalaani niaqulaarsimappat imaluunniit tamatumunga assingulluinnartumik pissuseqarsimappat, imaluunniit eqqarsartaatsimigut innarluuteqarsimappat kapitali manna naapertorlugu pineqaatissiissuteqartoqarsinnaavoq, tamanna pisariaqarpat iliuuseqartup inatsisinik unioqutitseqqinnissaa pinaveersaartinniarlugu.

Imm. 2. Taamatuttaaq pineqassaaq iliuuseqartoq inatsisinik unioqutitsinerup kingorna, kisianni suli eqqartuussut nalunaarutigineqanngitsoq, eqqarsartaatsimigut innarluuteqalersimappat imaluunniit niaqulaalersimappat imaaliiallaanaq qaangilertugassaannngitsumik.

§ 157. Inatsisinik unioqutitseqqinnissaaq pinaveersaartinniarlugu siunertamut naleqquttuosorineqarpat eqqartuussisuusut aalajangersinnaavaat eqqartuussaaq Kalaallit Nunaanni Danmarkimiluunniit napparsimmavissuarmut imaluunniit paaqqinniffimmut allamut inissinneqassasoq.

Imm. 2. Pineqaatissiissutit sakkukinnerusut naammassorineqarpata pineqaatissiissutit taamaattut pineqaatissiissutigineqarsinnaapput. Tamakkununga ilanngullugu eqqartuussisuusut Kalaallit Nunaanni imaluunniit Danmarkimi napparsimmavissuarmi imaluunniit paaqqinniffimmi allami katsorsaasussanngortitsisinnaapput imaluunniit kapitali 28-mi aalajangersakkat naapertorlugit nakkutigisassanngortitsisinnaapput.

§ 158. § 157 naapertorlugu pineqaatissiissutit kinguneranik eqqartuussaaq napparsimmavissuarmut imaluunniit paaqqinniffimmut allamut inissinneqartussaappat, imaluunniit pineqaatissiissut taamatut iliornissamut periarfissiippat pineqaatissiissutit tamatuma sivisunerpaaffissaa ukiunut pingasunut aalajangerneqassaaq. Sivisunerpaaffissamut ilaapputtaaq pineqaatissiissutit § 159, tak. § 157 naapertorlugu kingusinnerusukkut aalajangerneqartut, maannamullu pineqaatissiissutaasumik oqilisaanermik kinguneqartut. Pissutsini immikkut ittuni eqqartuussisuusut unnerluussisussaataasunit noqqaavigineqarlutik aalajangiissuteqarnikkut nutaamik sivisunerpaaffiliisinnaapput ukiuni marlunni sivisussuseqartumik.

Imm. 2. Taamaattorli imm. 1-imi eqqartorneqartutut pisoqartillugu amerlanertigut sivisunerpaaffiliisoqartassanngilaq eqqartuussaaq pisuutitaasimappat toqutsinermut, ujajaanermut, kiffaanngissusiiaanermut, annertuumik nakuusernermut, § 98-imi eqqartorneqartutut sioorasaarinermut, ikuallatsitsinermut, pinngitsaaliilluni atoqateqarnermut imaluunniit kinguaassiuutitigut annertuumik pinerlunnermut allamut, imaluunniit siuliani taaneqartutut pinerloriaraluarsimanermut. Sivisunerpaaffiliisoqarsimanngippat pineqaatissiissutit allanngortinneqarnissaa imaluunniit atorunnaarsivinneqarnissaa pillugu apeqqut unnerluussisussaataasut eqqartuussivimmut saqqummiutissavaat aalajangiissuteqarnermiit ukiut pingasut qaangiuppata, taamali pisoqassanngilaq apeqqut eqqartuussivimmut ukiut kingulliit marluk iluini saqqummiunneqarsimappat. Tamatuma kingorna suliaasaq eqqartuussivimmut saqqummiunneqartassaaq minnerpaamik ukioq allortarlugu.

Imm. 3. Imm. 1-imi taaneqartuniit allaanerusumik pineqaatissiissuteqarnermi pineqaatissiissummut sivisunerpaaffiliisoqassaaq, ukiunit marlunnit sivisunerusinnaanngitsumik. Pissutsit immikkut ittut atuutsillugit eqqartuussisuusut unnerluussisussaataasunit noqqaavigineqarlutik aalajangiissuteqarnermikkut sivisunerpaaffissarititaq sivitsorsinnaavaat. Pineqaatissiissut tamarmiusoq ukiunit pingasunit sivisunerusinnaanngilaq.

§ 159. Unnerluussisussaataasut isumagisassaraat § 157 malillugu pineqaatissiissutip sivisuneru-sumik aammalu pisariaqartumiit annertunerusumik atuutsinneqannginnissaa.

Imm. 2. Pineqaatissiissutaasimasup eqqartuussissutigineqartup atorunnaarsinneqarnissaa allan-ngortinneqarnissaaluunniit eqqartuussisuusut aalajangiissavaat.

Imm. 3. Eqqartuussisuusut aalajangiissapput unnerluussisussaataasuniit, pinerluuteqarsimasunik isumaginnittoqarfimmiit, eqqartuussamiit, taassuma toqqammavigisaaniit imaluunniit napparsimmavis-suarmiit paaqqinniffimmiilluunniit noqqaassuteqarnerup kingorna. Pinerluuteqarsimasunik isumagin-nittoqarfimmiit, eqqartuussamiit, taassuma toqqammavigisaaniit imaluunniit napparsimmavissuarmiit paaqqinniffimmiilluunniit noqqaassut unnerluussisussaataasunut saqqummiunneqassaaq, taakkualu apeqqut sapinngisamik piaarnerpaamik eqqartuussivimmut saqqummiutissavaat. Eqqartuussamiit taas-sumaluunniit toqqammavigisaaniit noqqaassut akuerineqanngippat apeqqut eqqartuussivimmut aatsaat saqqummiunneqarsinnaavoq aalajangiissuteqarnermiit ukiup affaa ingerlareerpat.

§ 160. Eqqartuussaq pineqaatissiisummik naammassinninniaanerup nalaani inatsisinik unioq-quitseqqippat, eqqartuussisuusut pinerluummot tassunga inatsisinillu unioqquititsinermut siusinne-rusukkut eqqartuussissutaasimasumut ataatsimut pineqaatissiissuteqassapput, taamatulli iliuissanngillat siusinnerusukkut pineqaatissiissutaasimasooq naammassorigunikku. Tamatumunnga taarsiullugu eqqar-tuussisuusut pinerluuteqaqinnermut taamaallaat pineqaatissiisinnaapput.

§ 160 a. Inunnut, § 157 malillugu aalajangiinerup malitsigisaanik napparsimavimmi unitsinneqarsimasunut imaluunniit paaqqinniffimmi allami inissinneqarsimasunut, anisinnaatitaanermik il.il. akuersissuteqarnissaq pillugu Naalakkersuisut, social- aamma boligministeri kiisalu indenrigs- og sundhedsministeri isumaqatiginniarfigereerlugit, inatsiseqarnermut ministeri malittarisassanik aalajangersaasinnaavoq. Anisinnaatitaaneq il.il. pillugit akuersissutit nalunaarutigineqarnissaannut utertinneqarnissaannullu piginnaasaqarnerup, tarnikkut napparsimasunut katsorsaavinni nakorsaanermut, aamma social service pillugu inatsimmi § 108 malillugu najugaqarfinni, kommuninit, nunap ilaanit aamma namminersortunit ingerlanneqartuni, aqutsisumut aamma aqutsisup sinniisaanut, suliaassiissutigineqarsinnaanera pillugu, tassunga atatillugu Inatsiseqarnermut ministeri malittarisassanik aalajangersaasinnaavoq. Malittarisassat taakku malillugit aalajangiinerit, allaffissornikkut oqartussaasumut qaffasinnerusumut saqqummiunneqarsinnaannginnerat, inatsiseqarnermut ministerip tassunga atatillugu aammattaaq aalajangersinnaavaa.

Kapitali 34

Immikkut isumagisassanngortitsiseq

§ 161. Sivisussusilerneqanngitsumik immikkut paarisassanngortitsineq atorneqarsinnaavoq

- 1) iliuuseqartoq pisuutitaappat toqutsinermut, ujajaanermut, kiffaanngissusiiaanermut, annertuumik nakuuserluni pinerlunnermut, § 98-imi eqqaaneqartutut sioorasaarinermut, pinngitsaaliilluni atoqateqarnermut imaluunniit allamik kinguaassiutitigut annertuumik pinerlunnermut imaluunniit ikuallatsitsinermut imaluunniit pinerluutinik taaneqartunik tamakkuninnga iliuuseqariaraluarner-mut,
- 2) pinerluutigisap qanoq ittuunera aamma pineqartoq pillugu paasissutissat, pingaartumik siusinneru-sukkut pinerluutigisimasai, tunngavigalugit isumaqartoqartariaqarpat pineqartoq inuit allat inuune-rannik, timaannik, peqqissusaannik kiffaanngissusaannilluunniit navialisitseriataarsinnaasoq, aam-malu
- 3) navialisitsineq tamanna pinaveersaartinniarlugu immikkut isumagisassanngortitsinerup atorneqar-nissaa pisariaqarpat.

§ 162. Iperagaavinnissaq imaluunniit misiligummik iperagaanissaq pillugu eqqartuussisuusut aalajangiissapput. Misiligaaffik ukiunit tallimanit sivilisunerusinnaangilaq. Aammalu § 149, imm. 2-4-ni aalajangersakkat misiligummik iperagaanermi taamatulli atuupput.

Imm. 2. Misiliummik iperagaq misiligaaffimmi nalaani inatsisinik unioqqutitseqqippat imaluunniit misiligummik iperakkap aalajangersakkat § 149, imm. 4-miittut unioqqutippagit eqqartuussisuusut inatsisitigut kingunerititassaq pillugu § 150 malillugu aalajangiissapput.

Imm. 3. Misiliummik iperagaanissaq pillugu eqqartuussisuusut aalajangiissapput unnerluussisussaataasuniit, pinerluuteqarsimasunik isumaginnittoqarfimmiit, eqqartuussamiit imaluunniit taassuma toqqammavigisaaniit noqqaassuteqarneq malillugu. Pinerluuteqarsimasunik isumaginnittoqarfiup, eqqartuussap imaluunniit taassuma toqqammavigisaata noqqaassutaa unnerluussisussaataasunut saqqummiunneqassaaq, taakkualu apeqqut eqqartuussivimmut sapinngisamik piaartumik saqqummiutissavaat. Eqqartuussap imaluunniit taassuma toqqammavigisaata noqqaassutaa akuerineqanngippat apeqqut aatsaat eqqartuussivimmut saqqummiuteqqinneqarsinnaavoq aalajangiissuteqarnermiit ukiup affaa ingerlareerpat.

Imm. 4. Unnerluussisussaataasut isumagisassaraat immikkut paarisassanngortitsilluni eqqartuussissutip pisariaqartumiit sivilisunerusumik atuutinnginnissaa. Unnerluussisussaataasut misiligummik iperagaanissaq pillugu apeqqut eqqartuussivimmut saqqummiutissavaat eqqartuussisuteqarnermiit kingusinnerpaamik ukiut pingasut qaangiunnerini, tamatumalu kingorna ukioq allortarlugu. Inissiisarfimmut inisseeqqittoqarsimappat apeqqut eqqartuussivimmut saqqummiunneqassaaq inisseeqqinnermiit ukiut marluk qaangiunnerini, tamatumalu kingorna ukioq allortarlugu.

Kapitali 35

Toqqammavigisassat

§ 163. Inuk § 157 malillugu pineqaatissinneqassappat imaluunniit § 161 malillugu immikkut isumagisassanngortinneqassappat eqqartuussisuusut toqqammavigisassamik ivertitsisinnaapput, sapinngisamik ajornanngippat unnerluutigineqartup qaniginerpaasaasa arlaannik, suliassap ingerlanerani unnerluutigineqartumik ikiuisussamik taassumap illersuisua suleqatigalugu.

Imm. 2. Inuk imm. 1-im i taaneqartutut pineqaatissinneqarsimaguni imaluunniit paarisassanngortinneqarsimaguni toqqammavigisassaminik ivertitsivigineqassaaq. Taanna eqqartuussap qanoq inneranik malinnaaviginnissaaq isumagissallugulu inissinneqarnerata akuliunnerillu allat pisariaqartumiit sivilisunerusumik atuutsinneqannginnissaat. Toqqammavigisassaligaaneq atorunnaassaaq pineqaatissiissut atorunnaarsinneqavippat.

Imm. 3. Kalaallit Nunaanni toqqammavigisassat ilinniartinneqarnerannut, siunnersorneqarnerannut atorfinitsinneqarnerannullu attuumassuteqartunik suliaqartussamik toqqammavigisassanut ataqatigiissaarisumik inatsiseqarnermut ministeri toqqaasinnaavoq.

Imm. 4. Inatsiseqarnermut ministerip aalajangersassavai maleruagassat erseqqinnerusut toqqammavigisassaliisarnermut taakkualu aningaasarsiaannut tunngasut, kiisalu taakkua suliassaat pisinnaatitaanerallu erseqqinnerusut.

Kapitali 36

Pisinnaatitaaffinnik annaasaqarneq

§ 164. Pinerlunneq inuiaqatigiinni innuttaasutut pisinnaatitaaffiaganermik nassataqanngilaq.

Imm. 2. Taamaattorli kinaluunniit pinerluummuk eqqartuussaasimasooq suliamik, immikkut pisor-taniit piginnaatitaanermik imaluunniit akuersissummik peqarluni ingerlanneqartussaasumik, ingerlat-seqqusaajunnaarsinneqarsinnaavoq, pinerluutigisimasaq atorfirmik suliaqartitaanermilluunniit ator-

nerluinissamut tunngavissaqartumik navianartoqartitsippat.

Imm. 3. Pinerluut suliart imm. 2-mi taaneqartut sularinissaannut akornutaanersoq apeqqut pillugu unnerluussisussaataasunit imaluunniit pisortanit pisussaasumiit eqqartuussivimmut saqqummiunneqassaaq, inuup piginnaassuseqartitaanermik akuersissummilluunniit taamaattumik qinnuteqarluni itigartinneqarsimasup noqqaassuteqarnera naapertorlugu. Aalajangiunneqarpat suliffimmi tassani sulinnaajunaarsitaasoqassasoq apeqqut eqqartuussivimmut saqqummiuteqqinneqarsinnaavoq, siusinnerpaamilli ukiut marluk qaangiunnerini. Piginnaassuseqartitaaneq akuersissulluunniit aamma piffissarititaq taanna qaangiutsinnagu pisortamit pisussaasumit tunniunneqarsinnaavoq.

§ 165. Kinaluunniit suliassanik § 164, imm. 2-mi taaneqartunik sulialik pinerluummumut eqqartuunneqarnerminut atatillugu suliart pineqartumik ingerlatsiinnarsinnaajunnaarsinneqarsinnaavoq imaluunniit aalajangersimasunik suliarsinnaajunnaarsinneqarsinnaavoq, pinerluutigisimasaq atorfirmik atornerluinissamut tunngavissaqartumik navianartoqartitsippat.

Imm. 2. Tamannarpiaq atuuppoq suliassanik allanik suliartarnermut tunngatillugu, pissutsit immikkut ittut tamanna ilalernartippassuk. Maleruagassaq taannarpiaq malillugu selskabimik killeqartumik akisussaaffilimmik, selskabimik imaluunniit peqatigiiffimmik, immikkut pisortanit akuerineqartusamik, aningaasaateqarfimmilluunniit aallarniisuusinnaajunnaarsitsisoqarsinnaavoq imaluunniit taakkunani pisortaanerusinnaajunnaartitsisoqarsinnaavoq imaluunniit siulersuisunut ilaasortasinnaajunnaarsitsisoqarluni.

Imm. 3. Suliarsinnaajunnaarsitsineq ukiuni ataatsimiit tallimanut sivilissuseqartassaaq, inaarutaasumik eqqartuussissuteqarnermiit naatsorsorlugu, imaluunniit atuukkallartussanngorlugu, taamaattoqassappallu suliffeqarfimmi tassani suli sulisinnaajunnaarsitsisoqassappat apeqqut ukiut tallimat ingerlareerpata eqqartuussivimmut § 164, imm. 3-mi maleruagassatut aalajangikkat malillugit saqqummiunneqarsinnaavoq. Tamanna pissutsinit immikkut ittunit ilalernartinneqarpat inatsiseqarnermut ministerip imaluunniit ministerip taamatut piginnaatitaata akuerisinnaavaa eqqartuussivimmut suliassanngortitsineq pissasoq piffissarititaq imm. 1-imi taaneqartoq, ukiunik tallimanik sivilissusilik, qaangiut-sinnagu.

Imm. 4. Suliassat imm. 1-imi aamma 2-mi taaneqartut sularineqarneranni eqqartuussisuusut pineqartoq sulisinnaajunnaartissinnaavaat, suliassap inaarutaasumik aalajangiivigineqarnissaata tungaanut. Suliassami eqqartuussissutikkut aalajangerneqarsinnaavoq suliareqqitassanngortitsineq kingua-saataasumik sunniuteqassanngitsoq.

Kapitali 37

Arsaarinninneq

§ 166. Pinerlunnikkut iluanaarutit imaluunniit aningaasat tamatuma amerlaqatai tamarmik ilaannaalluunniit arsaarinnissutigineqarsinnaapput. Aningaasat amerlassusaasa aalajangerneqarnissaannut naammattumik tunngavissaq amigarpat aningaasat iluanaarutaasut amerlaqataattut nalileneqartut arsaarinnissutigineqarsinnaapput.

Imm. 2. Inatsisinik unioqqutitseqqinnissaq pinaveersaartinniarlugu pisariaqarsorineqarpat imaluunniit tamanna pissutsinit immikkut ittunit ilalernartinneqarpat, arsaarinnissutigineqarsinnaapput makku

- 1) pigisat pinerluummumut atorneqarsimasut imaluunniit atorneqarniartutut aalajangiussat,
- 2) pigisat pinerlunnikkut pilersitat, aamma
- 3) pigisat, pinerluutigineqartut.

Imm. 3. Pigisat iliuuseqartup inatsisit malillugit inuussutissarsiorneranut annertuumik pingaaruteqartut arsaarinnissutigineqassanngillat, arsaarinnissutaasinnaallutilli tamanna pissutsinit immikkut ittunit ilalernartinneqarpat.

Imm. 4. Pigisanik imm. 2-mi taagorneqartunik arsaarinninnissamut taarsiullugu arsaarinnissutigineqarsinnaapput aningaasat pigisat naleqataat imaluunniit naleqataasa ilaat.

Imm. 5. Imm. 2 malillugu arsaarinninnermut taarsiullugu aalajangersarneqarsinnaavoq pigisat pillugit aaqqiissuteqartoqassasoq, pinerluttulioqqinnissaq pinaveersaartinniarlugu.

Imm. 6. Peqatigiiffik eqqartuussissuteqarnikkut atorunnaarsinneqarpat, peqatigiiffiup pisuussutaitai, toqqorsiviutaa, allattaavii assigisaallu arsaarinnissutigineqarsinnaapput.

§ 167. § 166, imm. 1 malillugu arsaarinniffigineqarsinnaavoq kinaluunniit pinerlunnikkut toqqaannartumik iluanaaruteqarsimasoq.

Imm. 2. Pigisanik nalilinnillu § 166, imm. 2-mi aamma 4-mi taaneqartunik arsaarinniffigineqarsinnaavoq kinaluunniit inatsisinik unioqqutitsinnermut akisussaasuusoq, aamma kinaluunniit pinerluttoq sinnerlugu iluuseqarsimasoq.

Imm. 3. Pigisanut arsaarinnissutigineqartunut immikkut isumannaakkamik piginnittussaataanerit aatsaat atorunnaassapput eqqartuussisuusut aalajangiinerisigut piumasarisat imm. 2-mi taaneqartut assingi piumasaralugit.

Imm. 4. Inuit imm. 1-mi aamma 2-mi taaneqartut arlaat pinerlunnerup kingorna iluanaarutunik imaluunniit pigisanik § 166, imm. 2-mut ilaatinneqartunik imaluunniit tamakkununga piginnittussaataanerit atuisimappata tunniunneqartoq taassumaluunniit nalinga pissarsisumiit arsaarinnissutigineqarsinnaavoq, pissarsisup nalusimannigippagu tunniunneqartoq pinerluummut atassuteqartoq imaluunniit pissarsisoq tamatumunnga tunngatillugu annertuumik mianersuaalliorsimappat imaluunniit tunniunneqartoq tunissutaappat.

Imm. 5. Inuk imm. 1-4 malillugu arsaarinninnissamut akisussaasuusoq toquppat taassuma akisusaanera atorunnaassaaq. Taamaassanngilarli § 166, imm. 1 malillugu arsaarinnittoqarpat.

§ 168. Pigisat aningaasanik nalillit, pinerluummut pisuutitaasup pii, tamakkerlugit ilaannaalluunniit arsaarinnissutigineqarsinnaapput,

- 1) iliuuserisaq annertuumik pissarsissutaasinnaasutut isikkoqarpat, aamma
- 2) inatsisinik unioqqutitsineq immikkut peqqarniitsuuppat imaluunniit ikiaroonartut pillugit inatsisinik unioqqutitsineq.

Imm. 2. Piumasarineqartut imm. 1-mi atuutsillugit pigisat aningaasanik nalillit, pinerluttup aappaata inooqataataluunniit pissarsiarisimasai, tamaasa ilaannaalluunniit arsaarinnissutigineqarsinnaapput, taamatulli pisoqassanani

- 1) pigisat aningaasanik nalilik pinerlunnermiit imm. 1 malillugu arsaarinninnermut tunngaviusumiit ukiut tallimat sinnerlugit siusinnerusukkut pissarsiarineqarsimappat, imaluunniit
- 2) pigisat nalillip pissarsiarinerata nalaani aappariinneq imaluunniit inooqatigiinneq piusimannigippat.

Imm. 3. Piumasarineqartut mm. 1-mi atuutsillugit arsaarinnissutigineqarsinnaapput pigisat aningaasanik nalillit tamakkerlugit ilaannaalluunniit, tunniunneqarsimasut ingerlatsiviit sinnerlugit inatsisitigut akisussaasuusumut, pineqartup kisimiilluni imaluunniit qaniginerpaasani peqatigalugit aalajangiinikkut sunniteqarfigisai. Taamaassaartaaq pineqartoq ingerlatsiviit sinnerlugit inatsisitigut akisussaa- suusup isertitaasa ilaannik annertuumik aningaasarsiorpat. Taamaattorli arsaarinnittoqarsinnaanngilaq pigisat aningaasanik nalilik ingerlatsiviit sinnerlugit inatsisitigut akisussaasuusumut tunniunneqarsimappat pinerluummiit imm. 1 malillugu arsaarinninnermut tunngaviusumiit ukiut tallimat sinnerlugit siusinnerusukkut.

Imm. 4. Imm. 1-3 malillugit arsaarinnittoqarsinnaanngilaq pineqartup ilimanarsisippagu pigisat aningaasanik nalilik pissarsiarineqarsimasoq unioqqutitsinerunngitsumik periuseqarluni imaluunniit aningaasat unioqqutitsinani pissarsiarisimasat atorlugit.

Imm. 5. Imm. 1-3 malillugu pigisanik aningaasanik nalilinnik aalajangersimasunik arsaarinninnermut taarsiullugu aningaasat pigisat naleqataat ilaannaalluunniit arsaarinnissutigineqarsinnaapput.

§ 169. § 166, imm. 1 imaluunniit § 168 malillugit arsaarinnittoqarpat, inatsisinillu unioqqutitsinermut atasumik taarsiivigineqarnissamik piumasaqartoqarpat, arsaarinnissutit taarsissutissamut aki-liutitut atorneqarsinnaapput.

Imm. 2. Taamatorpiaq pineqassapput pigisat aningaasallu nalillit § 166, imm. 2 aamma 4 malil-lugit arsaarinnissutigineqartut, tamanna eqqartuussissummi aalajangerneqarsimappat.

Imm. 3. Eqqartuussap pisuni imm. 1-imi aamma 2-mi taaneqartuni pinerlineqartoq eqqartuussis-suteqarnerup kingorna taarsiivigisimappagu aningaasat arsaarinnissutit taakku amerlaqataannik ikili-sinneqassapput.

§ 170. Pigisat, ilusertik pissutigalugu pissutsinut allanut atuuttunut atasumik pinerluummut ator-neqarnissaminnut aarlerinaateqartut, arsaarinnissutigineqarsinnaapput, tamanna pinerluutip pinaveer-saartinnissaanut pisariaqarsorineqarpat. Piumasarineqartut assingi atuutsillugit pigisat aningaasanik nalillit, matumani ilanngunneqarlutik aningaasat, arsaarinnissutigineqarsinnaapput. § 166, imm. 5 taa-matulli atuutissaaq.

Immikkoortoq III

Pineqaatissiissutininik naammassinninneq

Kapitali 38

Pineqaatissiissutininik naammassinninnerit pillugit aalajangersakkat nalinginnaasut

Naammassinninnermi anguniakkat iliuusissallu

§ 171. Pineqaatissiisummik naammassinninnermut siunertaq pingaarneq tassaavoq pinerluttar-nermik killilersueqataanissaaq.

Imm. 2. Pingaarnertut siunertaasumik imm. 1. naapertorlugu isumaginninnermi naammassinnin-niaasussaatitaasup eqqartuussaq ikiorlugulu kaammattussavaa inuttut ineriartornerup, inooqatigiinnerup suliffeqarnerullu- aamma ilinniartitaanerup tungaasigut ineriartorneq aqutugalugu pinerluttarani inuu-niassammat aamma nakkutiginninneq isumannaatsuunerlu pineqaatissiisummik naammassinninnissa-mut pisariaqartut isumagalugit.

§ 172. Pineqaatissiisummik naammassinninnerup nalaani inuup inuunera allanik killilersuiffigi-neqassanngilaq, taamaallaat killilersuiffigineqassaaq killilersuutininik inatsimmi aalajangersarneqarsi-masunik imaluunniit pineqaatissiissutit nassataanik.

Naammassinninniaasussaatitat

§ 173. Kalaallit Nunaanni Pinerluuteqarsimasunik Isumaginnittoqarfimmi aqutsisut, Pinerluute-qarsimasunik Isumaginnittoqarfimmut Pisortaqarfiup ataaniittut, pineqaatissiissutininik inatsit manna naapertorlugu aalajangikkanik naammassinninniaaneq isumagissavaat, taamaattoorli tak. §§ 177 aamma 239-240.

§ 174. Kalaallit Nunaanni Pinerluuteqarsimasunik Isumaginnittoqarfimmi aqutsisut aalajanger-sagaqassapput pineqaatissiissutininik naammassinninnissamut atortussat qanoq aqqissuunneqarnissaat pillugit, paaqqinniffiit pinerluuteqarsimasunik isumaginnittoqarfimmit ingerlanneqartut maleruagas-saannik, matumani ilanngunneqarluni nakkutigineqarnermut immikkoortortaqarfiit, pensionit inissiisar-

fiillu aaqqissuunneqarnissaat pillugu aamma inissiisarfinni immikkoortorta qarfiit ammasut matoqqasullu aaqqissuunneqarnissaat pillugu.

§ 175. Naammasinninniaanermi pinerluuteqarsimasunik isumaginnitto qarfiup suleqatigissavai politiit eqqartuussiviillu, inunnik isumaginnitto qarfiit, peqqinnissa qarfiit aamma paaqqinniffiit il.il. pisortat inuinnaallu ingerlataat, ilinniartitsinissamik, sulisitsinissamik, katsorsaanissamik allatigullu ikiuunnissamik neqerooruteqartartut.

Aallartisaaneq

saaq.

§ 176. Pineqaatissiissutiniik naammasinninniaaneq sapinngisamik piaartumik aallartisarneqassaaq.
Imm. 2. Kalaallit Nunaanni Pinnerluuteqarsimasunik Isumaginnitto qarfiimmi aqutsisut aallartisaaneq pillugu maleruagassaliussapput.

Kapitali 39

Akiliisitsissutiniik naammasinninniaaneq

§ 177. Akiliisitsissutiniik politidirektør naammasinninniaassaaq § 128 naapertorlugu.

Imm. 2. Akiliisitsissut inissiisarfiimmut inissinneqarnikkut anigorneqassasoq pillugu eqqartuussisuusut § 128, imm. 4 malillugu aalajangiinerat naammassineqassaaq, inissiisarfiimmiittussanngortitaanikkut eqqartuussissutiniik naammasinnittarneq pillugu aalajangersakkat kapitali 43-miittut malillugit.

Kapitali 40

Eqqartuussissutiniik nakkutilliinertalinnik il.il. naammasinninneq

Nakkutilliinerup il.il. naammassineqarnissaa pillugu aalajangersakkat nalinginnaasut

§ 178. Nakkutilliineq aamma immikkut piumasarisat allat, inatsit manna naapertorlugu aalajangersarneqartut, pinerluuteqarsimasunik isumaginnitto qarfiup naammassissavai, taamaassananili eqqartuussisuusut aalajangiissutaanni allatut aalajangiisoqarsimappat.

§ 179. Nakkutilliisussaataitasut eqqartuussaq pisinnaatitaaffii pisussaataitanerilu, nakkutilliinerup immikkullu piumasarineqarsimasinnaasut nassatarisaat, pillugit ilitersussavaat, matumani ilanngunneqarluni piumasarisaniik unioqqutitsineq qanoq kinguneqassasoq.

Imm. 2. Aammattaaq nakkutilliisussaataitasut eqqartuussaq suleqatigalugu nakkutilliinerullu aallartinnerata kingorna piaarnerpaamik pilersaarusiussapput, nakkutilliinerup nalaani tamatumalu kingorna atuuttussamik. Pilersaarusiaq taanna eqqartuussap nakkutilliinerup nalaani atugarisaanut akuttunngittumik naleqqiunneqartassaaq pisariaqarpallu pissutsinut tamakkununga naleqqussarlugu allanngortinneqartassaaq.

Pinerluuteqarsimasunik isumaginnitto qarfiimmiit nakkutilliineq il.il.

§ 180. Nakkutilliinissaq pillugu piumasarisat nassatarisaannik eqqartuussap pinerluuteqarsimasunik isumaginnitto qarfik atassuteqarfigisassavaa isumaginnitto qarfiup erseqqinnerusumik aalajangiinera naapertorlugu, tamatumunnga ilaavoq pinerluuteqarsimasunik isumaginnitto qarfiimmut orniguttarnissaq taassumangalu pulaarneqartarnissaq. Eqqartuussap pinerluuteqarsimasunik isumaginnitto qarfik naju-

garisaq suliffigisarlu pillugit ilisimatittassavaa.

Imm. 2. Eqqartuussap piumasarisat immikkut ittut maleruassavai aamma pinerluuteqarsimasunik isumaginnittoqarfik piumasarisat immikkut ittut naammassinissaannut pisariaqartunik ilisimatittassallugu.

Imm. 3. Eqqartuussap noqqaavigineqarluni paasissutissiissutigisani uppersarsassavai.

Imm. 4. Eqqartuussap aamma allatigut maleruassavai aalajangersakkat, pinerluuteqarsimasunik isumaginnittoqarfiup aalajangigai nakkutiginninnermut piumasarineqarsinnaasimasunullu immikkut ittunut naammassinissutaasussat.

§ 181. Pinerluuteqarsimasunik isumaginnittoqarfik eqqartuussap nakkutilliinerup nalaani atugarisaanik malinnaaviginnissaaq, aamma pineqartup najugaqarfia suliffialu pillugit.

Imm. 2. Pinerluuteqarsimasunik isumaginnittoqarfiup piumasarisat immikkut ittut, pinngitsoorani malinneqartussat, aallartisarneqarnissaat malinneqarnissaallu nakkutigissavaa. Aammattaaq pinerluuteqarsimasunik isumaginnittoqarfiup malinnaavigissavai eqqartuussap atugarisai immikkut ittut, piumasarisat immikkut ittut atuutinngikkallartut atuutilersinneqarnerannik imaluunniit piumasarisat immikkut ittut atuutereersut allanngortinneqarnerannik atorunnaarsinneqarnerannilluunniit kinguneqarsinnaasut.

Imm. 3. Pinerluuteqarsimasunik isumaginnittoqarfiup aalajangersakkat, nakkutiginninnerup piumasarineqartullu immikkut ittut naammassineqarnissaannut pisariaqartut aalajangersassavai.

§ 182. Pinerluuteqarsimasunik isumaginnittoqarfiup eqqartuussaq sulinerup, inooqatigiinnerup inuttullu atukkat tungaasigut ilitersorniarlugu ikiorniarlugulu neqeroorfigissavaa, pineqartup pinerluttarani inuunissaminut periarfissaasa pitsaanerulernissaat siunertarlugu. Pinerluuteqarsimasunik isumaginnittoqarfiup tamatumunnga atatillugu aqqutissiuussavaa inunnut allanut, paaqqinniffinnut pisor-taqarfinnullu, inatsisit allat najoqqutaralugit ikiuisinnaasunut, atassuteqarnissaanut.

§ 183. Kalaallit Nunaanni Pinerluuteqarsimasunik Isumaginnittoqarfik maleruagassiusaaq nakkutilliinerup piumasarineqarsimasinnaasullu immikkut ittut naammassiniarneqarnissaat pillugit, aamma nakkutilliinerup aallartisarneqarnissaa, atassuteqarnerup akulikissusissaa aamma oqartussaasunik allanik il.il. suleqateqarnissaaq pillugit.

Piumasarianik unioqqutitsineq

§ 184. Pinerluuteqarsimasunik isumaginnittoqarfik iliuuseqassaaq nakkutigineqarneq pilerseqqin-niarlugu aamma piumasarisat immikkut ittut malinneqarnissaat qularnaarniarlugu, eqqartuussap nakku-tigineqarnini imaluunniit piumasarisat immikkut ittut naammassineqarnissaat sumiginnarpagit.

Imm. 2. Eqqartuussap eqqartuussisummi piumasarisat unioqqutippagit, piumasarianillu unioq-qutitsineq pinerluuteqariataarsinnaanermik nassataqarsinnaasorineqarpat, pinerluuteqarsimasunik isu-maginnittoqarfiup tamanna unnerluussisussaataasunut nalunaarutigissavaa.

Imm. 3. Eqqartuussap aalajangikkat imaluunniit piumasarisat allat unioqqutippagit pinerluuteqar-simasunik isumaginnittoqarfiup pineqartoq peqqussavaa aalajangikkat piumasarisallu maleruassagai. Assingusumik unioqqutitsinnermut atatillugu siusinnerusukkut peqqussutuliisoqarsimappat unnerluus-sisussaataasunut nalunaarusiortoqassaaq.

Imm. 4. Kalaallit Nunaanni Pinerluuteqarsimasunik Isumaginnittoqarfimmi aqutsisut suliassat piumasarianik unioqqutitsinnermut tunngasut pillugit maleruagassanik aalajangersaassaaq, aammalu imm. 1. naapertorlugu iliuusissat, imm. 2. aamma 3 naapertorlugit nalunaaruteqartarnissaaq aamma imm. 3. naapertorlugu peqqussutininik nalunaaruteqartarnissaaq pillugit.

Pinerluuteqarsimasunik isumaginnittoqarfiunngitsup oqartussaasulli allat nakkutilliinerat il.il.

§ 185. Oqartussaasoq susassaartoq isumaqatigiinniuteqarfigereerlugu inatsiseqarnermut ministeri maleruagassiussaaq oqartussaasut allat pinerluuteqarsimasunik isumaginnittoqarfiunngitsut nakkutilliinerat il.il. pillugu.

Kapitali 41

Eqqartuussissutinin inuiaqatigiinni sulisitaasussanngortitsinertalinnik naammassinninneq

§ 186. Inuiaqatigiinni sulisitaasussanngortitsilluni eqqartuussissutit pinerluuteqarsimasunik isumaginnittoqarfiup naammassissavai.

Imm. 2. Inuiaqatigiinni sulisitaasussanngortitsilluni eqqartuussissutip nassatarisaanik eqqartuussap sulisussaatiitanini naammassissavaa sivisunerpaaffissatut piffissaliussap iluani. Inuiaqatigiinni sulisitaaneq ingerlaavartumik naammassineqassaaq sivisunerpaaffissatut piffissaliussap iluani.

Imm. 3. Pinerluuteqarsimasunik isumaginnittoqarfik inuiaqatigiinni sulisitaanermi suliffigisassaq pillugu aalajangiissaaq. Eqqartuussap aamma maleruassavai aalajangersakkat, pinerluuteqarsimasunik isumaginnittoqarfiup inuiaqatigiinni sulisitaanerup naammassineqarnissaa pillugu aalajangersagai.

§ 187. Kalaallit Nunaanni Pinerluuteqarsimasunik Isumaginnittoqarfiup aqutsisui maleruagassiussapput inuiaqatigiinni sulisitaasussanngortitsilluni eqqartuussissutinin naammassinninnissaq pillugu.

§ 188. Pinerluuteqarsimasunik isumaginnittoqarfiup nakkutigissavaa eqqartuussap sulisussaatiitanini aalajangiussaq naammassineraa.

Imm. 2. Eqqartuussap unioqqutippagit inuiaqatigiinni sulisitaasussanngortitsilluni eqqartuussissummi aalajangersakkat imaluunniit aalajangersakkat, inuiaqatigiinni sulisitaanerup qanoq ingerlanneqarnissaa pillugu pinerluuteqarsimasunik isumaginnittoqarfiup aalajangersagai, pinerluuteqarsimasunik isumaginnittoqarfiup eqqartuussaq peqqussavaa aalajangersakkat maleruassagai. Tamanna pillugu sisinnerusukkut peqqussuteqartoqarsimappat unnerluussisussaatiitaasunut nalunaarusiortoqassaaq.

Imm. 3. Kalaallit Nunaanni Pinerluuteqarsimasunik isumaginnittoqarfimmi aqutsisut maleruagasiusapput suliasat inuiaqatigiinni sulisitaanissamut piumasarianik unioqqutitsinermut tunngasut suli-arineqartarnissaat pillugu.

§ 189. Nakkutigisassanngortitsilluni il.il eqqartuussissutinin naammassinninnissaq pillugu aalajangersakkat kapitali 40-miittut taamatuttaaq atuutissapput piumasarianik, § 141, imm. 2, oqaaseqatigiit pingajui, tak. §§ 133-136, malillugit aalajangersarneqarsimasunik naammassinninnermi.

Kapitali 42

Eqqartuussissutinin inissiisarfimmiittussanngortitsinertalinnik nakkutilliinertalinnillu naammassinninneq

§ 190. Inissiisarfimmiittussanngortitsilluni nakkutilliisussanngortitsillunilu eqqartuussissut tunngavigalugu inissiisarfimmut inissiineq naammassineqassaaq aalajangersakkat kapitali 43-miittut naapertorlugit, taamaattorli tak. § 145, imm. 2.

Imm. 2. Inissiisarfimmiittussanngortitsilluni nakkutilliisussanngortitsillunilu eqqartuussissut tunngavigalugu nakkutigineqarneq piumasarisallu immikkut ittut naammassineqassapput aalajangersakkat kapitali 40-miittut naapertorlugit.

Kapitali 43

Eqqartuussissutitik inissiisarfimmiittussanngortitsinertalinnik naammassinninneq

Aallaqqaasiutitut aalajangersakkat

Kinguartitsineq

§ 191. Kalaallit Nunaanni Pinerluuteqarsimasunik Isumaginnittoqarfimmi aqutsisut imaluunniit aqutsisut taamaaliornissamut piginnaatitaata aalajangersinnaavaat pineqaatissiisummik naammassinninnissaq kinguartinneqassasoq

- 1) eqqartuussamik qajassuussineq, matumani ilanngunneqarlutik taassuma sulinikkut, ilinniartitaanikut, ilaqutaqarnikkut imaluunniit peqqissutsikkut atugai, pissutigalugit tamanna ilalernartinneqarpat, aamma
- 2) inatsisinik maleruaatitsiniarnermik soqutiginninneq naammassinninnerup kinguartinneqarnissaanut akerliunngippat.

Imm. 2. Naammassinninnissamik kinguartitsisoqassappat eqqartuussap pinerluuteqannginnissaa piumasagaataavoq. Kinguartitsisoqassappat eqqartuussap piumasarisatut aalajangersakkanik maleruaanissaa aamma piumasagaataasinnaavoq, matumani ilanngunneqarluni pinerluuteqarsimasunik isumaginnittoqarfimmit nakkutigittissasoq, tak. kapitali 28 aamma 40.

Imm. 3. Eqqartuussap kinguartitsinissamut akuersissummut piumasarisatut aalajangersakkat maleruanngippagit imaluunniit pinerluuteqaqqippat akuersissut utertinneqarsinnaavoq.

Imm. 4. Kalaallit Nunaanni Pinerluuteqarsimasunik Isumaginnittoqarfimmi aqutsisut naammassinninnissamik kinguartitsineq pillugu suliaasat suliarineqarnissaannut maleruagassiussapput.

Saammaaneqarneq

§ 192. Kalaallit Nunaanni Pinerluuteqarsimasunik Isumaginnittoqarfimmi aqutsisut maleruagassiussapput saammaaneqarnermik suliaasat allaffissornikkut suliarineqarnissaat pillugu.

Imm. 2. Nakkutilliineq aamma piumasagaatit immikkut ittut, piumasagaasiinikkut saammaaneqarneq pillugu aalajangiineq naapertorlugu aalajangerneqarsimasut, aalajangersakkat kapitali 40-miittut malillugit naammassineqassapput.

Pineqaatissiissutip sivilissusissaanik naatsorsuineq

§ 193. Pineqaatissiissutip sivilissusissaanik naatsorsuinermi aalajangersakkat § 122-miittut naapertorlugit ilanngaatineqassaaq piffissaq, eqqartuussap tigusaaqqasimaffia, tigummigallagaaqqasimaffia imaluunniit eqqarsartaatsikkut misissorneqarluni uninngasimaffia.

Imm. 2. Kalaallit Nunaanni Pinerluuteqarsimasunik Isumaginnittoqarfimmi aqutsisut pineqaatissiissutip sivilissusissaanik naatsorsuinissaq pillugu maleruagassiussapput, matumani ilanngullugu eqqartuussaq naatsorsuineq pillugu sapinngisamik piaartumik ilisimatinneqassasoq aamma naammassinninnissap unitsikkallarneqarsimanera imaluunniit naatsorsuinermi tunngavigisat allanngornerat pissutigalugit kingusinnerusukkat naatsorsueqqinnermik.

Paaqqinniffinnut inissiineq taakkualu akornanni nuussineq

Oqartussaasut

§ 194. Kalaallit Nunaanni Pinerluuteqarsimasunik Isumaginnittoqarfimmi aqutsisut paaqqinniffinnut inissiineq taakkualu akornanni nuussineq pillugu aalajangiisuussapput.

Paaqqinniffiit il.il.

§ 195. Pineqaatissiissut inissiisarfirmiittussanngortitsinertalik inissiisarfirmi naammassineqas-saaq, taamaattorli tak. imm. 2 aamma imm. 3.

Imm. 2. Pineqaatissiissut inissiisarfirmiittussanngortitsinertalik sivikitsoq pissutsini immikkut ittuni isertitsivimmi naammassineqarsinnaavoq maleruagassat, Kalaallit Nunaanni Pinerluuteqarsima-sunik Isumaginnittoqarfimmi aqutsisunit politidirektøri suleqatigalugu aalajangersakkat, malillugit.

Imm. 3. Pineqaatissiissut inissiisarfirmiittussanngortitsinertalik aammattaaq aalajangersakkat § 234-miittut malillugit pissutsini immikkut ittuni naammassineqarsinnaavoq pinerluuteqarsimasunik isumaginnittoqarfiup pensioniutaani aamma paaqqinniffinni il.il. pinerluuteqarsimasunik isumaginnit-toqarfiup avataaniittuni.

Paaqqinniffimmik inissinneqarffissamik toqqaaneq

§ 196. Pineqaatissiissut inissiisarfirmiittussanngortitsinertalik ajornanngippat sapinngisamik naammassineqartassaaq eqqartuussap najugaqarfiata qanittuani. Paaqqinniffimmi sorlermi eqqar-tuussaq inissinneqassasoq aalajangiinermi aammattaaq eqqarsaatigineqassapput eqqartuussap nam-mineq kissaatigisai, pingaartumik pissutsit sulinermut, ilinniartitaanermut, ilaqaqarnermut imaluunniit peqqissutsinut tunngasut.

Imm. 2. Aalajangersagaq imm 1, oqaaseqatigiinni siullerniittoq sanioqqunneqarsinnaavoq

- 1) taamatut inissiineq § 197, imm. 2 malillugu inissiinermut qaqutigoortumik taarsiunneqarsinnaappat,
- 2) pineqartoq eqqartuunneqarsimappat pinerluummot inuiaqatigiinni pigisanut annertuumik nalilinnut sammisumik, aammalu inatsisunik atortitsinissamik soqutiginninneq eqqartuussap najugaqarfiata qanittuani inissiinermut akerliunngippat,
- 3) eqqartuussaq najugaqarfimmi qanittuaniittumi paaqqinniffimmi kingullermik inissitaanermi nalaani pinerluuteqarqissimappat imaluunniit paaqqinniffiup maleruagassaanik peqqarniitsumik unioqqu-titsisimappat,
- 4) eqqartuunneqartoq perorsaariaatsikkut, nakorsatut imaluunniit allatigut immikkut ittumik ikiorniarlugu,
- 5) pinngitsoortinniarlugu, inissinneqarsimasup qanigisami arlaata suliffigisaani inissinneqarnissaa,
- 6) pinngitsoortinniarlugu, eqqartuunneqarluni inissinneqarsimasup pinerluffigisimasaata atorfilittap imaluunniit taassuma qanigisaata suliffigisaani inissinneqarnissaa
- 7) eqqartuussaq innarlagaanissaanut illersorniarlugu tamanna pisariaqartutut isigineqartariaqarpat,
- 8) pinerluuteqarsimasunik isumaginnittoqarfiup paaqqinniffiutaani inissanik tamakkiisumik atuinissap tamanna pisariaqalersippagu.

Imm. 3. §§ 198-199 malillugit nuussinissaq pillugu aalajangiinermi imm. 1 aamma 2 taamatulli atuutissapput.

Inissiineq

§ 197. Pineqaatissiisummik inissiisarfirmiittussanngortitsinertalimmik naammassinninnissaq immikkoortortami ammasumi pissaaq, taamaattorli tak. imm. 2 aamma 3.

Imm. 2. Imm. 1. malillugu naammassinninnissaq affarmik matoqqasumi pisinnaavoq pineqartoq pinerlunnermut inunnik annertuumik navialisitsisinnaasumut eqqartuunneqarpat aammalu inatsisunik atuutsitsinissamik soqutiginninneq pissutigalugu ammasumi inissiinissaq ilalernartinneqanngippat, tak.

§ 214, imm. 2.

Imm. 3. Naammassinninnissaq matoqqasumi pisinnaavoq eqqartuussaq siusinnerusukkut inis-sitaasimalluni immikkoortortamit matoqqasumiit kingullermik iperagaasimappat, immikkoortortamut ammasumut nuutsinneqarnissamut piumasarineqartut naammassineqarsimanngimmata.

Nuussineq

§ 198. Immikkoortortami ammasumi inissitaq, tak. § 197, imm. 1 aamma 2, immikkoortortamut matoqqasumut nuutsinneqarsinnaavoq, pineqartoq

- 1) qimaasimappat imaluunniit qimaaniaraluarsimappat, imaluunniit
- 2) pinerloqqissimappat.

Imm. 2. Immikkoortortami ammasumi inissitaq immikkoortortamut ammasumut allamut nuutsin-neqarsinnaavoq

- 1) inissitaq qimaasimappat imaluunniit qimaaniaraluarsimappat,
- 2) inissitaq pinerloqqissimappat imaluunniit paaqqinniffimmi maleruagassanik annertuumik unioqqu-titsisimappat,
- 3) tamanna pisariaqartutut isigineqartariaqarpat inissitaq innarlerneqarnissaanut illersorniarlugu,
- 4) inissitaq nammineq tamanna kissaatigippagu aamma tamanna ilaqutariinnermut tunngasut immik-kut ittut imaluunniit inuttut atukkat allat tunngavissaqartippassuk, imaluunniit
- 5) pinerluuteqarsimasunik isumaginnittoqarfiup paaqqinniffiini inissat tamarmiusut atorneqarnissaasa tamanna pisariaqalersippagu.

Imm. 3. Isertitsivimmi inissitaq aalajangersakkat imm. 1-miittut malillugit immikkoortortamut matoqqasumut nuutsinneqarsinnaavoq aamma aalajangersakkat imm. 2-miittut malillugit isertitsivim-mut allamut imaluunniit immikkoortortamut ammasumut.

§ 199. Immikkoortortami matoqqasumi inissitaq immikkoortortamut ammasumut nuutsinne-qassaaq, isumannaatsuunissaq eqqarsaatigalugu immikkoortortami matoqqasumiititsinissaq pisariaqa-runnaarpat aammalu qajassuussinerusumik inissiinissaq inassutiginarpat. Nuussinissaq pillugu aalaja-ngiinnermi § 197, imm. 1 aamma 2 taamatulli atuutissapput.

Imm. 2. Affarmik matoqqasumi inissitaq ammasumut nuutsinneqassaaq, inatsisinik maleruaatitsi-niarneq tamatumunnga akerliujunnaarpat.

Allaffissornikkut aalajangikkat

§ 200. Kalaallit Nunaanni Pinerluuteqarsimasunik Isumaginnittoqarfimmi aqutsisut §§ 195-199 malillugit inissiisarneq aamma nuussisarneq pillugu suliassat suliarineqarnissaannut maleruagassius-sapput.

Inissitat paaqqinniffimmiinnerminni pisinnaatitaaffii pisussaaffiilu

Ilitsersuineq pilersaarusiorterlu

§ 201. Inissitaq paaqqinniffimmi inissinneqarnermi kingorna paaqqinniffimmit piaarnerpaamik ilitsersuunneqassaaq paaqqinniffimmiinnermi nalaani pisinnaatitaaffimminik pisussaaffimminillu aam-malumi pissutsinik allanik.

Imm. 2. Paaqqinniffik aammattaaq inissitaq suleqatigalugu inissiinerullu kingorna piaarner-paamik pilersaarusiussaaq inissinneqarnerup nalaani iperagaanerullu kingorna atuuttussamik. Pilersaa-rut taanna inissitaq inissitaanermini atugaanut akuttunngitsumik sanilliunneqartassaaq pisariaqassappal-lu tamakkununnga naleqqussarniarneqartassaaq.

Innersuussutit

§ 202. Inissitap maleruassavai innersuussutit paaqqinniffimmi sulisunit paaqqinniffiup suliassaa-
sa isumagineqarnerannut atatillugu innersuussutigineqartut.

Ataatsimooqateqartarnej

§ 203. Inissitap inissitanik allanik sapinngisamik ataatsimooqateqartinneqassaaq.

Imm. 2. Inissitap tamanna nammineq kissaatigippagu pissutsinillu ajornartinneqanngippat ne-
qeroorutigineqarsinnaavoq inissitanik allanik ataatsimooqateqartoqassanngitsoq imaluunniit killiler-
sukkamik ataatsimooqateqartoqassasoq.

Imm. 3. Ataatsimooqateqarani inissitaaneq taamaallaat allatigut aalajangerneqarsinnaavoq ma-
leruagassat §§ 223-miittut aamma 227, imm. 2-miittut malillugit.

Imm. 4. Kalaallit Nunaanni Pinerluuteqarsimasunik Isumaginnittoqarfimmi aqutsisut imm. 1 ma-
lillugu ataatsimooqateqarnissaq pillugu maleruagassiussapput, ilanngullugu inissitat namminneq inigi-
saminnik parnaaqatitsisinnaaneratt aamma inissitanik parnaarussisinnaaneq.

Sunniuteqaqataaneq

§ 204. Inissitat paaqqinniffimmi inuunerminnut sunniuteqaqataanissaminnut periarfissaqartinne-
qassapput.

Imm. 2. Inissitat suliassat, paaqqinniffiup isumannaallisagaaneranut inunnullu ataasiakkaanut
tunngasut, pillugit oqaloqatigiinnerni peqataasinnaatitaanngillat.

Imm. 3. Kalaallit Nunaanni Pinerluuteqarsimasunik Isumaginnittoqarfimmi aqutsisut inissitat
sunniuteqaqataanissaasa, ilanngullugu oqaaseqartittakkat toqqakkat aqqutigalugit, naammassiniarnis-
saanut maleruagassiussapput.

Nammineq pigisat aningaasaatillu

§ 205. Inissitap nammineq pigisaminik paaqqinniffimmi nassarsinnaatitaavoq pigisaqarsinnaa-
titaavoq aamma atuisinnaatitaavoq, tamannali atuutissanani torersuutitsinissap isumannaatsuunissallu
tungaasigut soqutigisassat pissutigalugit tamanna akuerineqarsinnaanngippat.

Imm. 2. Kalaallit Nunaanni Pinerluuteqarsimasunik Isumaginnittoqarfimmi aqutsisut imaluunniit
aqutsisut taamatut iliornissamut pisinaatitaat inissitat namminneq pigisaminnik paaqqinniffimmi nas-
sarsinnaanerannut, pigisaqarsinnaanerannut atuisinnaanerannullu killilersuutissanik maleruagassius-
sapput.

Imm. 3. Kalaallit Nunaanni Pinerluuteqarsimasunik Isumaginnittoqarfimmi aqutsisut maleruagas-
siussapput inissitat aningaasanik namminneq pigisaminnik paaqqinniffimmi nassarsinnaaneratt, pigisa-
qarsinnaaneratt atuisinnaanerallu pillugu.

Upperisarsiornej

§ 206. Inissitap palasimik imaluunniit assigisaanik upperisarsioqatimineersumik oqaloqateqar-
sinnaatitaavoq.

Sunngiffeqarnej

§ 207. Inissitap nammineq sapinngisamik isumagissavai suliassat imminut tunngasut, ilanngul-
lugit nerisassiornej eqqiluisaarnerlu.

Imm. 2. Paaqqinniffiup inissitat sunngiffimminni sammisassaannik neqeroorfigissavai.

Imm. 3. Inissitaq ullormut minnerpaamik nalunaaquttap akunnerani ataatsimi silamiissinnaa-titaavoq, tamannali atuutissanani paaqqinniffiup isumannaatsuunissaanut tamanna qaqutigootumik sanilliunneqarsinnaanngippat.

Isumaginninnerup tunngaatigut ikiuineq

§ 208. Paaqqinniffiup inissitaq ilitersuutissavaa ikiorlugulu pineqartup sulinikkut, ilinniartitaanikkut, inoqateqarnikkut, inuttullu atugaasa tungaasigut, makku anguniarlugit

1) pineqartup pinerluttarani inuunissaminut periarfissai pitsaanerulersinniarlugit, aamma

2) ajoqutit kiffaanngissusiagaanarup nassatarisai killilersimaarniarlugit.

Imm. 2. Paaqqinniffik imm. 1 malillugu sulinerminut atatillugu inunnut allanut, paaqqinniffinnut oqartussanullu, inatsisit allat naapertorlugit ikiuisussaasunut, attassuteqalernissamut aqutissiuussis-saaq.

Peqqissutsikkut ikiuineq

§ 209. Inissitaq nakorsamit katsorsartissinnaatitaavoq allatigullu peqqissutsimigut ikiorserneqar-sinnaatitaalluni.

Imm. 2. Justitsministerip inatsisitigut aalajangersinnaavaa pinerluuteqarsimasunik nakkutilliivimmi Danmarkimiittumi inissitap nuunneqarsinnaanissaa nakorsamik ikiorneqarnissamik allatulluunniit peqqissutsimut ikiorneqarnissaa siunertaappat, tak. *imm. 1.*

Sulineq ilinniartitaanerlu il.il.

§ 210. Inissitaq sulinissaminut pisinnaatitaavoq pisussaaffeqarlunilu sulinermi, ilinniartitaanermi sammisassamiluunniit akuerisami allami peqataanermigut.

Imm. 2. Kalaallit Nunaanni Pinerluuteqarsimasunik Isumaginnittoqarfimmi aqutsisut aalajanger-sagaq imm. 1-imiittoq sanioqqussinnaavaat paaqqinniffinnut aalajangersimasunut imaluunniit inis-sitanut aalajangersimasunut tunngatillugu, tamanna isumagisassat nalinginnaasut imaluunniit immikkut ittut pisariaqalersippassuk. Taamaattorli inissitat sulinissaminik ajornanngippat neqeroorfigineqar-tassapput.

Imm. 3. Inissitaq sammisassamik paaqqinniffimmit akuerineqartumik suliaqarumanngitsoq su-liffiup nalaani nammineq inigisaminiitinneqartassaaq imaluunniit allami innersuussamiissalluni.

§ 211. Immikkoortortami ammasumi inissitaq ajornanngippat paaqqinniffiup avataani sulisinne-qassaaq, taamaattoq tak. § 214, imm. 2. Paaqqinniffiup avataani sulinissamut akuerineqarnissaaq pillugu aalajangiineq aalajangersakkat § 214-imiittut malillugit aalajangiinerussaaq.

Imm. 2. Suliffimmik toqqaaneq pissutsini ataasiakkaani tamani aalajangerneqartassaaq inissitap atugarisai ataatsimut nalilersuiffigalugit. Aalajangiinnermi sapinngisamik eqqarsaatigineqassapput inis-sitap nammineq kissaatai aamma inissitap aamma iperagaanermi kingorna paaqqinniffiup avataani suliffissarsinissaminut ilinniarfissarsinissaminulluunniit periarfissai. Inissitaq ilitersuunneqassaaq atuartitaanikkut allamilluunniit ilinniartitaanikkut atuarfimmi ilinniakkamigut amigaatigisaminik imaluunniit inuussutissarsiorerup tungaatigut allatulluunniit ilinniartitaanikkut amigaatigisaminik pitsaanerusunngortitsinissaminut periarfissat pillugit.

§ 212. Inissitaq sulisinerminut akissarsiaqassaaq. Aamma inissitat suliffissanik amigaateqarneq pissutigalugu sulinissamik neqeroorfigineqarsinnaanngitsut imaluunniit napparsimanertik pissutigalugu sulinngitsut akissarsiaqartitaassapput. Taamatuttaaq pineqassapput inissitat paaqqinniffiup aalajangi-nera naapertorlugu imaluunniit allanik immikkut ittunik patsiseqarlutik sulinngikkallartut, imaluunniit

§ 210, imm. 2 malillugu sulinnigitsut.

Imm. 2. Inissitat allat inuttut pisariaqartitativik taamaallaat matussusertittassavaat.

§ 213. Paaqqinniffiup suliffiutai imatut aqqissuunneqarsimassapput inissitat sulinerminni pissut-sit atugaat isumannaallisaanikkut peqqissutsikkullu tamakkiisumik aarlerinaateqassanatik.

Imm. 2. Kalaallit Nunaanni Pinerluuteqarsimasunik Isumaginnittoqarfimmi aqutsisut maleruagas-saliussapput inissitat §§ 210-212 naapertorlugit sulinerat akissarsiaqartitaanerallu il.il. pillugit.

Inissitat paaqqinniffiup avataani inuiaqatigiinnut atassuteqarnerat

Paaqqinniffiup avataani angalaarnissamut akuerineqarnissaq (aneerneq)

§ 214. Inissitaq aneernissaminut akuerineqarsinnaavoq

- 1) aneernissamut siunertaasoq ilinniartitaanerup, sulinerup, katsorsartinnerup, ilaqutaqarnerup ima-luunniit allatut inuttut tunngasut tungaasigut naleqquttumik patsisissaqarpat,
- 2) aalajangersimasumik pissutissaqanngippat isumaqassalluni inissitaq aneernini iluatsillugu piner-luuteqaqqissasoq, naammassinninniaanerup ingerlateqqinnissaanik sumiginnaassasoq imaluunniit allatut iliuuseqarluni aneernissamik akuerineqarnini atornerlussagaa, aamma
- 3) inatsisinik maleruaatitsinissaq aneernissamik akuersissuteqarnermut allatigut akornusiinngippat.

Imm. 2. Immikkoortortami affarmik matoqqasumi ineqarnermini inissitaq paaqqinniffiup avataani sulinissamut akuerineqarsinnaanngilaq aammalumi aneernissamut akuerineqarsinnaanani, aatsaallu akuerineqarsinnaalluni pissutsit immikkut ittut tamatumunnga tunngavissaqartitsippata

Imm. 3. Immikkoortortami matoqqasumi ineqarnermini inissitaq paaqqinniffiup avataani suli-nissamut akuerineqarsinnaanngilaq aammalumi aneernissamut akuerineqarsinnaanani. Taamaattorli aneernissaq akuerineqarsinnaavoq sunngiussiartuaartitsinermut atatillugu, imaluunniit pissutsit immik-kut ittut tamatumunnga tunngavissaqartitsippata.

Imm. 4. Aneernissamut akuerineqarneq piffissamut aalajangikkamut killiligaassaaq, pineqaatis-siissutiv sivilissusaata naatsorsorneqarneranut ilaasussamik.

Imm. 5. Aneernissaq akuerineqassappat piumasarineqassaaq inissitaq pinerluuteqaqqissanngitsaq. Aneernissaq akuerineqassappat aamma allanik piumasaqaateqartoqarsinnaavoq, aneernissamut akueri-neqarnermik atornerluinaveersaartitsinissamut iluaqutissaasorisanik imaluunniit inatsisit tungaatigut naapertuilluarnermik misigisimanissaq eqqarsaatigalugu.

Imm. 6. Aneernissamut akuersissut utertinneqarsinnaavoq imaluunniit akuersissuteqarnermut atatillugu piumasarineqartut allanngortinneqarsinnaapput

- 1) inissitaq aneersimalluni utinngitsoorpat imaluunniit allatigut piumasarisatut aalajangiussat malin-ngippagit imaluunniit pinerluuteqaqqippat, imaluunniit
- 2) paasisat nutaat inissitap atugaanut tunngasut aalajangersimasumik patsisissaqartumik ilimanar-sisippassuk inissitap aneernissamut akuerineqarnini atornerlunniaraa.

Imm. 7. Kalaallit Nunaanni Pinerluuteqarsimasunik isumaginnittoqarfimmi aqutsisut aneernermut akuerineqarnissaq pillugu maleruagassiussapput.

Pulaarneq

§ 215. Inissitaq minnerpaamik sapaatip akunneranut ataasiarluni pulaartoqarsinnaatitaavoq min-nerpaammik nalunaaquttap akunneranik ataatsimik sivilissuseqartumik, ajornanngippallu nalunaa-quttap akunnerinik marlunnik sivilissuseqartumik. Inissitat aneernissamut akuerineqanngitsut ajor-nanngippat akulikinnerusumik sivilunerusumillu pulaartoqarnissamut akuerineqartariaqarpat.

Imm. 2. Inissitaq imm. 1-imi eqqaaneqartutut killilersugaanngitsumik pulaartoqarsinnaatitaavoq illersuisutut piginnaanilikkamit imaluunniit eqqartuussissuserisumit, pineqartumut illersuisussanngor-

tinneqarsimasunik imaluunniit pineqartup nammineq qinersimasaanit illersuisorissallugu pinerlunnermik suliasami paaqqinniffimmut inissinneqaatigisimasamini, imaluunniit pinerluummut suliasamat suli ingerlanneqartumut.

Imm. 3. Pinerluuteqarsimasunik isumaginnittoqarfiup aalajangersinnaavaa, pulaartut inissinneqarsimasup pulaarnissaannut akuersisummik piniaqqaassasut. Pulaarnissamat akuersisummut piumasqaataasinnaavoq, pulaartut misissorneqarnissamat akuersinissaat. Misissuineq tassaasinnaavoq pulaartut atisaannik misissuineq, pulaartut pulaarnerminni atugaannik, aamma annertunerusumik pulaartut qaatiguunik aamma nassataannik misissuineq.

Imm. 4. Kalaallit Nunaanni Pinerluuteqarsimasunik Isumaginnittoqarfimmi aqutsitut torersuunissap imaluunniit isumannaatsuunissap tungaatigut soqutigisassat aallaavigalugit aalajangiisnaapput pulaarnermut pisinnaatitaanermi killilersuineq pillugu maleruagassanik.

Meeqqat

§ 216. Inissitaq qitornaminik ataaseq inorlugu ukiulimmik paaqqinniffimmi najorteqarsinnaa-titaavoq, inissitap meeraq nammineq paarisinnaappagu aammalu meeqqap tassani najugaqarnissaa paaqqinniffimmi pissutsinit illersorneqarsinnaanngitsutut isigineqanngippat.

Allaffigeqatigiinneq oqarasuaatikkullu oqaloqatigiinnerit.

§ 217. Inissitaq allaffigeqatigiinnissamat oqarasuaatikkullu oqaloqateqarnissamat pisinnaatitaa-

Imm. 2. Paaqqinniffiup eqqartuussivik aalajangiitinnagu inissitamut allakkat aamma inissitap allagai ammarsinnaavai matusinnaallugillu. Tamanna inissitap najuunnerani pissaaq, taamaattoqassanngilarli imm. 3-mi taaneqartutut pisoqartillugu.

Imm. 3. Kalaallit Nunaanni Pinerluuteqarsimasunik Isumaginnittoqarfimmi aqutsitut torersuunissap imaluunniit isumannaatsuunissap tungaatigut soqutigisassat pissutigalugit imaluunniit inatsisinik unioqqutitsinermi pinerlineqartoq illersorniarlugu pisinnaatitaanermik killiliinissaq pillugu maleruagassiorsinnaapput imm. 1 malillugu, tamatumunnga ilanngullugit allakkanik atuaaneq, uninngatitsineq utertitsinerlu aamma oqarasuaatikkut oqaloqqusaannginneq aamma oqarasuaatikkut oqaloqatigiinnernik tusarnaarneq pillugit.

Imm. 4. Paaqqinniffimmi pisorta q imm. 3 malillugu aalajangersakkanik aalajangiissaaq.

§ 218. Inissitaq pisinnaatitaavoq nakkutilliiffigineqanngitsumik allakkatigut atassuteqarnissami-nut inatsiseqarnermut ministerimut, pinerluuteqarsimasunik isumaginnittoqarfimmi direktørimut, pinerluuteqarsimasunik isumaginnittoqarfimmi aqutsisumut, eqqartuussivinnut, Immikkut ittumik eqqartuus-sivimmut maalaaruteqarfigineqarsinnaasumut, Suliareqqitassanngortitsinissamik aalajangiisartunut, unnerluussisussaataasunut politiinullu, Folketingip ombudsmandianut, Inatsisartut ombudsmandianut, Folketingimut ilaasortanut, Inatsisartunut ilaasortanut, Inuit pisinaatitaanerat pillugu Europami eqqartuussivimmut, Inunnik naalliutsitsineq akiorniarlugu Europami ataatsimiititaliamut, Naalagaaffiit Peqatigiit inuit pisinnaatitaanerannut kommissioniannut, Naalagaaffiit Peqatigiit inunnik naalliutsitsineq akiorniarlugu ataatsimiititaliaannut aammalu illersuisumut akuerisaasumut imaluunniit eqqartuus-sissuserisumut, pineqartumut illersuisunngortitaasimasumut, pineqartup pinerlunnermik suliasami paaqqinniffimmut inissinneqaatigisaanut imaluunniit pinerlunnermik suliasamat suli ingerlanneqartu-mut illersuisussamisut toqqarsimasaanut.

Aviisinik, atuakkanik il.il. atuarsinnaatitaaneq

§ 219. Inissitaq aviisinik atuarnermigut aamma radiukkut aallakaatitanik tusarnaarnermigut fjern-synikkullu aallakaatitanik isiginnaarnermigut il.il. paasisassarsiornissaminut periarfissaqartitaassaaq.

Imm. 2. Inissitaq atuakkanik atorniartarfik pisortat ingerlataat aqqutigalugu atuakkanik atuagassianillu atorniarsinnaatitaavoq.

Tusagassiuutinut atassuteqarneq

§ 220. Inissitaq tusagassiuutinut paaqqinniffimmi oqaaseqarsinnaatitaavoq tamatumunngalu atattillugu assilitilluni.

Imm. 2. Taamaattorli Kalaallit Nunaanni Pinerluuteqarsimasunik Isumaginnittoqarfimmi aqutsisut aalajangiisinnaapput imm. 1 malillugu pisinnaatitaanermik killilersuineq pillugu maleruagassanik, paaqqinniffimmi isumannaatsuunissaq eqqarsaatigalugu, inatsisinik unioqqutitsinermi pinerlineqartoq illersorniarlugu imaluunniit inatsisit tungaasigut naapertuilluarnermik misigisimanerup erseqqissumik ajoquserneqarnissaa akiorniarlugu.

Imm. 3. Kalaallit Nunaanni Pinerluuteqarsimasunik Isumaginnittoqarfimmi aqutsisut imm. 2-mi aalajangersakkat malillugit aalajangiissapput.

Inissitaq akuliuffigalugu iliuutsit

Misissuiffiginninneq

§ 221. Paaqqinniffiup misissorsinnaavaa pigisat suut inissitap inigisaminiitinnerai imaluunniit nammineq tigumminerai (misissuineq), taamatut misissuinnissaq pisariaqarpat torersuutitsinissamik aalajangersakkat malinneqarnissaa imaluunniit isumannaatsuunissamik nakkutiginninnissaq qulakkeerniarlugu, matumani ilanngullugit

- 1) inissitap paaqqinniffimmut inissinneqarnerani,
- 2) pulaartoqarnerup siornatigut kingornatigullu,
- 3) paaqqinniffimmiit imaluunniit isersimaartarfittut immikkoortortamiit qimagussimanerup siornatigut kingornatigullu,
- 4) inissitaq pasillerneqarpat pigisanik tigummisassarinnngisaminik tigummisaqartoq.

Imm. 2. Paaqqinniffimmi pisortaq isumannaatsuunissap tungaatigut soqutigisassat pissutigalugit aalajangiisinnaavoq inissitap inuttaa annertunerusumik misissuiffigineqassasoq, aalajangersimasumik pissutissaqarluni isumaqartoqarpat inissitaq pigisanik tigummisassarinnngisaminik tigummisaqartoq. Timimik taamatut misissuineq taamaallaat pisassaaq nakorsaq peqataatillugu. Nakorsap isummerfigissavaa misissortinnermut atatillugu anniarnissaq navialisitsisinnaanerlu eqqarsaatigalugit kiisalu inissitap qanoq innera tunngavigalugu misissuinnissaq nakorsanit illersorneqarsinnaanersoq.

Imm. 3. Misissuisoqassanngilaq tamanna akuliunnerup siunertaanut aamma narrunarsaanissamut inuummarlutsitsinissamullu akuliunnerup nassatarisassaanut ilimagineqarsinnaasunut sanilliullugu naleqqutinngitsumik akuliunnerussappat.

Imm. 4. Misissuineq pissutsit tassunga tunngasut najoqqutaralugit sapinngisamik qajassuartumik pissaaq. Atisaajaalluni misissuineq taamaallaat qaqutiguinnaq pissaaq aamma inissitap suaassuseqatiginngisai najuutsillugit. Taamaassanngilarli peqqinnissaqarfimmi sulisunut.

Imm. 5. Kalaallit Nunaanni Pinerluuteqarsimasunik Isumaginnittoqarfimmi aqutsisut maleruagassaliussapput inissitap timaanik inigisaanillu misissuinnermut tunngasunik.

Imm. 6. Paaqqinniffik inissitamik assiliisinnaatitaavoq aamma inuaanik ipaasiuisinnaatitaavoq kingusinnerusukkut kinaassusersineqarnissaa siunertarlugu. Kalaallit Nunaanni Pinerluuteqarsimasunik Isumaginnittoqarfimmi aqutsisut maleruagassiorsinnaapput oqaaseqatigiit siulliit naapertorlugit assiliineq inussanillu ipaasiuineq pillugu, matumani ilanngullugu tamakkuninnga paarsaqarnissaq aamma aserorterinnissaq.

§ 221 a. Inissiisarfiup pisortaata imaluunniit inuup tamatumunnga piginnaatitaasup aalajangersinnaavaa inissinneqarsimasoq supoorsilluni misiligummik imaluunniit quumik misiligummik tunniussissasoq, imigassamik, ikiaroornartunik allatigulluunniit akuutissanik inatsisit nalinginnaasumik atuuttut malillugit inerteqqutaasunik iisaqarsimasinnaanera misissorniartarlugu.

Imm. 2. § 221, imm. 4, assigisaanik atorneqassaaq.

Imm. 3. Supoorsilluni misiligitit nakkutigineqarnissaasa aamma quumik misiligitit nakkutigineqarnissaasa piviusunngortinnissaannut Kalaallit Nunaanni Pinerluuteqarsimasunik Isumaginnittoqarfiup aqutsisui maleruagassanik aalajangersaassapput.

Pissaanermik atuineq

§ 222. Paaqqinniffik inissitamut pissaanermik atuisinnaavoq, tamanna pisariaqarpat

- 1) nakuusernissamik aarlerinartorsiorneq pinngitsoortinniarlugu imaluunniit sakkortuumik pinaaserneq ajugaaffiginiaarlugu,
- 2) imminornissaq imaluunniit allatut imminut ajoquserniarneq akornuserniarlugu,
- 3) qimaanissaq akornuserniarlugu imaluunniit qimaasoq unitsinniarlugu imaluunniit
- 4) pineqaatissiissutitut peqqussutaasoq pinngitsaaliissummik naammassitinniarlugu, tamatuma ingerlaannaq naammassineqarnissaa pisariaqaraangat aamma inissitap paaqqinniffimmi sulisut tamanna pillugu innersuussutaat akueriumanngikkaangagit imaluunniit malikkumanngikkaangagit.

Imm. 2. Pissaanermik atuisoqarsinnaavoq eqqornaveeqqummik atuinikkut, anaatamik atuinikkut imaluunniit peberspray-imik atuinikkut.

Imm. 3. Pissaanermik atuisoqassanngilaq tamanna akuliunnerup siunertaanut aamma narrunarsaanissamut inuummarlutsitsinissamullu, akuliunnerup nassatarisassaatur ilimagineqarsinnaasunut, sanilliullugu naleqqutinngitsumik akuliunnerussappat.

Imm. 4. Pissaanermik atuineq pissutsit apeqqutaatillugit sapinngisamik qajassuartumik pisassaaq. Pissaanermik atuinerup kingorna pineqartoq nakorsamit misissorneqassaaq nappaateqartoqarnera pasitsaanneqarpat, matumani ilanngullugu pissaanermik atuinerup atatillugu inissitaq ajoqusersimanersoq, imaluunniit inissitap nakorsamit ikiorneqarnissani noqqaassutigippagu.

Imm. 5. Kalaallit Nunaanni Pinerluuteqarsimasunik Isumaginnittoqarfimmi aqutsisut maleruagas-siussapput inissitanut pissaanermik atuineq pillugu.

Kisimiittussanngortitaaneq

§ 223. Paaqqinniffimmi pisortap imaluunniit inuup taamaaliornissamut piginnaatinneqartup inissitaq kisimiittussanngortissinnaavaa, tamanna pisariaqarpat qimaanissaq, pinerluuteqarnissaq imaluunniit sakkortuuliornissaq pinaveersaartinniarlugu

Imm. 2. Tunngavissaqarpat isumaqassalluni kisimiititsilluni inissiinissamut imm. 1-im piumasarineqartut naammassineqarsimasut, paaqqinniffiup inissitaq kisimiittussanngortikkallarsinnaavaa, kisimiittussanngortitsinissaq pillugu apeqqutip suliarineqarnerata nalaani.

Imm. 3. Inissitaq kisimiititassanngortinneqartoq nammineq inigisamini imaluunniit immikkoortortami inimi immikkut ittumi immikkoortinneqarluni inissinneqassaaq. Taamatut inissitaanerup nalaani inissitaq inuunermini allanik killilersuiffigineqassanngilaq, taamaallaat inimi kisimiititaalluni inissitaanerup nassataanik killilersuiffiginninnernik, tak. § 172.

Imm. 4. Kisimiittussanngortitsisoqassanngilaq allanit avissaartitaaneq akuliunnerup siunertaanut aamma narrunarsaanissamut inuummarlutsitsinissamullu, akuliunnerup nassatarisassaatur ilimagineqarsinnaasunut, sanilliullugu naleqqutinngitsumik akuliunnerussappat.

Imm. 5. Kisimiittussanngortitsineq pissutsit najoqqutaralugit sapinngisamik qajassuartumik ingerlanneqassaaq.

Imm. 6. Kisimiittussanngortitsineq ingerlaannaq kipitinneqassaaq taamaaliornissamut piumasarineqartut atuukkunnaarpata. Paaqqinniffiup minnerpaamik sapaatip akunneranut ataasiarluni isummerfigisassavaa kisimiittussanngortitsineq tamakkiisumik ilaannakortumilluunniit atorunnaarsinneqassanersoq.

Imm. 7. Kalaallit Nunaanni Pinerluuteqarsimasunik Isumaginnittoqarfimmi aqutsisut maleruagasiussapput kisimiittussanngortitsisarneq pillugu, matumani ilanngullugu nalunaaruteqarnissamut pissaaneq pillugu.

§ 223 a. Torersuunissaq- imaluunniit isumannaatsuunissaq pissutigalugit inissinneqarsimasup sivikiitsumik nammeneq inigisamini imaluunniit immikkut ittumik inimi nakkutilliiffiusartumi inissisimanissaa pillugu sullissiviup aalajangiineri, § 223-imi aalajangersakkani ilaatinneqanngillat.

Imm. 2. Imm. 1 malillugu inissinneqarsimasut inissisimaffimmiinnissaat pillugit Kalaallit Nunaanni pinerluttutik isumaginnittoqarfimmi aqutsisut malittarisassanik aalajangersaassapput.

Paffequtit savimerngit

§ 224. Paffequtit savimerngit atorneqasinnaapput, pisariaqarpat

- 1) nakuusernissamik aarlerinartorsiorneq pinngitsoortinniarlugu imaluunniit sakkortuumik pinaaserneq ajugaaffiginiarlugu,
- 2) imminornissaq imaluunniit allatut imminut ajoquserniarneq akornuserniarlugu,
- 3) qimaanissaq akornuserniarlugu

Imm. 2. Paffequtit savimerngit atorneqassanngillat tamanna akuliunnerup siunertaanut aamma narrunarsaanissamut inuummarlutsitsinissamullu, akuliunnerup nassatarisassaatur ilimagineqarsinnaasunut, sanilliullugu naleqqutinngitsumik akuliunnerussappat.

Imm. 3. Paffequtit savimerngit atorneqassapput pissutsit najoqqutaralugit sapinngisamik qajassuartumik.

Imm. 4. Kalaallit Nunaanni Pinerluuteqarsimasunik Isumaginnittoqarfimmi aqutsisut maleruagasiussapput paffequtit savimerngit atorneqarnissaat pillugu, matumani ilanngullugit nakorsamit nakkutigineqarnissaq aamma allatut nakkutigineqarnissaq pillugu.

Ini nakkutilliiffiusoq, ini isumannaarsagaq aamma pinngitsaaliissummik susinnaajunnaarsitsineq

§ 225. Paaqqinniffimmi pisortaq imaluunniit inuk taamaaliornissamut piginnaatinneqartoq aalajangiinnaavoq inissitaq inimi nakkutilliiffiusumi imaluunniit inimi isumannaarsakkami inissinneqassasoq, inimilu isumannaarsakkamiinnermi nalaani pinngitsaaliissummik susinnaajunnaarsinneqassasoq, atorlugit qitequtaasat, assannut isikkanullu qilerutit kiisalu aaqqatit, tamanna pisariaqarpat

- 1) nakuusernissamik aarlerinartorsiorneq pinngitsoortinniarlugu imaluunniit sakkortuumik pinaaserneq ajugaaffiginiarlugu,
- 2) imminornissaq imaluunniit allatut imminut ajoquserniarneq akornuserniarlugu.

Imm. 2. Taamaattorli inimut nakkutilliiffiusumut isumannaarsakkamullu inissiisoqassanngilaq aamma pinngitsaaliissummik susinnaajunnaarsitsisoqassanngilaq tamanna akuliunnerup siunertaanut aamma narrunarsaanissamut inuummarlutsitsinissamullu, akuliunnerup nassatarisassaatur ilimagineqarsinnaasunut, sanilliullugu naleqqutinngitsumik akuliunnerussappat.

Imm. 3. Ininut nakkutilliiffiusunut inimullu isumannaarsakkamut inissiineq aamma pinngitsaaliissummik susinnaajunnaarsitsineq pissutsit najoqqutaralugit sapinngisamik qajassuartumik pissaq.

Imm. 4. Inimi isumannaarsakkami inissinneqarsimasumik pinngitsaaliinikkut susinnaajunnaar-

sitsinermi paaqqinniffiup nakorsaq inissitamik ingerlaannaq nakkutiginnikkiartoqqussavaa. Nakorsap pineqartoq misissussavaa, misissussanaguli nakorsaq isumaqaruni taamatut misissuinissaq pisariaqanngitsoq.

Imm. 5. Inimi nakkutilliiffiusumi aamma inimi isumannaarsukkami pinngitsaaliissumik susinnaajunnaarsitsinertaqanngitsumik inissiinermi nakorsaq aggeqquneqassaaq pasitsaanneqarpat inissitaq napparsimasoq, imaluunniit ajoqusersimasoq imaluunniit inissitap nammeneq nakorsamit ikiorneqar-nissani noqqaassutigippagu.

Imm. 6. Kalaallit Nunaanni Pinerluuteqarsimasunik Isumaginnittoqarfimmi aqutsisut maleruagas-saliussapput init nakkutilliiffiusut isumannaarsakkallu akuerineqarnissaat pillugit aamma inimik nak-kutilliiffiusumik inimillu isumannaarsakkamik atuisarneq aamma pinngitsaaliissummik susinnaajun-naarsitsisarneq pillugit, matumunnga ilanngullugit nakorsamit nakkutigineqarnissaq nakkutigineqarne-rillu allat.

Maleruagassanik unioqqutitsinerit

§ 226. Inissitaq paaqqinniffimmi pisortamit imaluunniit inummit taamaaliornissamut pisinnaatin-neqartumit maleruagassanik unioqqutitsinermut pineqaatissinneqarsinnaavoq

- 1) § 202-mik unioqqutitsiguni,
- 2) takkutinngitsooruni, qimaaguni imaluunniit taamatut ilioriaraluaruni,
- 3) § 210, imm. 1 malillugu sulisussaatitaanermik sumiginnaasimaguni,
- 4) § 221 a malillugu supoorsilluni misiligummik imaluunniit quumik misiligummik tunniussinissaq itigartitsissutigineqarpat,
- 5) imigassamik, ikiaroornartunik imaluunniit akuutissanik allanik inatsit nalinginnaat malillugit inerteqqutaasunik iisisimanermi,
- 6) pinerluttulerinermi inatsisinik unioqqutitsiguni, unioqqutitsineq aamma ilaqarpat paaqqinniffimmi torersuutitsinissamik isumannaatsuunissamillu immikkut innarliisumik,
- 7) maleruagassanik, Kalaallit Nunaanni Pinerluuteqarsimasunik Isumaginnittoqarfimmi aqutsisut aalajangigaannik, unioqqutitsiguni, maleruagassani aalajangerneqarsimappat unioqqutitsineq pineqaatissiinermik nassataqarsinnaasoq, aamma
- 8) maleruagassanik, paaqqinniffimmi pisortap aalajangersagaanik, unioqqutitsiguni, maleruagassani aalajangerneqarsimappat unioqqutitsineq pineqaatissiinermik nassataqarsinnaasoq.

Maleruagassanik unioqqutitsinermut pineqaatissiissutit

§ 227. Maleruagassanik unioqqutitsinermut pineqaatissiissutitut atorneqarsinnaapput mianersoq-qusineq, akiliisitsineq, aneersinnaanermut akuersissummik atorunnaarsitsineq aamma kisimiittussann-gortitsineq.

Imm. 2. Taamaattorli kisimiittussanngortitsineq taamaallaat atorneqarsinnaavoq unioqqutitsinerni makkunani:

- 1) takkutinngitsoorneq imaluunniit qimaaneq,
- 2) sakkussanik isertorluni eqqussineq imaluunniit pigisaqarneq,
- 3) inissisimaqatinut imaluunniit sulisunut nakuuserneq nakuusernissamilluunniit sioorasaarineq,
- 4) § 221 a malillugu supoorsilluni misiligummik imaluunniit quumik misiligummik tunniussinissaq itigartitsissutigineqarpat,
- 5) imigassanik imaluunniit ikiaroornartunik imaluunniit aanngajaarniutit allat, inatsit nalinginnaasoq malillugu inerteqqutaasut isertorluni eqqussineq, pigisaqarneq imaluunniit imigassartorneq ikiaroornartutornerlu, aamma
- 6) unioqqutitsinerit annertuut akulikitsumillu iliuuserineqartartut allat.

Imm. 3. Aneersinnaanermut akuersissummik atorunnaarsitsineq taamaallaat atorneqarsinnaavoq

inissitaq aneersimalluni takkutinnitsoorpat imaluunniit aamma akuersissuteqarnermi piumasarineqartut malinnigipagit.

Imm. 4. Akiliisitsisoqarsinnaavoq aneernissamut akuersissummik atorunnaarsitsinermit kisimiittussanngortitsinermullu peqatigitillugu.

Imm. 5. Maleruagassanik unioqqutitsinermut pineqaatissiissummik naammassinninnissaq tamakkiisumik ilaannakuusumilluunniit pinngitsoortinneqarsinnaavoq piumasaralugu inissitaq piffissami aalajangersimasumi pinerluuteqassanngitsoq imaluunniit maleruagassanik unioqqutitsissanngitsoq.

Maleruagassanik unioqqutitsinermut pineqaatissiissutinik aalajangersaasarneq naammassinnittarnerlu

§ 228. Akiliisitsissuteqartitsinermit akiliisitsissutip annertussusissaa aalajangerneqassaaq unioqqutitsinerup qanoq ittuunera annertussusaalu eqqarsaatigalugit. Akiliutissaq ilanngaatineqarsinnaavoq inissitap § 212, imm. 1 malillugu sulinerminut aningaasarsiaanit. Taamaattorli inissitaq minnerpaamik aningaasanik tigusaqartassaaq nammineq pisariaqartitami matussuserneqarnissaannut naammattunik.

Imm. 2. Aneersinnaanermik atorunnaarsitsinermit atorunnaarsitsineq atornerluisimanermut naleqqiullugu ilusilerneqarlunilu annertussusilerneqassaaq. Taamaalluni atorunnaarsitsineq siunertanut aalajangersimasunut piffissaliussanullu aalajangersimasunut killilerneqarsinnaavoq. Aammattaaq atorunnaarsitsineq aalajangersimasumik piffissalerneqassaaq, sapaatit akunnerinit aqqaneq marlunnit sivi-sunerusinnaanngitsumik.

Imm. 3. Kisimiittussanngortitsineq aalajangerneqassaaq unioqqutitsinerup qanoq ittuunera annertussusaalu eqqarsaatigalugit atuuttussanngorlugu piffissami aalajangersimasumi, sapaatit akunnerinit sisamanit sivi-sunerusinnaanngitsumi. Inissiineq inissitap sunngiffianut killilerneqarsinnaavoq.

Imm. 4. Tunngavissaqartumik pasitsaanneqarpat inissitaq aalajangersakkanik unioqqutitsisima-soq, maleruagassanik unioqqutitsinermut pineqaatissiissutitut kisimiittussanngortitsinermik kingune-qartussatut isumaqarfigisariaqakkamik, inissitaq ineeqqamut killisiuisarfimmut inissinneqarsinnaavoq, maleruagassanik unioqqutitsinermit suliasamik misissuinerup ingerlanneqarnissaa eqqarsaatigalugu tamanna pisariaqarpat.

Imm. 5. Inissitaq kisimiittussanngortitaq nammineq inigisamini imaluunniit inimi immikkootor-taqarfimmi immikkut ittumiittumi immikkoortillugu inissinneqassaaq. Inissiinerup nalaani inissitaq inuunermini allatigut killilersuiffigineqassanngilaq, taamaallaat inimi kisimiittussanngortitaanerup nas-sataanik killilersuiffigineqarsinnaalluni, tak. § 172.

Imm. 6. Kalaallit Nunaanni Pinerluuteqarsimasunik Isumaginnittoqarfimmi aqutsisut maleruagas-siussapput suliasanik unioqqutitsinermut tunngasunik suliaqartarneq pillugu aamma maleruagassanik unioqqutitsinermut pineqaatissiissutaasussat pillugit, matumani ilanngullugit akiliisitsissutip annerpaaf-fissaa aamma piffissap aalajangersimasup iluani akilersuilluni ilanngaatsittarnerup agguataarneqarnis-saanik periarfissat pillugit, aneersinnaanermik tamakkiisumik ilaannakortumilluunniit atorunnaarsitsi-sinnaaneq pillugu aamma ullut unnuallu pingasut sinnerlugit kisimiittussanngortitsilluni inissiinermit nalunaaruteqartussaataaneq akuerineqarnissarlugu pillugit.

Arsaarinninneq

§ 229. Paaqqinniffimmi pisortap imaluunniit inuup taamaaliornissamut piginnaatinneqartup aala-jangersinnaavaa arsaarinnittoqassasoq

- 1) pigisanik aningaasanillu paaqqinniffiup iluani nassaarineqartunik, aalajangerlugu oqaatineqarsin-naanngippat kiap taakku pigigai,
- 2) pigisanik aningaasanillu inatsisit unioqqutillugit paaqqinniffimmut eqqunneqarsimasunik, paaqqin-niffimmi pissarsiarineqarsimasunik imaluunniit pilersinneqarsimasunik, kisianni arsaarinnissutaa-sinnaanatik pinerluummumut akisussaannngitsumit pigineqarpata, aamma
- 3) pigisanik aningaasanillu inissitanut isertortumik eqqunniarsarisanik, arsaarinnissutaasinnaanatiili

pisumut pineqartumut akisussaannigsumit pigineqarpata.

Imm. 2. Kalaallit Nunaanni Pinerluuteqarsimasunik Isumaginnittoqarfimmi aqutsisut maleruagas-siussapput suliaassat arsaarinninnermut tunngasut suliarineqartarnerat pillugu.

Taarsiissutininik akiliineq (taarsiissutininik ilanngaassuineq)

§ 230. Inissitaq inissiisarfimmiitsilluni taarsiisussanngortitaassutigisaminik iliuuseqarluni paaq-qinniffiup pigisaanik aseruippat, paaqqinniffimmi pisortaq imaluunniit inuk taamaaliornissamut pi-ginnaatinneqartoq aalajangiisinnaavoq taarsiissutissat inissitap § 212, imm. 1 naapertorlugu sulinermini akissarsiassaanit ilanngaatigineqassasut. Taamaattorli inissitaq minnerpaamik aningaasanik tigusaqar-tassaaq nammineq pisariaqartitami matussuserneqarnissaannut naammattunik.

Imm. 2. Kalaallit Nunaanni Pinerluuteqarsimasunik Isumaginnittoqarfimmi aqutsisut maleruagas-siussapput suliaassat taarsiissutininut tunngasut suliarineqartarnissaat pillugu.

Naammassinninnermi allannguutit imaluunniit naammassinninnerup atorunnaarsinneqarnera

*Takkutinngitsoornermi, qimaanermi tigummigallagaanermi il.il.
naammassinninnermik kipititsineq*

§ 231. Kiffaanngissusiiiaalluni pineqaatissiisummik naammassinninneq kipitinneqassaaq inissitaq

- 1) takkutinnitsoorpat, qimaappat imaluunniit allatigut nammineq pisuussutigisaminik naammassin-ninnermik sumiginnaappat, imaluunniit
- 2) tigusaappat imaluunniit minnerpaamik nalunaaquttap akunnerini 24-ni tigummigallagaappat.

Naammassinninnissamik unitsitsinissamut akuersissut

§ 232. Kalaallit Nunaanni Pinerluuteqarsimasunik Isumaginnittoqarfimmi aqutsisut imaluunniit inuk aqutsisut taamaaliornissamut piginnaatitaat aalajangiisinnaapput pineqaatissiisummik naammas-sinninnissaq unitsinneqarallassasoq,

- 1) pissutsit immikkut ittut, soorlu sulinnermut, ilinniartitaanermut, ilaqutariinnermut peqqissutsimul-luunniit tunngassuteqartut naammassinninnissap ingerlaatiinnarneqarnissaanut akerliuppata,
- 2) atornerluinissaq aarlerinaateqarsorineqanngippat, aamma
- 3) naammassinninnissap kinguartinneqarnera inatsisinik maleruaasitsiniarnissamut akerliunngippat.

Imm. 2. Naammassinninnissamik unitsitsinissamut akuersisoqassappat piumasarineqassaaq eqqartuussaq pinerluuteqaqqissanngitsoq. Aammattaaq akuersissuteqartoqassappat piumasarineqarsin-naavoq eqqartuussap piumasarisat aalajangikkat malissagai, matumani ilanngullugu pinerluuteqarsi-masunik isumaginnittoqarfimmit nakkutigitinnissani, tak. kapitali 28 aamma 40.

Imm. 3. Kalaallit Nunaanni Pinerluuteqarsimasunik Isumaginnittoqarfimmi aqutsisut maleruagas-siorsinnaapput imm. 1 malillugu unitsitsineq pillugu.

Naammassinninnissamik aallartitseqqiineq

§ 233. Pineqaatissiisummik naammassinninnissaq aallarteqqinneqassaaq inissitaq orniguteqqip-pat, naammassinninnissaq siunertaralugu tigusaappat imaluunniit pinerluuteqarsimasunik isumaginnit-toqarfiup tamanna pillugu pineqartumut nalunaaruteqarneratigut naammassinninnissaq nangeqqittus-sanngortinneqarpat.

Pinerluuteqarsimasunik isumaginnittoqarfiup pensioniini aamma paaqqinniffinni il.il. pinerluute-

qarsimasunik isumaginnittoqarfiup avataaniittuni naammassinninniaaneq

§ 234. Pinerluuteqarsimasunik Isumaginnittoqarfimmi aqutsisut aalajangersinnaavaat eqqartuussaq napparsimmavimmut, ilaqutariinni ilasiatut, angerlarsimaffimmut imaluunniit paaqqinniffimmut piukkunnartumut utaqqiisaasumik imaluunniit inissinneqarnermi sinnera tamaat inissinneqassasoq

- 1) eqqartuussaq immikkut ittumik katsorsarneqarnissaminik imaluunniit paaqqutarineqarnissaminik pisariaqartitsippat, paaqqinniffimmi tassani il.il. annertunerusumik isumagineqarsinnaasumik,
- 2) eqqartuussap ukiui, peqqissutsimigut inissisimanagera pissutigalugit imaluunniit pissutsit allat immikkut ittut pissutigalugit eqqartuussap inissiisarfirmut inissinneqannginnissaanut imaluunniit inissiisarfirmiiginnartinnissaanut immikkut pissutissaqarpat, aamma
- 3) inissiisarfiup avataani inissiinissamut inatsisinik maleruasitsiniarnermut soqutigisassat akerliungippata.

Imm. 2. Eqqartuussat 18-it inorlugit ukiullit paaqqinniffinni il.il. imm. 1-imi eqqaaneqartutut it-tuni inissinneqassapput, taamaassananili inatsisinik maleruasitsiniaaneq inissiisarfiup avataani inissiinissamut akerliuppat.

Imm. 3. Inissiisoqassappat piumasarineqassaaq eqqartuussaq pinerluuteqaqqissanngitsoq. Aammattaaq inissiisoqassappat piumasarineqarsinnaavoq eqqartuussap piumasarisatut aalajangikkat allat maleruassagai, matumani ilanngunneqarluni pinerluuteqarsimasunik isumaginnittoqarfimmit nakkutigineqarneq, tak. kapitali 28 aamma 40.

Imm. 4. Eqqartuussaq inissinneqarnissamut piumasarisatut aalajangikkanik maleruaanngikkuni imaluunniit pinerluuteqaqqikkuni Inissiisarfirmut nuutsinneqarsinnaavoq imaluunniit utertinneqarsinnaavoq.

Imm. 5. Kalaallit Nunaanni Pinerluuteqarsimasunik Isumaginnittoqarfimmi aqutsisut maleruagas-siussapput inissiisarfiup avataani paaqqinniffimmi il.il. inissiisarneq pillugu.

Piffissaq iperagaaffik

§ 235. Iperagaasoqartassaaq pineqaatissiissut naammassineqarpat imaluunniit misiligummik iperagaanermut, pineqaatissiisummik unitsitsigallarnermut imaluunniit saammaassinermut atatillugu.

Imm. 2. Kalaallit Nunaanni Pinerluuteqarsimasunik Isumaginnittoqarfimmi aqutsisut maleruagas-siussapput piffissaq iperagaaffissaq pillugu aamma iperagaaffissap sivikitsumik siuartiallannissaanut periarfissaq pillugu, matumani ilanngunneqarluni sulinermut tunngassutillit imaluunniit pissutsit immikkut ittut tamatumunnga tunngavissaqartitsippata.

Misiligummik iperagaanissaq pillugu aalajangiineq

§ 236. Pineqaatissiisummumut piffissaliussap 2/3-iata atorneqareernerani pineqaatissiissutip naammassineqartup misiligummik iperagaanissaq periarfissaqartippagu, tak, § 149, imm.1-mi oqaaseqatigiit siulliit, misiligummik iperagaanissaq pillugu aalajangiineq piffissap imaalinerani pisassaaq, pineqaatissiissutip 2/3-ia naammassineqarniariarpat misiligummik iperagaatitsisoqarsinnaasoqarluni.

Imm. 2. Kalaallit Nunaanni Pinerluuteqarsimasunik Isumaginnittoqarfimmi aqutsisut maleruagas-siussapput misiligummik iperagaanissamik suliassanik suliariaqartarneq pillugu.

Misiligummik iperagaanermi nakkutiginninnermik il.il. naammassinninneq

§ 237. Misiligummik iperagaanissamut aalajangiinerup nassatarisaanik nakkutigineqarnissaq piumasarineqartullu immikkut ittut naammassineqassapput pineqaatissiissutit nakkutigineqarnissamik ilaqartitat il.il.naammassineqarnissaannut aalajangersakkat kapitali 40-miittut malillugit.

Apeqqutit immikkut ittut suliarineqarnerat

§ 238. Apeqqutit aneernissamut akuerineqarnermut, paaqqinniffimmi allami il.il. naammassininniaaneq nanginneqartussanngorlugu nuutsitsinermut, misiligummik iperagaanermut tunngasut apeq-qutillu allat soqutiginaatillit inissitamut tunngasut paaqqinniffiup akuttunngitsumik isummerfigisassa-vai, inissitaq tamatumunnga noqqaassuteqarnersoq apeqqutaatinnagu. Tamanna pillugu maleruagassat Kalaallit Nunaanni Pinerluuteqarsimasunik Isumaginnittoqarfimmit aalajangersarneqassapput.

Kapitali 44

Pinerluuteqarsimasut ilaannut pineqaatissiissutinik naammassinninneq

Inuusuttunut inatsisinik unioqqutitsisunut ikiorsiissutitut pineqaatissiissutit immikkut ittut

§ 239. Inuusuttunut kapitali 32 malillugu ikiorsiissutitut pineqaatissiissutit immikkut ittut inunnik isumaginninnermut pisortanit naammassineqassapput pinerluuteqarsimasunik isumaginnittoqarfik poli-tiillu suleqatigalugit.

Imm. 2. Imm. 1 malillugu ikiorsiissutitut pineqaatissiissuteqarnermi aalajangersakkat §§ 179-miittut aamma 182-miittut taamatulli atuutissapput.

Inatsisinik unioqqutitsisut tarnimikkut napparsimasut

§ 240. Tarnimikkut napparsimasunik kapitali 33 malillugu inissiineq katsorsaanerlu peqqinnissaqarfimmiit ingerlanneqassaaq.

Imm. 2. Kapitali 33 malillugu inunnik eqqarsartaatsimikkut kinguarsimasunik inissiineq katsorsaanerlu isumaginnittoqarfimmit naammassineqassaaq.

Imm. 3. Nakkutilliineq piumasarisallu immikkut ittut, § 157, imm. 2 malillugu aalajangersarneqarsimasut, pineqaatissiissutinik nakkutilliinermik ilaqartitanik il.il. naammassinnittarneq pillugu aalajangersakkat kapitali 40-miittut malillugit ingerlanneqassapput.

Imm. 4. Kalaallit Nunaanni Pinerluuteqarsimasunik Isumaginnittoqarfimmi aqutsisut maleruagassiussapput tarnimikkut napparsimasut katsorsarneqarneranni piumasarianik naammassinninnermi pinerluuteqarsimasunik isumaginnittoqarfiup peqataanissaa pillugu aamma tamatumunnga atatillugu pinerluuteqarsimasunik isumaginnittoqarfiup tarnimikkut napparsimasunik katsorsaasunut suleqataanissaa pillugu.

Immikkut paarisassanngortitsineq

§ 241. Kapitali 34 malillugu immikkut paarisassanngortitsineq naammassineqassaaq eqqartuus-sissutinik inissiisarfirmiittussanngortitsinertalinnik naammassinnittarneq pillugu aalajangersakkat kapitali 43-miittut naapertorlugit, taamaattorli tak. imm. 2 aamma imm. 3.

Imm. 2. Immikkut paarisassanngortitsineq nalinginnaasumik ingerlanneqassaaq immikkoortor-tami immikkut paarisassanngortitsiffiusartumi.

Imm. 3. Inissitaq immikkoortortami immikkut paarisassanngortitsiffiusartumi inissinneqarsima-nermi nalaani inissiisarfiup avataani sulinissaminut akuerineqarsinnaanngilaq aammalumi aneernissa-mut akuerineqarsinnaanani. Taamaattorli aneerneq akuerineqarsinnaavoq sungiussiartuaartitsinerup ilaatut, imaluunniit pissutsit immikkut ittut tamatumunnga tunngavissaqartitsippata.

Imm. 4. Kalaallit Nunaanni Pinerluuteqarsimasunik Nakkutilliisoqarfimmi Aqutsisut aalajangersinnaavaat, immikkoortumi ammasumi inissitaq, § 161 malillugu nakkutigineqartussatut eqqartuunneqarsimasoq, nakkutigisassatut immikkoortortamut

nuutsinneqassasoq, immikkoortortami ammasumi inissinneqarsimanera naammattumik isumannaatsuunngitsoq paasineqarpat.

Imm. 5. Kalaallit Nunaanni Pinerluuteqarsimasunik Nakkutilliisoqarfimmi Aqutsisut aalajangersinnaavaat nakkutigisanut immikkoortortami inissinneqarsimasoq immikkoortortamut ammasumut nuutsinneqassasoq, nakkutigisat immikkoortortaannut nuutsinneqassasoq tamanna isumannaatsuunissakkut mianerisassanut siunniunneqarsinnaasutut ataqatigiilersinneqarsinnaasutullu isigineqarpat. Kingorna tassani inissitaq immikkoortumi ammasumiitsinnissaa piukkunnangitsutut paasineqarpat imaluunniit taamatut inissiineq naammattumik isumannaatsuutinneqarsinnaanngitsoq paasineqarpat, Kalaallit Nunaanni Pinerluuteqarsimasunik Nakkutilliisoqarfimmi Aqutsisut aalajangersinnaavaat tassani inissitaq nakkutigisassat immikkoortortaannut nuutsinneqassasoq.

Imm. 6. Kalaallit Nunaanni Pinerluuteqarsimasunik Isumaginnittoqarfimmi aqutsisut maleruagassiussapput paarisassanngortitsinermik naammassinnittarneq pillugu, matumani ilanngullugit suliasat aneernissamut akuersinermut tunngasut suliarineqartarnerat, paaqqinniffimmut allamut nuutsitsinerit misiligummillu iperagaanerit aamma kapitali 40 malillugu nakkutilliinermik il.il. naammassinnittarneq.

§ 241 a. Tigummigallagassanngorlugu inissitaq immikkoortumi ammasumi najugaqarsinnaasutut naleqqutinngippat, imaluunniit inissiineq taanna naammattumik isumannaatsuunngitsutut paasineqarpat, inuit 2019-imi 1. augustip kingorna inuiaqatigiinnut akuuleqqinnissamut ikaarsaariarnermut atatillugu utaqqiisaagallartumik ataavartumik isumaqatigiissutitaqanngitsumik najugaqarnermut atatillugu Danmarkimi inissiisarfinnit, pinerluttunik isumaginnittut ataaniittumit, eqqarsartaatsikkut nappaatillit pillugit ilisimasalinnit aqunneqartumit, Kalaallit Nunaanni Pinerluttunik Isumaginnittoqarfiup ataani inissiisarfinni tigummigallagassanngorlugit immikkoortortaqaqarfimmut nuunneqassasut, Inatsiseqarnermut ministerip imaluunniit ministerimit piginnaatinneqartup, aalajangersinnaavaa.

Imm. 2. Imm. 1 malillugu nuussinerit pillugit Inatsiseqarnermut ministeri malittarisassanik erseqqinnerusunik aalajangersaassaaq.

Kapitali 45

Pineqaatissiissutinik naammassinninnermi maleruagassat nalinginnaasut

Ajutoornerup il.il. nassatarisaanik taarsiivigineqarneq

§ 242. Inatsiseqarnermut ministeri imaluunniit inuk taassuma tamatumunnga piginnaaniligaa maleruagassiussaaq inissiisarfinni, pensionini aamma isertitsivinni inissitat ajutoornerup il.il. nassatarisaanik taarsiivigineqarnissaat pillugu, aamma maleruagassiussaaq inuiaqatigiinni sulisitaanerup kingunerisaanik ajutoornertut il.il. taarsiivigineqarnissaaq pillugu.

Naammassinninniaanerup nalaani akuliuffigineqarnermut taarsiivigineqarneq

§ 243. Inissitaq eqqartuussisarnermik inatsimmi § 486-imi aalajangersakkat malillugit taarsiivigineqartussaataavoq, inissitaq nammineq pisuussutiginngisaminik

- 1) sivisuallaamik kiffaanngissusiagaasimaguni, imaluunniit
- 2) § 223 malillugu kisimiittussanngortitaasimaguni imaluunniit § 227 malillugu inimi killisiuiffiusartumi, inimi nakkutilliiffiusartumi imaluunniit inimi isumannaarsakkami inissinneqarsimaguni.

Imm. 2. Kinaluunniit pineqaatissiissummik naammassinninniaanerup nalaani imm. 1-imi taaneqartuniit allaanerusunik nammineq pisuussutiginngisaminik akuliuffigineqarsimasoq taarsiivigineqarsinnaavoq eqqartuussisarnermik inatsimmi § 486-imi aalajangersakkat naapertorlugit

Imm. 3. Taarsiivigeqqusissut Kalaallit Nunaanni Pinerluuteqarsimasunik Isumaginnittoqarfimmi aqutsisunut tunniunneqassaaq kingusinnerpaamik akuliuffigineqarnerup atuukkunnaarneraniit qaammatit marluk qaangiunnerini. Taamaattoq piumasagaat piffissarititaq taanna qaangiutereersoq tunniunneqartoq suliarineqarsinnaavoq, qaangiineq patsisissaqarsorineqarpat.

Imm. 4. Naammassinninniaanerup nalaani akuliuffigineqarneq pillugu taarsiivigineqarnissamik piumasagaatit Kalaallit Nunaanni Pinerluuteqarsimasunik Isumaginnittoqarfimmi aqutsisut aalajangiiffigisassavaat.

Pinerluuteqarsimasunik isumaginnittoqarfiup paaqqinniffiutaani najugaqarnermut akiliineq

§ 244. Inissitaq inissiisarfimmi, isertitsivimmi imaluunniit tamakkua avataanni aningaasarsiu-tigisaminik suliffeqartoq imaluunniit aningaasanik inuuniutissaminik pisortanit pisartagaqartoq ineqarnerminut akiliuteqassaaq. Taamatut aamma pineqassapput eqqartuussat pinerluuteqarsimasunik isumaginnittoqarfiup pensioniini najugaqartut.

Imm. 2. Kalaallit Nunaanni Pinerluuteqarsimasunik Isumaginnittoqarfimmi aqutsisut maleruagas-siussapput ineqarnermut akiliuteqartarneq pillugu aamma akiliutissanik eqqartuussisarnermik inatsim-mi kapitalini 45 - 47-mi aalajangersakkat malillugit akiliisitsiniartarneq pillugu.

Maalaaruteqarnissamut aalajangersakkat il.il.

Allaffissornikkut maalaaruteqarsinnaaneq

§ 245. Najukkami pinerluuteqarsimasunik isumaginnittoqarfimmi oqartussaasut inatsit manna malillugu aalajangiineri Kalaallit Nunaanni Pinerluuteqarsimasunik Isumaginnittoqarfimmi aqutsisunut maalaarutigineqarsinnaapput. Maalaarut aallarnerneqassaaq aalajangiinerup pineqartumut nalunaaruti-gineqarnerata kingornatigut qaammatit marluk qaangiutsinnagit. Taamaattoq maalaarut piffissarititap tamatuma kingorna saqqummiunneqartoq suliarineqarsinnaavoq qaangiineq patsisissaqarsorineqarpat.

Imm. 2. Maalaarut kinguartitsissutaasumik sunniuteqartanngilaq, aatsaalli kinguartitsissutaasumik sunniuteqassalluni aalajangiisuusimasoq imaluunniit Kalaallit Nunaanni Pinerluuteqarsimasunik Isumaginnittoqarfimmi aqutsisut tamanna pillugu aalajangiippata.

Imm. 3. Kalaallit Nunaanni Pinerluuteqarsimasunik Isumaginnittoqarfimmi aqutsisut inatsit man-na malillugu aalajangiineri allaffissornikkut oqartussaasunut allanut maalaarutigineqarsinnaanngillat.

Imm. 4. Kalaallit Nunaanni Pinerluuteqarsimasunik Isumaginnittoqarfimmi aqutsisut maleruagas-siussapput maalaarnissamut ilitersuutit pillugit aamma maalaarutit suliarineqarnissaat pillugu.

Eqqartuussivimmi misiliineq

§ 246. Allaffissornikkut inaarutaasumik aalajangiinerit eqqartuussamit eqqartuussivimmi misilin-neqartussatut saqqummioqquneqarsinnaapput aalajangiinerup eqqartuussamut nalunaarutigineqarnerata kingorna kingusinnerpaamik sapaatit akunneri sisamat qaangiutsinnagit, pineqartut tassaappata

- 1) § 149 malillugu misiligummik iperagaanissamut itigartitsissut pillugu § 236 malillugu aalajangiineq,
- 2) pineqaatissiissutip sivisussusissaanik naatsorsuineq pillugu § 193 malillugu aalajangiineq,
- 3) maleruagassanik unioqqutitsinermut pineqaatissiissutitut ullut arfineq marluk sinnerlugit kisimiit-tussanngortitsineq pillugu § 227 malillugu aalajangiineq,
- 4) pigisanik aningaasanilluunniit, inissitap sapaatip akunnerani ataatsimi sulinerminut akissarsiaaniit amerlanerusunik, arsaarinninneq pillugu § 229 malillugu aalajangiineq,
- 5) taarsiissutissaniit, sapaatip akunnikkaartumik akissarsianiit imm. 4-mi taaneqartuniit amerlaneru-suniit, ilanngaassiffigitinnissaq pillugu § 230 malillugu aalajangiineq, imaluunniit

6) nammineq pisuussutigiginagu sivisuallaartumik kiffaanngissusiagaalluni pineqaatissiissummik atuinermut imaluunniit maleruagassanik unioqqutitsinermut pineqaatissiissutitut kisimiittussanngortitaalluni inissinneqarnermut atatillugu § 243 malillugu taarsiivigineqarnissamik itigartissuteqarnermik aalajangiineq, tak. nr. 3.

Imm. 2. Eqqartuussivimmi misiliisitsinissamut noqqaassut ingerlatinneqassaaq paaqqinniffimmut, aalajangiissuteqaqqaarsimasumut, Kalaallit Nunaanni Pinerluuteqarsimasunik Isumaginnittoqarfimmi aqutsisunut imaluunniit eqqartuussivimmut.

Imm. 3. Eqqartuussiviup immikkut ittumik pissutissaqartoqartillugu piffissarititaq imm. 1- imiittoq atuutsinngitsoorsinnaavaa, qaangiineq patsisissaqarsorineqarpat.

§ 247. Suliassap eqqartuussivimmut tunniunneqarnera kinguartitsissutaasumik sunniuteqartanngilaq, aatsaalli kinguartitsissutaasumik sunniuteqarsinnaalluni Kalaallit Nunaanni Pinerluuteqarsimasunik Isumaginnittoqarfimmi aqutsisut imaluunniit eqqartuussivik allaanermik aalajangiippata.

Eqqartuussivimmi misiliisitsinermi periaaseq

§ 248. Suliassaq tunniunneqassaaq, eqqartuussisoqarfimmi paaqqinniffiup aalajangiissuteqaqqaarsimasup inissisimaffiani, eqqartuussivimmut. Eqqartuussaq kingusinnerusukkut paaqqinniffimmut allamut nuutsinneqarsimappat suliassaq eqqartuussisoqarfimmi, paaqqinniffiup eqqartuussap inissitaaffigisaata inissisimaffiani, eqqartuussivimmut tunniunneqarsinnaavoq. Eqqartuussaq kiffaanngissusiagaasimanngippat suliassaq eqqartuussisoqarfimmi eqqartuussap najugaqarfiani imaluunniit najoralagaani eqqartuussivimmut tunniunneqassaaq.

Imm. 2. Suliassami illuatungeriit arlaata noqqaassuteqarneratigut eqqartuussisuusut akuerisinnaavaat suliassaq suliassanngortinneqartoq eqqartuussivimmut allamut imm. 1 malillugu inatsisit naapertorlugit sularinnittussaasumut nuutsinneqassasoq, tamanna ilisimannittut najugaqarfia, eqqartuussap iperagaanissaa imaluunniit pissutaasoq alla immikkut ittoq pissutigalugu suliassap ingerlatilertornissaanut naleqquttuosorineqarpat.

Imm. 3. Suliassaq innersuussutigineqassanersoq imaluunniit innersuussutigineqassannginnersoq pillugu eqqartuussisuusut aalajangiinerat tunngavilersukkamik aalajangiinerussaaq. Suliassamik innersuussinissamik aalajangiineq eqqartuussivimmut qulliunerusumut ingerlatinneqarsinnaanngilaq.

Imm. 4. Suliassanik Kalaallit Nunaanni Eqqartuussivimmut innersuussuteqartarneq pillugu Eqqartuussisarnermik inatsimmi § 56 taamatuttaaq atuutissaaq.

§ 249. Suliassaq Kalaallit Nunaanni Pinerluuteqarsimasunik Isumaginnittoqarfimmi aqutsisuniit eqqartuussivimmut sapinngisamik piaartumik tunniunneqassaaq, aqutsisullu suliap pappiarartai nas-siutissavaat aalajangiineq maalaarutigineqartoq ilisimatitsissutigalugu aamma paasissutissiissuteqarlutik pissutsit tunngaviutinneqarniartut kiisalu uppernarsaatit suliassap aalajangiivigineqarnissaanut pingaaruteqarsinnaasut pillugit.

§ 250. Eqqartuussiviup piumasarisinnaavaa paasissutissat amerlanerusut pissarsiarineqassasut.

Imm. 2. Eqqartuussisup aalajangissavaa suliassaq oqaatsitigut sularineqassanersoq imaluunniit allakkatigut sularineqarsinnaanersoq. Oqaatsitigut sularineqassappat eqqartuussisuusut aalajangiis-sapput eqqartuussaq allallu killisiorneqassanersut aamma uppernarsaatissanik pissarsior-toqassanersoq. Eqqartuussiviup nammineq illuatungeriit ilisimannittullu aggersassavai.

Imm. 3. Eqqartuussisuusut tamanna pisariaqarsorigunikku eqqartuussaq illersuisumik illersuisutut sulisinnaatitaasumik ivertitsivigissavaat.

§ 251. Eqqartuussisuusut tunngavilersukkamik aalajangiisapput suliassaq itigartinneqassanersoq imaluunniit aalajangiineq atuuttussanngortinneqassanersoq, allanngortinneqassanersoq imaluunniit

atorunnaarsinneqassanersoq.

Imm. 2. Eqqartuussisuusut imm. 1 malillugu aalajangiinerat eqqartuussisarnermik inatsimmi kapitali 43-mi aalajangersakkat naapertorlugit nunatta eqqartuussisuuneqarfianut aalajangeqqitassanngortinneqarsinnaavoq.

§ 252. § 246, imm. 1, nr. 1 malillugu aalajangiineq atuutsiinnarneqarpat aalajangiineq eqqartuussivimmuut suliaassanngorteqqinneqarsinnaavoq aalajangiinerup nalunaarutigineqarneraniit qaammatit arfinillit ingerlareernerini. § 246, imm.1, nr. 2-6 malillugu aalajangiinerit eqqartuussivimmuut suliaassisutigeqqinneqarsinnaanngillat.

§ 253. Aalajangersakkat §§ 246-252-imiittut taamatulli atuutissapput allaniit inissitaanngitsuniit maalaaruteqarnermi pigisanik aningaasanilluunniit, inissitat sapaatip akunnerani ataatsimi sulillutik akissarsiaanniit nalinginnaasuniit naleqarnerusunik, pineqartumi § 229 malillugu arsaarinninnissamik aalajangiineq pillugu.

Immikkoortoq IV

Aalajangersakkat naggasiussat

Kapitali 46

Pineqaatissiissutininik nuussineq

§ 254. Akiliisitsissutit Kalaallit Nunaanni aalajangersarneqarsimasut naalagaaffeqatigiiffiup ilaani allami akilersinniarneqarsinnaapput maleruagassat tassani atuuttut naapertorlugit. Pillaasarnermik inatsimmi § 55 taamatuttaaq atuutissaaq pillaatip allanngortinneqarnissaanik aalajangersaaner- mut tunngatillugu.

Imm. 2. Akiliisitsissutit naalagaaffeqatigiiffiup ilaani allami aalajangersarneqarsimasut Kalaallit Nunaanni akilersinniarneqarsinnaapput maleruagassat tassani atuuttut naapertorlugit. § 128, imm. 4 taamatulli atuutissaaq.

§ 255. Nakkutiginninneq aamma tamatumunnga atatillugu piumasarineqartut, naalagaaffeqatigiiffiup ilaani ataatsimi aalajangersarneqarsimasut, naalagaaffeqatigiiffiup ilaata aappaanut nuunneqarsinnaapput. Tamanna pillugu aalajangiisusaaq inatsiseqarnermut ministeri imaluunniit inuk taassuma taamaaliornissamut piginnaaniligaa. Inatsiseqarnermut ministeri nakkutiginninnerup ingerlanneqarnissaa pillugu erseqqinnerusumik aalajangersaasinnaavoq.

Imm. 2. Nakkutiginninneq Kalaallit Nunaanniit naalagaaffeqatigiiffiup ilaanut allamut nuunneqarpat, eqqartuussissummik imaluunniit aalajangiisummi aalajangikkanik allannguinnissamut aamma aalajangikkanik sumiginnaanermi inatsisitigut kinguneritinneqartartunut tunngatillugu pillaaasarnermik inatsimmi maleruagassat atuutissapput. Taamatorpiaq pinerluttulerinermi inatsimmi maleruagassat atuutissapput, nakkutiginninneq Kalaallit Nunaannut nuunneqarpat.

Imm. 3. Pineqartoq nakkutigineqarnermi imaluunniit misiligaaffimmi nalaani inatsisinik unioq- qutitseqqippat aalajangersakkat imm. 2-miittut taamatulli atuutissapput, naak nakkutilliineq imm. 1 malillugu nuunneqanngikkaluartorluunniit.

§ 256. Inatsiseqarnermut ministeri imaluunniit inuk ministerip taamaaliornissamut piginnaatitaa aalajangiisinnaavoq inuit Kalaallit Nunaanni najugaqartut nunaqartulluunniit naalagaaffeqatigiiffiup ilaani allami parnaarunneqarnissamut eqqartuunneqarsimasut Kalaallit Nunaanni parnaarusnaanerminnik naammassinninniaassasut. Taamatut pisoqartillugu pillaat inissiisarfirmut inissiininngortinneqassaaq

eqqartuussissummi aalajangikkap sivisoqataanik. Taamaattoqassaartaaq eqqartuussaq Kalaallit Nunaanniissimappat naammassinninnissallu Kalaallit Nunaanni pinissaa naleqquttuosorineqarpat.

§ 257. Inatsiseqarnermut ministeri aalajangiisinnaavoq inissiisarfimmiittussanngortitsilluni eqqartuussissut naalagaaffeqatigiiffiup ilaani allami naammassineqassasoq, eqqartuussaq tamaani najugaqarpat nunaqarpalluunniit. Taamatut pisoqartillugu pineqaatissiissut parnaarusnaaninngortinneqassaaq piffissami eqqartuussissummi aalajangikkap sivisoqataanik. Taamaattoqassaartaaq eqqartuussaq naalagaaffeqatigiiffiup ilaani allamiissimappat naammassinninniaanerullu tamaani pinissaa naleqquttuosorineqarpat.

§ 258. Inatsiseqarnermut ministeri imaluunniit inuk ministerip taamaaliornissamut piginnaatitaa aalajangiisinnaavoq inuit Kalaallit Nunaanni najugaqartut nunaqartulluunniit naalagaaffeqatigiiffiup ilaani allami immikkut paarisassanngortinneqarsimasut Kalaallit Nunaanni pineqaatissiissumminnik naammassinninniaassasut. Taamaattoqassaartaaq eqqartuussaq Kalaallit Nunaanniissimappat naammassinninniaanerullu Kalaallit Nunaanni pinissaa naleqquttuosorineqarpat.

§ 259. Inatsiseqarnermut ministeri aalajangiisinnaavoq immikkut paarisassanngortitsilluni Kalaallit Nunaanni eqqartuussissut naalagaaffeqatigiiffiup ilaani allami naammassineqassasoq, eqqartuussaq tamaani najugaqarpat imaluunniit nunaqarpat. Taamaattoqassaartaaq eqqartuussaq naalagaaffeqatigiiffiup ilaani allamiissimappat naammassinninniaanerullu tamaani pinissaa naleqquttuosorineqarpat.

§ 260. §§ 256 – 259 malillugu aalajangiinerit eqqartuussivimmut misilitsitassatut tunniunneqarnissaat eqqartuussap piumasarisinnaavaa, aalajangiinerup eqqartuussamut nalunaarutigineqarneraniit sapaatit akunneri sisamat qaangiutsinnagit. Noqqaassut oqartussaasumut nuutsitsinissamik aalajangiisimasumut saqqummiunneqassaaq.

Imm. 2. Eqqartuussivimmi misiliisitsinissamut noqqaassut naammassinninniaanerup aallartinnissaanut nanginneqarnissanulluunniit akornutaassanngilaq, taamaassallunili tamanna eqqartuussisuusut aalajangerpassuk.

Imm. 3. Suliassaq tunniunneqassaaq eqqartuussisoqarfimmi oqartussaasup aalajangiisimasup inissisimaffigisaani eqqartuussivimmut. Suliassaq suliarineqassaaq pinerlunnernik suliassat suliarineqartarnerat pillugu aalajangersakkat eqqartuussisarnermik inatsimmi immikkoortoq V-imiittut malillugit. Eqqartuussisuusut aalajangiinerat tunngavilersukkamik aalajangiinerussaaq. Suliassanik Kalaallit Nunaanni Eqqartuussivimmut innersuussisarneq pillugu Eqqartuussisarnermik inatsimmi § 56 taamatuttaaq atuutissaaq.

Kapitali 47

Pineqaatissiissutit atorunnaarsitaasarnerat

§ 261. Inissiisarfimmiittussanngortitsilluni nakkutigisassanngortitsillunilu eqqartuussissut, tak. § 144, aamma inissiisarfimmiittussanngortitsilluni eqqartuussissut, tak. § 146, atorunnaassaaq ukiut talimat qaangiuppata, taamaassananili naammassinninniaaneq tamanna sioqqullugu aallartissimappat. Piffissarititarlil unnerluussisussaataasuniit noqqaassuteqarneq naapertorlugu eqqartuussisuusunit sivit-sorneqarsinnaavoq.

Imm. 2. Akiliisitsissut ukiut pingasut qaangiuppata atorunnaassaaq, tamanna sioqqullugu naammassineqarsimanngikkuni. Taamaattorli 3.000 koruunit sinnerlugit akiliisitsissutitut piffissarititaq ukiunik tallimanik sivilussuseqarpoq.

Imm. 3. § 128, imm. 4 naapertorlugu inissiisarfimmiittussanngortitsineq piffissarititat imm. 2-mi

taaneqartut qaangiunneranni atorunnaassaaq, taamaassananili nammassinninnissaq tamanna sioqqullugu aallartissimappat.

Imm. 4. Arsaarinninneq ukiut tallimat qaangiunnerini atorunnaassaaq, taamaassananili nammassinninnissaq tamanna sioqqullugu aallartissimappat. Piffissarititarli unnerluussisussaataasuniit noqqaassuteqarneq naapertorlugu eqqartuussisuusunit ukiut qulit tikillugit sivitsorneqarsinnaavoq.

Imm. 5. Pisoqalisoorinissamut piffissarititat imm. 1, 2 aamma 4-miittut naatsorsorneqassapput piffissamiit aalajangiinerup inatsisini maleruagassat nalinginnaasut malillugit naammassinneqarsinnaalerfianiit. Piffissarititanut ilanngullugu naatsorsorneqanngilaq piffissaq, piumasaqaasiinikkut saammaasaanikkut naammassinninniaanerup kinguartinneqarsimaffiani atugaq. Imm.1 malillugu pisoqalisoorinissamut piffissarititamut ilanngullugu naatsorsorneqanngilaq piffissaq, eqqartuussap pinerluttulerinermi inatsisitigut malitseqartitsinermik kiffaanngissusiagaanertut ittumik atugaqarfia.

Imm. 6. Misiligummik iperagaanerup kingorna imaluunniit pineqaatissiissutip ilaanut piumasaqaasiinikkut saammaasaanerup kingorna inissiisarfimmut inisseeqqinnissaq pillugu aalajangiisoqarpat, pineqaatissiissutip sinneranut pisoqalisoorinissamut piffissarititaq naatsorsorneqassaaq inisseeqqinnissamik aalajangiinnermiit. Naammassinninnissaq misiligummik iperagaanermiit imaluunniit saammaasaanermiit allaanerusumik unitsikkallarneqarpat piffissarititaq unitsitsigallarnermiit naatsorsorneqassaaq.

§ 262. Pineqaatissiissutit naammassineqarsinnaanngillat eqqartuussap toqunerata kingorna.

Imm. 2. Aammattaaq unnerluussisussaataasut arsaarinninnerup attatiinnarneqarnissaa pillugu apeqqut eqqartuussivimmut saqqummiussinnaavaat. Arsaarinninneq taamaallaat attatiinnarneqarsinnaavoq pineqarpata pigisat imaluunniit aningaasat, pinerlunnermi pissarsiarineqarsimasut imaluunniit pissarsiat taamaattut assingi. Eqqartuussisuusut arsaarinninnermik aalajangiineq allanngortissinnaavaat, taamaallilluni pigisanut taarsiullugu aningaasat arsaarinnissutaatillugit.

§ 263. Akiliisitsissutinut, arsaarinninnernut aamma inissiisarfimmiittussanngortitsilluni eqqartuussissutinut tunngatillugu saammaassisoqarsinnaavoq.

Kapitali 47a

Napparsimasut pinerluttulerinermi inatsit tunngavigalugu inissinneqarsimasut

§ 263a. Inatsiseqarnermut ministeri malittarisassiorsinnaavoq tarnimikkut nappaatilinnik nammineersinnaajunnaarsitsineq allatigullu pinngitsaaliisummik iliuuseqarneq pillugu inatsisartut inatsisaata, tarnimikkut napparsimasunut inissiisarfimmiittunut qanoq atorneqarsinnaanersoq pillugu, eqqartuussivimmi pinerluttulerinermi inatsit tunngavigalugu aalajangikkamut atatillugu.

Immikkoortut sisamaat

Aalajangersakkat allat, atortuutilersitsineq il.il.

Kapitali 48

Aalajangersakkat allat

§ 264. Inatsiseqarnermut ministeri malittarisassiorsinnaavoq Kalaallit Nunaata ilaani aalajangersimasumi angallannermut akuersissuteqartarneq aamma piumasarisat pillugit, matumani ilanngullugu sermersuarmi, Kalaallit Nunaata avannaani-kangiani nunami eqqissisimatitami kisalu sakkutooqarfinnut sakkutooqarfinniillu angallannerit, Kalaallit Nunaata illersorneqarnissaa pillugu Qallunaat Nunaata

Amerikamilu Naalagaaffeqatigiit akornanni isumaqatigiissut 27. april 1951-meersoq kingusinnerusuk-kullu allannguutitalik tunngavigalugu.

Imm. 2. Najoqqutassiani aalajangersakkanik, imm. 1 malillugu aalajangersarneqarsimasunik, pi-aaraluni imaluunniit mianersuaalliorluni unioqqutitsinermut § 119 naapertorlugu pineqaatissiissute-qarnissaq pillugu malittarisassiortoqarsinnaavoq.

Imm. 3. Inatsiseqarnermut ministeri malittarisassiorsinnaavoq piffinni imm. 1-imi taaneqartuni angalanissamut akuerineqarnissamik qinnuteqaatit pillugit suliassat suliarineqarnerannut akiliuteqartar-nissaq pillugu.

»§ 264 a. Manna inatsit malillugu, inatsimmi matumani aalajangersagaasuni imaluunniit aalajangigassani manna inatsit malillugu pisortanit aalajangerneqartuni pisortanut pisussaaffinnik aammalu namminersortut pisortanut pisinnaatitaaffinik saneqqutsisinnaaneq pillugu, justitsministeri maleruagassanik aalajangersaasinnaavoq, pisuni tulluuttuni:

- 1) Maani naalagaaffimmi nalinginnaasumik nappaammik ulorianartumik pinaveersaartitsinissamut imaluunniit siaruatsaaliuinissamut saneqqutsinissaq pisariaqartillugu.
- 2) Maani naalagaaffimmi nalinginnaasumik nappaammik ulorianartumik pinaveersaartitsinissamut imaluunniit siaruatsaaliuinissamut suliniutit kingunerisaannik saneqqutsinissaq piumasaqaataatillugu, aammalu pisussaaffiit aamma pisinnaatitaaffiit pineqartut matumunnga atatillugu annikinnerusutut isumalittut isigisariaqarnerini.
- 3) Maani naalagaaffimmi nappaammik nalinginnaasumik ulorianartumik pinaveersaartitsinissamut imaluunniit siaruatsaaliuinissamut pisariaqarsimasut iliuusissat kingunerisaannik pineqartut pisussaaffiit aamma pisinnaatitaaffiit naammassinissat ajornarsippat imaluunniit sanilliullugu ajornakusuulterpat.

Kapitali 49

Atortuulersitsineq il.il.

§ 265. Inatsit atortuulersinneqarpoq ulloq 1. januar 2010.

§ 266. Pineqaatissiissutininik atuinnissaq pillugu maleruagassat, inatsisini aalajangersakkanilu allani ulloq 1. januar 2010 sioqqullugu aalajangersarneqartut, atuutiinnassapput. Taamaattorli ullup pine-qartup kingornatigut pineqaatissiissutissat, inatsimmi matumani eqqartorneqartut, kisimik pineqaatis-siissutigineqarsinnaapput. Pineqaatissiissutit atorineqassapput inatsisip kapitaliini 1–6-imi aamma 24–47-mi malittarisassat naapertorlugit.

Imm. 2. Inatsit, parnaarusivimmi inissiinissamut periarfissiisoq, Kalaallit Nunaanni atuutsinne-qarluni atorineqarsinnaatitaalerpat pineqaatissiissutit, inatsimmi matumani eqqartorneqartut, parnaarus-sivimmut inissiinissaraluamut taarsiullugit atorineqassapput.

Inatsit nr. 572, 10. maj 2022-imeersoq (Politiit pillugit aaqqissuusseqqinnermik, politiinik naammagittaalliutiginissinnaanermik nutaamik aaqqissuusinnermik pilersitsineq, kinguaassiuutitigut pinerluttuliortartunut kajumissuseqalersitsinissamut Nuummi inissiisarfinni inissat katsorsaanermut atugassat pilersinneqarnerat, ukiukitsunik pinngitsaaliinnermi pineqaatissiisarnerup qaffanneqarnera, pinerlunnernit eqqugaasut il.il. inatsisitigut inissisimanerisa pataajaallisarneqarnerat)¹ atuutilersitsineq-aamma ikaarsaariarnermi aalajangersakkamik tulluuttumik imaqqarpoq:

Imm. 1. Inatsit ulloq 1. juli 2022 atuutilissaaq, taamaattoq imm. 2 takuuk.

Imm. 2. Inatsimmi matumani § 1, nr. 1-miit 2 ilanngullugu, § 1, nr. 4-imiit 9 ilanngullugu, § 1, nr. 11-imiit 22 ilanngullugu, § 1, nr. 24-imiit 33 ilanngullugu, § 2 nr. 2, § 2, nr. 17, aamma §§ 3-miit 6 ilanngullugu ulloq 1. januar 2023 atuutilissapput.

Imm. 3. Kalaallit Nunaanni politiini sulisuusut pillugit naammagittaalliuutinik aamma taakku pillugit pinerluttulerinermi suliaassanik suliarinnittarneq pillugu inatsit nr. 905, 16. december 1998-imeersoq ulloq 1. januar 2023 atorunnaarsinneqassaaq.

Imm. 4. Inatsimmik allanngorneri ilanngullugit nalunaarutiginninneq 1045, 7. september 2017-imeersumi pinerluttulerinermi inatsimmi § 215, imm. 3 malillugu malittarisassat aalajangersarneqartut atorunnaarsinneqarnissamik tungaannut imaluunniit pinerluttulerinermi inatsimmi § 215, imm. 4, inatsimmi matumani oqaasertalerneqartoq malillugu malittarisassanik atulersinneqartunit taarserneqarnissamik tungaannut atuutissapput.

§ 8

Imm. 1. Unnerluussisussaataitasunit aalajangiinerit naammagittaalliuutigineqarnerat pillugu suliarinnittarneq pillugu inatsimmi § 1, nr. 4-imi aamma nr. 12-imi, § 2, nr. 2-mi, aamma § 4-imi aalajangersakkat, inatsisip atuutilersinneqarnerata kingorna aalajangiiffigineqartunut atuutissapput.

Imm. 2. Tamatumuuna inatsisip atuutilinnginnerani piumasaqaat pillugu aalajangiisoqarsimatinnagu, inatsisip § 1, nr. 25-imiit 30 ilanngullugu taartisiassat pillugit suliaassanut atuutissapput.

Imm. 3. Politiini sulisut aamma politiini sulisunit pinerluttuliornertut isigineqartut pillugit naammagittaalliuutit pillugit suliaassat, ulloq 1. januar 2023 ingerlasut, inatsit manna malillugu naammassillugit suliarineqassapput. Taamaattoq suliat ingerlasut politidirektørip aamma Politiit pillugit naammagittaalliuuteqartarfiup akornanni oqaloqatigiinnerup kingorna, politidirektørimit maannamut aalajangersakkat atuuttut malillugit naammassillugit suliarineqarsinnaapput.

Imm. 4. Sulianut ingerlasunut aamma pinerluttoqarsimaneranik paasiniaanernut, nammineq aallartinneqartunut imaluunniit Kalaallit Nunaanni politiini sulisut pillugit naammagittaalliuutit pinerluttulerinermillu suliat pillugit inatsimmi pilersinneqartumi § 17, imm. 2 maannamut atuuttoq malillugu, taamatuttaaq imm. 3-mi aalajangersagaq atuutissaaq.

Imm. 5. Naammagittaalliuutit, 1. januar 2023-iutinnagu aalajangiiffigineqarsimasut, aamma imm. 3 aamma 4 malillugit maannamut malittarisassat atuuttut malillugit aalajangiiffigineqarsimasut pillugit naammagittaalliuutit, malittarisassat maannamut atuuttut malillugit suliarineqassapput.

Imm. 6. Imm. 3-miit 5 ilanngullugu maannamut malittarisassat atuuttut malillugit suliarineqartut, Kalaallit Nunaanni Politiit pillugit Naammagittaalliuuteqartarfimmi maannamut ilaasortaata naammassillugit suliarisinnaavaat.

Inatsit nr. 414, 25. april 2023-imeersoq (Akuersissuteqaqqaarnissamik tunngavilimmik pinngitsaaliilluni atoqateqarneq, pinerluttulerinermi eqqartuussisarnermi digitalimik attaveqaatinik atuneq, suliaassat nassuernertut suliarineqartut, najuutinngitsoornermi eqqartuussutit, eqqartuussisut aamma najukkani eqqartuussisut tunuartsusaatitaanerannut ukioritinneqartut il.il. aamma Kalaallit Nunaanni kingornussisarnermik kingornussassanillu agguasaarnermik inatsisiliornep)²⁾ nutarterneqarnerat tulluuttunik atuutilersitsineq- aamma ikaarsaariarnermi aalajangersakkamik tulluuttumik imaqarpoq:

§ 7

Imm. 1. Inatsit ulloq 1. juli 2023 atuutilissaaq, taamaattoq imm. 2 takuuk.

Imm. 2. Inatsisip § 2, nr. 4-ata, 6-iata aamma 8-ta, aamma §§ 4-miit 6 ilanngullugu piffissaq atuutilerfissaat Inatsiseqarnermut ministerip aalajangersassavaa.

Imm. 3. Pinerluttulerinermik suliani, taakkunani inatsisip atuutilinnginnerani unnerluunneqartumut aggeqqussut nalunaarutiginnissutigineqarsimallu, inatsisip § 2, nr. 16-ianiit 18 ilanngullugu atorneqassanngillat. Pinerluttulerinermik suliat taamaattut malittarisassat maannamut atuuttut malillugit suliarineqassapput.

Imm. 4. Inatsisip atuutilinnginnerani eqqartuussisarnermik inatsimmi § 453, imm. 3 malillugu najuutinngitsoornermi eqqartuussut eqqartuussutigineqarsimatillugu inatsimmi § 2, nr. 21 pinerluttulerinermik suliani atorneqassanngilaq. Pinerluttulerinermik suliat taamaattut malittarisassat maannamut atuuttut malillugit suliarineqassapput.

Imm. 5-6. (Ilanngunneqassanngillat)

Kalaallit Nunaanni pinerluttulerinermi aamma Kalaallit Nunaanni eqqartuussisarnermik inatsisip allanngortinneqarnissaat pillugu inatsisip Inatsit nr. 1782, 28. december 2023-imeersoq (Tarnikkut nakuuserfigineqarneq pillugu aalajangersagaq immikkoortoq)³⁾ nutarterneqarnerat tulluuttunik atuutilersitsineq- aamma ikaarsaariarnermi aalajangersakkamik tulluuttumik imaqarpoq:

§ 7

Inatsit ulloq 1. januar 2024 atuutilissaaq.

Kalaallit Nunaanni pinerluttulerinermi aamma Kalaallit Nunaanni eqqartuussisarnermik inatsisip allanngortinneqarnissaat pillugu inatsisip Inatsit nr. 411, 23. februar 2024-imeersoq (Digitalimik kanngunarsaanerit akiorneqarnissaannut suliniutit, tassunga ilagitillugit isumapiloqarneq tunngavigalugu tatiginnilersitsiniaanerup (grooming) inerteqqutaanera, meeqqamik atoqateqarnerup pinngitsaaliinnermut naligiissinneqarnera, pinngitsuusaarluni atoqateqarneq, upperisarsiortut aqutsisuisa atoqateqarniarlutik upperisaminnik pinngitsuuisinnaanngitsunik atornerluineri il. il.)⁴⁾ nutarterneqarnerat tulluuttunik atuutilersitsineq- aamma ikaarsaariarnermi aalajangersakkamik tulluuttumik imaqarpoq:

§ 3

Inatsit ulloq 1. januar 2024 atuutilissaaq.

Kalaallit Nunaanni eqqartuussisarnermik inatsisip, Kalaallit Nunaanni pinerluttulerinermi inatsisip, qularnaveeqqusiisarneq pillugu Kalaallit Nunaannut inatsisip aamma aappariinnerup inatsisitigut sunnuteqarnera pillugu inatsisip Kalaallit Nunaannut atuutilersinneqarsimasut allanngortinneqarneri pillugit Inatsit nr. 200, 25. februar 2025-imeersoq (Eqqartuussivinnut 2024-imiit 2027 ilanngullugu ukiunut arlalinnut isumaqatigiissutip ilaanik naammassinninneq)⁵⁾ nutarterneqarnerat tulluuttunik atuutilersitsineq- aamma ikaarsaariarnermi aalajangersakkamik tulluuttumik imaqarpoq:

§ 5

Imm. 1. Inatsit ulloq 1. marts 2025 atuutilissaaq, taamaattoq imm. 2 takuuk.

Imm. 2. (Ilanngunneqassanngillat)

Imm. 3 Inatsimmik allanngorneri ilanngullugit nalunaarutiginninneq nr.1187, 18. september 2023-imeersumi pinerluttulerinermi inatsimmi § 163, imm. 3 malillugu malittarisassat aalajangersarneqartut atorunnaarsinneqarnissamik tungaannut imaluunniit pinerluttulerinermi inatsimmi § 163, imm. 4, inatsimmi matumani §2 nr.1-imi oqaasertalerneqartoq malillugu malittarisassanik atulersinneqartunit taarserneqarnissamik tungaannut atuutissapput.

Kalaallit Nunaanni eqqartuussisarnermik inatsisip, Kalaallit Nunaanni pinerluttulerinermi inatsisip, qularnaveeqqusiisarneq pillugu Kalaallit Nunaannut inatsisip aamma aappariinnerup inatsisitigut sunniteqarnera pillugu inatsisip Kalaallit Nunaannut atuutilersinneqarsimasut allanngortinneqarneri pillugit Inatsit nr. 200, 25. februar 2025-imeersoq (Eqqartuussivinnut 2024-imiit 2027 ilanngullugu ukiunut arlalinnut isumaqatigiissutip ilaanik naammassinninneq)⁵⁾ nutarterneqarnerat tulliuttunik atuutilersitsineq- aamma ikaarsaariarnermi aalajangersakkamik tulliuttumik imaqarpoq:

§ 3

Inatsit ulloq 1. marts 2025 atuutilissaaq.

Inatsiseqarnermut ministereqarfik, ulloq 7. juli 2025

Peter Hummelgaard

/Niels Dam Dengsøe Petersen

¹⁾ § 20, imm. 2, § 21, imm. 6, oqaaseqatigiinni siullerni, § 22, imm. 1, imm. 2, oqaaseqatigiit aappaanni, aamma imm. 3, § 77, imm. 3, § 90, imm. 3 aamma 5, § 98, imm. 2, § 111, imm. 1, § 111a, § 120, § 135, imm. 1, nr. 3, § 145, imm. 1, oqaaseqatigiinni siullerni, Immikkoortut aappaanni qulequtaasumi, § 168, imm. 1, nr. 2, § 177, imm. 1, § 195, imm. 2, § 196, imm. 2, nr. 4-6, § 215, imm. 3 aamma 4, § 221 a, § 223 sioqqullugu qulequttami, § 223 a, § 225 sioqqullugu qulequttami, § 225 imm. 1-3 aamma 5-6, § 226, nr. 4 aamma 5, § 227, imm. 2, nr. 4 aamma 5, § 240 imm. 1 aamma 2, aamma § 241 a inatsimmik allannguneq tunngassuteqarpoq.

²⁾ § 77, imm. 1 og 2, aamma § 79-mut inatsimmik allannguneq tunngassuteqarpoq.

³⁾ § 88 a inatsimmik allannguneq tunngassuteqarpoq.

⁴⁾ § 77, imm. 1, oqaaseqatigiit aappaanni, aamma imm. 2, oqaaseqatigiit aappaanni, § 78, imm. 2, oqaaseqatigiit aappaanni, § 80, imm. 2, § 81 a, § 82, imm. 1, § 82 a, § 85, imm. 1-4, aamma § 93, imm. 1 aamma 2-mut inatsimmik allannguneq tunngassuteqarpoq.

⁵⁾ § 163, imm. 3.-mut inatsimmik allannguneq tunngassuteqarpoq.

⁶⁾ § 21, imm. 5, § 22, imm. 5, § 88 b, § 95 a, § 99, imm. 5 aamma 6, § 99 a, § 160 a aamma § 262, imm. 2.-mut inatsimmik allannguneq tunngassuteqarpoq.